

**NATIONAL ASSEMBLY OF
SEYCHELLES**

Wednesday 26th May, 2021

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Mersi. Bonzour tou Manm. E bonzour nou lodyans an deor. Ozordi pou sa Merkredi nou annan bann Mosyon. E nou a komans lo premye. Mon a apel Onorab Georges. Onorab Georges ki mannyer ou fer sa, eski ou prezant ou Mosyon, e koz lo la en sel? Oubyen nou segonde apre ou koze?

HON BERNARD GEORGES

Bonzour Mr Speaker. Mon prezante, mon koz lo la, apre i ganny segonde.

MR SPEAKER

Ok Mersi. Onorab Georges ou annan laparol pou komanse.

HON BERNARD GEORGES

Mersi Mr Speaker. Bonzour Mr Speaker, bonzour tou bann Manm. E tou bann dimoun ki

pe ekout nou dan lakour. Mr Speaker, mersi pou donn mwan laparol pou prezant sa premye Mosyon lo nou *Order Paper* ozordi. Parey nou konnen i annan 3 Mosyon ratifikasyon. *Ratification Motions* parey nou apel zot.

E premye i lir *comme swivan*;-

In accordance with Article 64 (4) of the Constitution, this Assembly resolves to ratify the Optional Protocol to the Convention on the Rights of the Child on the Communications Procedures.

Avek ou permisyon Mr Speaker, avan ki mon al pli lwen lo sa Mosyon, mon ti ava kontan demann ou permisyon pou fer 2 *simple amendments to the Motion*.

Annefe non sa Protokol se *Optional Protocol to the Convention on the Rights of the Child on a Communications Procedure*. An sengilye. Dan transkripsyon in annan en pti fot avek.

Ek ou permisyon donk mon pe move pou amann mon Mosyon dan sa 2 *simple amendments*.

MR SPEAKER

Mersi. Note wi.

HON BERNARD GEORGES

Mersi. Bon Mr Speaker, avek ou, ankor enn fwa avek ou permisyon avan mon al pli lwen lo sa Mosyon. Permet mwan etandonnen ki sa se en nouvo Lasanble e i annan nouvo Manm sa Lasanble. Pas de minit avan pou eksplike kisisa nou rol annefe an mezir ki nou pe ratifye en Trete oubyen en lenstriman enternasyonal parey nou apel zot.

Parey Mosyon i dir Lasanble i ganny mandate anba Lartik 64 (4) nou Konstitisyon pou ratifye okenn lenstriman enternasyonal ki en zofisye Gouvernman in sinyen lo lapar Sesel. E sa Lartik 64 i lir *comme swivan*:

“En Trete, Lagreman, oubyen Konvansyon an koneksyon avek relasyon enternasyonal ki pou ganny egzekite. Ouswa ki'n egzekite par Prezidan ouswa Lotorite Prezidan. Pa ava poz okenn lobligasyon lo larepublik amwen ki in ganny ratifye par swa en Lalwa ouswa en rezolisyon pase par vot lamazorite bann Manm dan Lasanble Nasyonal”.

Donk nou vwar Mr Speaker, ki filozofi nou Konstitisyon i enn kot pouvwar i ganny partaze parmi 3 brans Gouvernman. Legzekitiv, Lezislatif ki nou, ek Zidisyer. E pa zis pouvwar, anfen pouvwar

pa zis ganny partaze parmi sa 3 brans. Me pouvwar i ganny balanse osi parmi sa 3 brans.

E i annan serten ka kot nou koman en Lasanble nou ganny demande par Konstitisyon pou balans pouvwar Legzekitiv, e pou fer sir ki Legzekitiv pa azir oubyen govern dan en *silo* li tousel. Me ki toultan i annan sa *oversight* Lasanble.

De legzanp, enn se laprouvasyon Minis ki bezwen vin isi pou nou aprouve avan ki Prezidan i nonm en konsey Minis.

E dezyenmman se ratifikasyon en lenstriman enternasyonal en Trete oubyen en *Agreement* oubyen en Protokol, oubyen en Konvansyon. E sa se pou fer sir ki a nenport ki moman nou pep pa war li kot en dimoun dan Gouvernman in antre dan en lobligasyon lo son non san ki li i konnen. E ki en poz serten restriksyon oubyen serten lobligasyon lo li.

E se pou sa rezon donk ki i bezwen vin devan Lasanble swa par en Lalwa. Akoz parey nou konnen se zis Lasanble ki annan pouvwar lezislatif dan sa pei. Oubyen par en rezolisyon.

E sa se akoz nou annan sa 2 rol, enn se rol reprezantatif, nou bezwen reprezant bann

dimoun ki'n elekte nou. Nou reprezant Nasyon Seselwa. E donk nou bezwen annan sa *droit de regard*. Sa *oversight* lo Gouvernman, lo bann keksoz ki i fer dan nou non. Akoz ler Gouvernman i siny en Trete i siny sa lo non Lepep Seselwa.

Donk Lartik 64 se en lot landrwa kot nou vwar sa teori sa filozofi Konstitisyonnèl ki nou apel balans pouvwar dan en pei demokratik.

Egzekitiv donk i siny sa Konvansyon, oubyen i prepare pou li siny sa Konvansyon. E en fwa ki i sinyen oubyen avan ki i sinyen i vin kot nou pou dir, eski zot donn mwan sa pouvwar? Eski zot aksepte lo non Lepep Seselwa sa ki nou'n fer dan sa dokiman?

Alor nou vwar ki pou anmenn en Trete enternasyonal, en lenstriman enternasyonal an viger, i annan 2 letap ki bezwen ganny fer, bezwen ganny swiv.

Enn:- se sinyatir par Egzekitiv e dezyennman se ratifikasyon parey mon'n dir par reprezantan lepep, par nou.

Akoz nou pa kapab les egzekitiv li tousel antre dan en lenstans enternasyonal, san ki Lepep Seselwa atraver nou zot bann reprezantan in aprouv sa demars.

Prosedir ki'n ganny adopte dan sa setyennm Lasanble i enn ki bann Lasanble presedan pa ti otomatikman swiv. E la aprezan sa Lasanble par son pratik in fer sa vin en lobligasyon.

E sa se en pti pe parey bann *Bills* ki vin devan nou i al devan *Bills Committee*. Sa Lasanble parey ou ava rapel Mr Speaker, ler nou ti aprouv *Terms of Reference International Affairs Committee (IAC)*, nou ti demann avek *IAC* dan sak fwa ki i annan en Trete, en lenstriman enternasyonal ki pou vin devan Lasanble, fer sa ki *Bills Committee* i fer avek pou bann *Bills*.

Etidye, regarde ki bann propozisyon ki pe vin dan sa Trete oubyen dan sa lenstriman. E prepar en rapor e met sa rapor devan Lasanble, pou ki ler nou arive parey ozordi pou nou debat lo sa lenstriman enternasyonal, nou konnen ki Komite Lasanble *IEAC* in fini zet en regar lo la.

I prepar en rapor, e in soumet sa rapor pou nou ledifikasyon ler nou fer sa deba. E mon ti a profite la pou remersye *IAC* pou en travay eksepsyonnèl ki zot in fer dan sa 3 lenstriman ki pe vin devan nou ozordi.

Zot in prepar bann rapor tre detaye ki mon sir i pou ed

sakenn parmi nou dan deba lo ratifikasyon sa 3 dokiman ki'n vin devan nou ozordi.

Me ratifikasyon pa *the end of the road* parey nou dir, i annan parfwa en lot letap. Akoz dan Lalwa Enternasyonal i annan 2 konsep lo anmenn an viger en Trete enternasyonal. Enn se en konsep, en sistenm ki nou apel en sistenm *monist*. E en lot se en sistenm ki nou apel en sistenm *dualist*.

Dan bann sistenm *monist* en fwa ki Gouvernman in siny en dokiman, in siny en lenstriman enternasyonal. Sa lenstriman i vin an viger imedyatman. E i *bind* sa pei. I pa bezwen vin devan Lasanble.

E nou vwar sa sirtou dan bann pei kot i annan en sistenm Parlamter olye en sistenm prezidansyel. Langleter ek *Maurice* par egzanp se *Cabinet* ki ratifye en Trete ki en Minis oubyen ki Prezidan oubyen Premye Minis in sinyen. I pa vin devan en Lasanble.

Akoz? Akoz dan e pei parlamter, dan en pei ki annan en sistenm Parlamter. Tou bann Minis i sorti dan Parlman, alor i annan sa rol reprezantatif ki zot pe fer malgre ki zot asiz lo Konsey Minis.

Nou, nou en sistenm prezidansyel e donk nou annan

en sistenm *dualist*. Setadir ki amwen ki en Trete i dir ki i pou, parey nou apel sa an Angle *self-executing* amwens ki i dir ki i pou pran lefe imedyatman san ki nou bezwen pas en Lalwa, dan nou pei okenn lenstriman enternasyonal pou li vin an aplikasyon - pa an viger me an aplikasyon, I bezwen annan en Lalwa ki ganny pase.

E ki vin devan Lasanble ankor enn fwa pou anmenn sa lenstriman an viger. E nou ava vwar taler dan dezyenm Trete ki pe vin devan nou en legzanp en Trete ki *self-executing*. Me legzanp ki pli, ki dimoun in pli abitye avek se *Statute of Rome* ki en Trete ki *set up ICC*. Lakour Penal Enternasyonal.

Li i en Trete ki *self-executing*, akoz zot bann pri ti realize ki sa ki ti pou arive si i pa ti *self-executing*, se ki tou bann pei ti pou sinyen epi personn pa ti pou ratifye.

Akoz zot ti anvi ganny war konmkwa zot pe antre dan en Lakour Penal Enternasyonal. Me annefe apre zot ti pou servi leskiz ki a ou konnen nou parlamman pa pou an akor, alor se pou sa rezon ki nou pa pou fer li.

E sa donk, donk sa Tete pou li kapab vin an viger akoz ti en keksoz enportan a sa moman, in vin en Trete ki *self-*

executing. Setadir ou pa bezwen pas en Lalwa parey mon'n dir pou anmenn li an aplikasyon.

Donk tou bann lezot ka pou bezwen pas en Lalwa. Setadir i bezwen retourn devan Lasanble pou Lasanble prezan anmenn sa, donn lafors legal sa lenstriman enternasyonal ki'n ganny sinyen.

Donk sa ki nou pou bezwen fer dan sa premye la, se si sa Protokol i ganny *approve* par Lasanble ozordi e i ratifye. I pou annan en Lalwa ki pou swiv parey mon'ava eksplike dan en minit.

Avek sa detrwa mo lentrodikeyon Mr Speaker. Mon pas lo sa lenstriman li menm ki apel *the Optional Protocol to the Convention on the Rights of the Child on a Communications Procedure*. E la nou ava imedyatman rekonnet ki sa i en Protokol.

Nou'n fini sinyen son Konvansyon li menm. Son Konvansyon *on the Right of a Child* Sesel ti parmi bann premye pei pou siny sa Konvansyon. E nou annan en - nou bezwen fyer ki nou enn parmi sa bann pei kot zanmen nou'n *shrink* lo nou responsabilite anver zanafan.

Toultan Sesel in pei avangard dan proteksyon zanafan. I pa toultan ki nou

achieve sa ki nou'n set out pou fer. E yer nou'n vwar en legzanp dan sanmenm sa Lasanble kot Onorab *Leader* Lopoziyon ek *Chief Whip* in adres Lasanble lo en de rapaz ki'n arive.

Donk se pa ni Konvansyon, ni Lalwa, ni Protokol ki pou anpes keksoz arive. Me nou kapab felisit nou lekor ki nou parmi enn bann pei ki'n toultan defann drwa bann zanafan. A tel pwen ki nou'n ganny kritike. Bokou fwa dimoun i kritik nou i dir zanafan i annan plis drwa ki paran.

La prezan paran pa kapab koriz son zanafan, akoz nou'n antre dan tou sord lobligasyon, pou dir ki ou pa kapab koriz ou zanafan. Ou pa kapab servi en pti brans dibwa pou koriz li. En pti roten moris eksetera. Nou'n tande tousala.

Me mon krwar nou'n depas sa staz e nou bezwen aksepte ki parmi bann pei sirtou dan Kontinan Lafrik nou en legzanp lo proteksyon nou bann zanafan. Enn long, *be it last* Mr Speaker.

Alor parey mon'n dir nou fini siny Konvansyon lo *The Rights of the Child*. Sa nou ti enn bann premye pei pou fer li. E sa Konvansyon li menm i garanti serten gran drwa fondamantal pou bann zanafan. E parmi sa 4 drwa prensipal ki

garanti se en drwa kont diskriminasyon, en lobligasyon pou toultan fer keksoz koman en Nasyon dan meyer lentere en zanfan.

Trwazyenmman se ki garanti drwa zanfan a drwa a lavi, en drwa sirviv e en drwa pou li devlope koman en zanfan. E katriyenm drwa dan Konvansyon se donn drwa a en zanfan pou son lavwa ganny tande. E se egzakteman la kot sa Protokol i antre ozordi bomaten.

Apré sinyatir Konvansyon in annan 3 Protokol, e zot apel sa bann *Optional Protocol*. Akoz ou kapab siny Konvansyon koman en Nasyon epi deside pou pa antre dan bann Protokol. Oubyen pou pa antre dan tou bann Protokol, pou swazir lekel ki ou pou antre ladan. Lekel ki ou pa pou antre ladan.

In annan 2 deza ki'n fini ganny fer. Nou pa bezwen tard nou lekor lo la. Sa se trwazyenm *Protocol*. E sa enn i sorti parey mon'n dir taler lo sa drwa pou en zanfan ganny ekoute. Pou ki son lavwa i ganny tande. E se sa, sa *third Protocol on optional procedure* ki met an plas en prosedir pou ki lavwa bann zanfan dan en Nasyon tel pou nou i kapab

ganny tande dan en lenstans enternasyonal.

Nou kapab dir ki en Protokol i en pti pe parey en *S.I*, son Konvansyon i parey en Lalwa, *The Principal Act*. E en Protokol i vin koman en lasistans a sa Konvansyon kot i definir dan plis detay en pwen. E la sa ki i pe fer i pe definir dan plis detay sa prosedir ki kapab ganny swiv pou ki bann zanfan i kapab fer tande zot lavwa.

Sa Protokol i *set-up* en komite lo Drwa Zanfan. I annan en Komite Nasyon Ini ki pou apel *The UN Committee on The Rights of the Child*. E se sa Komite ki ganny mandate anba sa Protokol pou li ekout konplent ki en zanfan i kapab mete konmkwa son drwa in ganny vyole.

E sa *Committee on the Right of a Child* i parey mon'n dir, i pou fer sir ki tou bann pei ki'n siny sa Protokol, pe swiv sa ki sa Protokol pe dir li fer. Zanfan pou kapab apros sa Komite e pou fer en konplent kont zot pei ki pa pe swiv bann regleman enternasyonal ki sa pei in antre ladan, anba Konvansyon pou Drwa Zanfan. Selman si sa zanfan in pas atraver tou bann lenstans Nasyonal.

Setadir i bezwen *exhaust local remedies* parey nou dir

dan term legal. I bezwen fer tou sa ki i kapab isi e si i pa kapab ganny sa ki i pe rode. Se sa moman ki i kapab apros sa Komite Enternasyonal. E sa dan Lalwa enternasyonal ankor se en konsep ki kouran.

Ou pa kapab al devan en lenstans rezyonal oubyen enternasyonal, san ki ou'n *exhaust* bann *remedies* ki ou annan lokalman. Akoz annan Lalwa enternasyonal ou bezwen donn en sans ou pei pou redres en sityasyon avan ki ou'n al konplent avek en lenstans enternasyonal.

E nou vwar sa en pe partou. E la mon ava profite pou dir ki koman nou pe koze la, devan *UN Human Rights Commission Genève*, i annan en *case* ki'n ganny depoze par en *Seychelloise*, en madanm ki ti en msye avan e ki ti fer en *gender reassignment surgery* e ki'n demann isi avek Sesel pou rekonnet li, rekonnet son stati koman en madanm.

E ki Sesel in tik tike nou'n, mon bezwen deklar en lentere sete mwan ki ti son Avoka devan Lakour Siprenm. Nou'n perdi, nou'n al devan Lakour Dapel nou'n perdi. E la prezan in pran bann Avoka enternasyonal pou anmenn Sesel devan *Human Rights Commission*.

E enn bann Largiman ki Sesel pe souleve. Se ki i pa ankor *exhaust* tou bann *remedies* lokal. I pa ankor al devan Lakour Konstitisyonnèl par egzant pou al sey revandik son drwa isi lokalman. E donk sa se parey mon'n dir se en pwen ki kouran dan Lalwa enternasyonal.

Anba sa Protokol lekel ki kapab konplent? Mon'n dir konplent en zanfàn. Me annan de fwa nou realize ki konplent en zanfàn napa, akoz i en zanfàn i pa kapab li menm li. Pa tou zanfàn ki parey Greta Thunberg. I annan zanfàn ki pa kapab akoz zot napa le mwayen, oubyen zot napa konesans. Oubyen zot pe viv dan en pei ki depresif.

Sesel erezman nou pa enn sa bann pei me i kapab pe viv dan en pei kot i napa sa posibilite ariv devan sa komisyon pou li fer son konplent. E la donk nou vwar ki zanfàn i kapab apros s komisyon direktèman oubyen en group zanfàn i kapab fer li. Oubyen en reprezantan.

E i tre enportan ki en reprezantan i kapab fer sa, akoz sa reprezantan pa toultan ki sa zanfàn li menm li i kapab fer li lo son prop non. Me sa ki tre enteresan se ki Komisyon li menm i kapab lans son lanket.

I pa bezwen esper en zanfan vin konplent si i vin okouran ki i annan en de rapaz ki pe arive dan en pei. Sa Komisyon i kapab li menm li lans son konplent.

E ki kalite vyolasyon drwa ki en zanfan i kapab anmenn devan sa Komisyon, se tou bann drwa ki ganny garanti *The Convention of the Rights of a Child*.

Setadir lavant zanfan, nou vwar i arive dan pei. Prostitisyon zanfan, *child pornography* ki en problem ki reel dan nou pei. Annou pa fer krwar ki i pa egziste, i egziste.

Recently parey nou'n vwar in annan serten de rapaz. Ek ankor enn fwa sa pa arive isi, servi bann zanfan dan konfli arme. E sa se bann drwa ki kapab ganny vyole e ki bann zanfan i kapab anmenn devan sa Komisyon.

Me avan ki sa i arive, fodre nou pei i pran en seri *steps*. E se la kot mon mazine Lalwa i ava vini ki nou pou pase pou sa seri *steps*. E premye *step*, pei i bezwen deklare ki i rekonnèt konpetans sa Komite pou *deal* avek sa bann keksoz. Akoz tan ki nou pa aksepte ki nou rekonnèt konpetans sa Komite.

Akoz la i vin en kestyon souvrennte kot nou pe *give up* en pe souvrennte Nasyonal.

Akoz nou pe met sa dan lanmen en lenstans enternasyonal alor nou bezwen fer sa.

Me sa parey mon dir i ava vin dan en dezyenm ton e nou pa bezwen atard nou lo la bomaten.

Sesel Mr Speaker parey mon'n dir nou kapab dir ki nou en pe en sanpyon lo nivo bann keksoz ki nou'n fer pou protez drwa bann zanfan. E i annan en kantite mekanizm isi Sesel ki protez drwa. Nou menm nou, nou enn sa bann mekanizm akoz koman keksoz in arive nou menm nou atraver nou bann *Leaders* dan sa Lasanble, nou'n kondann sa aksyon e nou'n demann ki serten aksyon i ava ganny pran.

Pa partou ki sa i arive. E parey mon dir nou, nou kapab felisit nou lekor ki nou annan sa bann lenstans. Nou annan Lapolis, Lapolis i annan en *Family Squad* ki tre aktiv. E ki protez, ki la pou protez bann zanfan. Nou annan Tribinal Lafanmir li menm li kot serten Lalwa anba *Children's Act* ki sa Lasanble in pase. Ki permet bann zanfan ganny rekour menm kont zot paran ler en keksoz i arive.

Nou annan bann fwaye. Nou annan *President Village* kot ler zanfan pe ganny abize zot kapab ganny anmennen. Alor

nou annan, malgre ki nou pa parfe, nou annan en seri bon keksoz ki nou kapab fer.

Parey mon'n dir nou'n siny en kantite lenstriman enternasyonal kont proibisyon trafik bann zanfan.

Nou annan en Lalwa *Probation of Offenders*. Nou annan en Lalwa ki kantmenm, yer menm mon ti pe koz avek en Manm mon *caucus* kot ler en miner i ganny arete par Lapolis akoz in fer en keksoz ki kont Lalwa. I annan serten proteksyon, i pa ganny. I kapab ganny detenir me i ganny detenir dan en landrwa en pe pli spesyal. *Social Workers* i bezwen *get involve*, zot paran i bezwen la eksetera.

I annan en kantite keksoz ki nou'n fer mon pa bezwen rapel nou. Me nou konnen ki vizavi Lalwa nou'n perform ase byen lo sa nivo. Nou ganny ankouraze toultan pou devlope e met plis stratezi an plas pou donn plis akse a bann zanfan ki bezwen revandik zot drwa lo en nivo domestik. Oubyen lo en nivo enternasyonal.

E non ganny felisite lo *Leadership* ki Sesel in pran lo en baz, pou tou sa ki nou'n kapab fer anba nou bann Konvansyon ki nou'n sinyen. E mon krwar parey mon'n dir taler i en moman pou nou

rekonnet ki nou'n en *Leader* dan sa domenn.

Nou kontinyen rekonnet e promet bann drwa bann zanfan. Me nou bezwen fer ankor en bout semen. E mon ava konklir bomaten Mr Speaker, avek *Quo vadis?* Kote nou pe ale? Kisisa ki devan nou.

Bomaten avek mon swe ki sa ratifikasyon i ava ganny aprouve. Ki nou ava kapab pas sa Mosyon, sa Trete donk i ava vin en par nou Lalwa Domestik. En fwa ki Lalwa i ava vin devan nou pou nou *domesticate* parey nou dir sa Trete.

Donk sa i ava bezwen en keksoz ki ou bezwen fer e nou ava ankouraz Gouvernman atraver Biro *Attorney Zeneral* pou prepar sa Lalwa dan en fason relativman vit. E anmenn devan nou Lasanble.

Me se pa tou akoz Lalwa pa travay li tousel. I bezwen annan kapasite, i bezwen annan resours. E nou ava donk bezwen demann avek Gouvernman met bann resours teknik e kapasite imen an plas pou enplimant sa Lezislasyon ki nou pou anmennen.

Gouvernman i bezwen annan en stratezi konpreansiv lo ki mannyer sa ki nou pe fer la bomaten pou marse. Ki mannyer en zanfan ki santi ki son drwa pe ganny abize

oubyen en group zanfan. Ki mannyer zot pou apros sa lenstans enternasyonal. I bezwen annan kordinasyon avek Lapolis avek NCC, avek bann.

E mon pou profite la pou salye ki Mrs oubyen Ms Umarji pe fer dan NCC. Nou tre kontan dan fason proaktiv ki li avek son tim zot pe azir. I bezwen annan *training*, i bezwen annan plis *awareness*, i bezwen annan korperasyon avek sosyete sivil. I annan en kantite keksoz ki n ou bezwen fer.

Mon'n mansyonn tousala pou nou pa dir, parey nou tande fer parfwa ar be nou ratifye Trete alor nou travay in fini. Non nou travay o kontrer i konmans avek ratifikasyon Trete.

Alor Mr Speaker, mon pou aret la e mon ava demann avek sa Lasanble an zeneral pou kontinyen dan sa demars ki bann Gouvernman siksesiv i fer depi detrwa lannen. Kontinyen dan demars proteksyon nou bann zanfan par ratifye sa Protokol bomaten. Mersi Mr Speaker.

MR SPEAKER

Mersi LGB. Nou a ganny segonnman sa Mosyon. Wi Onorab Samynadin.

HON KELLY SAMYNADIN

Bonzour Mr Speaker. Tou mon bann koleg Onorab e tou dimoun a lekout. Mr Speaker, mon ti ava kontan segonn sa Mosyon e mon ti ava osi kontan dir de pti mo.

Mr Speaker, kisisa en zanfan? Dapre Nasyon Ini lo Drwa Zanfan ki ti ganny ratifye an 1989, en zanfan i en endividi ki pa ankor laz 18an. An dot mo i ankor miner. E i ankor laz kot i kapab egzers tou son responsabilite legal.

E Sesel parey Onorab Georges in dir ti parmi bann premye pei pou ratifye sa Konvansyon an 1990.

Mr Speaker, Sesel i en pti Leta Zil. Me malgre sa, i pa'n ganny eparnye avek bann sityasyon ki permet Drwa Zanfan ganny vyole. Tou resaman nou'n temwen bann *videos* lo rezo sosyal kot adilt pe angaz zanfan dan bann ak endesan plizoumwen seksyel. E sa in eripte bann aksyon lakoler ek degou parmi nou popilasyon.

Erezman, sa Protokol ki sa Lasanble pou ratifye ozordi pou permet ki Komite Nasyon Ini lo Drwa Zanfan pou kapab ekout bann ka kot Drwa Zanfan i ganny vyole an lakordans avek Konvansyon lo drwa zanfan.

Okenn zanfan, group zanfan oubyen reprezantan

zanfan sorti dan okenn pei ki'n ratifye sa Protokol pou kapab anmenn zot bann konplent devan sa Komite. E avek ratifikasyon sa Protokol sa Komite pou alors kapab lans bann lenvestigasyon an sa ki konsern ka vyolasyon drwa zanfan ki grav ou sistematik.

Mr Speaker, koman manman en garson 12an, mon partaz soufrans sa 2 zanfan dan sa video an sirkilasyon. Ki mon kapab dir ti pe ganny eksplwate seksyelman. Akoz mon pa swete ki ler mon pe travay oubyen mon absan kot lakour, deryer mon ledon mon zanfan pe ganny abize.

E la mon pe koz lo nenport form labi. I fermal letan mon realize ki bann adilt dan nou lakominote ki pe *roam about* libreman. Me ki malerezman zot pa vreman term an lespri. Lekel en dimoun avek en leker, avek en konsyans imen. Ki pou kapab mazine pou ankouraz nou bann pti inosan pou fer bann tel akt parey?

Bann adilt, nou bann zanfan i pran nou koman bann legzanp dan lasosyete. Zot parey en plant ki devret toultan pe ganny pran swen avek. Si nou pa aroz li e tir move zerb avek li, byensir i pa pou fleri ou prodwir fri se nou ki bezwen gid

nou zanfan dan sa bon semen afen ki zot pa ava perdi direksyon lo semen lavi.

Menm si sa Protokol i la pou garanti ki nou bann zanfan i annan en platform anba ki zot kapab ganny proteze. I osi devwar bann partner konsernen pou nou travay davantaz atraver bann mezir pli kolektiv pou ed Gouvernman dan sa batay pou asire ki drwa zanfan Sesel i kontinyelman ganny proteze.

Sa i enkli li nou menm nou Lasanble Nasyonal, Minister Ledikasyon, Minister Lafanmir, Minister Lasante, bann NGOs ki zot manda i viz ver proteksyon drwa bann zanfan. Me pli prensipalman nou bann paran.

Mon pe demann zot pou azir avek pli vizilans. Pa akoz en dimoun i ou fanmir, oubyen ou zanmi ki ou garanti son konfyans total kot sekirite ou zanfan i konsernen. En fwa ki silans en zanfan in ganny asire, i kapab tro tar ler sa labi in ganny dekouver.

Mr Speaker, wi, i mal ki sa *video* i an sirkilasyon lo rezo sosyal. Me nou osi bezwen admet ki se gras a sa ki nou'n kapab arive dekouver kwa ki pe reelman arive *behind closed doors*. Ki fer mwan kestyonnen, ki kantite bann tel sityasyon ki pe deroule dan nou bann

lakour, me i pa ankor, ou pa pou zanmen ganny dekouver.

Mon swete ki ratifikasyon sa Protokol Konvansyon drwa zanfan lo en prosedir kominikasyon, i ava en *wakeup call* pou tou bann endividi ki napa byennet nou bann zanfan a ker. Ki zot ava realize ki okenn krim komet kont bann zanfan i annan konsekans sever ki vin avek.

Ki vilnerabilite nou bann zanfan pa en *switch* ki nou kapab alimen tennyen ler nou anvi. Me ki si i ganny brize i pou en sikatris ki pou mark li pou touzour. Alors Mr Speaker, avek tou mon senserite mon pou aport mon sipor ver ratifikasyon sa Mosyon. Mersi.

MR SPEAKER

Mersi Onorab Samynadin. Bon mon annan 6 Manm ki'n lev lanmen pou adres sa Mosyon. Ale kontinyen. Zisteman sa ki mon pe demande la se lekel ki annan lentansyon adres sa. Onorab Vidot. Mersi.

I nesese pou mwan gard en pe letan a lafen pou si i annan dernyen pwen ki en Manm i le leve. E byensir pou loter sa Mosyon fer son rezimen. Donk mon ava diviz letan ki mon annan ant sa ki bann Manm ki nou annan la. E

sa i a vin apepre 4 minit pou en ladres.

I en pe kourt, me anfen i depan lo ki mannyer bann ladres i balanse. Kekfwa i annan en pe i ava pli kourt i annan en pe soz. Selman viz li pou fer li sa. Pou nou kapab termin deba ver 10er en kar koumsa.

Ok mon ti a kontan ofer premye loportinite pou Chairman IAC si i le fer en rapor, i le pas lo son rapor. Onorab William.

HON WAVEN WILLIAM

Mersi Mr Speaker. Bonzour tou dimoun ki a lekout. Mr Speaker, mon krwar poudir sa size baze lo bann levennman ki pe pase dan nou pei vizavi drwa bann zanfan. Mon krwar poudir ou kapab permet nou al en pti pe an deor 4 minit, akoz i en size ki enportan e nou bezwen koz en pe lo la koman en Parlman vizavi nou responsabilite.

Mr Speaker, premyerman mon ti ava kontan remerisi Sekretarya, spesyalman pou servis ki Depite Clerk ki'n zwe en gran rol dan akimilasyon sa Rapor. Ms Nada avek Ms Etienne pou travay ekselan ki zot in fer. E an menm tan mon ti ava kontan osi remerisi Manm Komite IAC, lo kote LDS avek

Parti *US*, ki'n pas lo sa bann Konvansyon avek bann Lazans konsernen.

Mr Speaker, mon pou'n pas en pti pe lo Rapor. Komite *IAC* i rekonnet ki Konvansyon lo Drwa Zanfordan ti ganny adopte inanim par Lasanble Zeneral Nasyon Ini le 20 Novanm 1989. E ki Sesel ti parmi bann premye pei pou ratifye sa Konvansyon an 1990.

Komite i note ki depi lannen 2000, Komite Nasyon Ini lo drwa bann zanfordan ki komans elabor lo serten Lartik Konvansyon atraver lenstriman legal. Koman lezot Protokol Sesel ti ratifye sa bann lezot Protokol ver enklizyon ouswa partisipasyon bann zanfordan dan konfli zarm *OPAC* an Out 2010.

E an swivan parmi ratifikasyon Protokol lo lavant zanfordan, servi zanfordan dan akt prostitisyon, e pornografi an Desanm 2012. Komite i rekonnet ki dan 77tyenm Sesyon Komite Nasyonal Nasyon Ini lo Drwa zanfordan, ti ganny demande pou enkli lezot Leta dan ratifikasyon Protokol lo prosedir kominikasyon.

Komite i osi note ki Sesel pa nouvo ek sa bann Protokol. E i deza form parti en prosedir kominikasyon similer anba Konvansyon lo eliminasyon

diskriminasyon kont bann madanm (*CEDAW*) depi 2011.

Komite in prepar sa pti rapor lo bann pwen enportan lo konteni sa Protokol Opsyonnel, vwala *comme* swivan:

Sa Protokol Opsyonnel i fer provizyon pou les Komite Nasyon Ini lo drwa bann zanfordan pou ekout konplent e alegasyon ki annan pou fer, kot Drwa Zanfordan i ganny vyole letan tou lezot mekanizm Leta an plas, in ganny epwize.

An adisyon, Protokol pe asir drwa tou zanfordan pou kapab apros sa Komite Nasyon Ini lo drwa bann zanfordan, si tou sistenm legal en Pei Manm pa'n kapab *deal* ek ka vyolasyon anba Lartik sa Protokol Opsyonnel. I fer provizyon en laliny raportaz e kominikasyon.

Sa Konvansyon atraver son bann Protokol pou ekout konplent, sorti kot zanfordan ouswa group zanfordan, ouswa bann reprezantan bann zanfordan kont okenn Leta ki'n ratifye sa Konvansyon.

Sa Protokol Opsyonnel i osi fer provizyon sa Konvansyon, pouvwar pou fer lenvestigasyon lo li menm dan ka grav sistematik, vyolans, drwa vyolasyon Drwa Zanfordan e Pei Manm zot kapab anmenn konplent kont kanmarad. Si zot aksepte sa provizyon, prosedir

kominikasyon trouve dan Seksyon 2 lo konsern leve par Komite anver raportaz vyolasyon en Leta ant Leta.

Finalman sa Komite, finalman sa Protokol Opsyonnel anver Konvansyon lo leksklizyon zanfan dan konfli zarm. Si bann pei relevan zot in osi ratifye sa bann diferan Trete.

Mr Speaker, letan ki Komite IAC ti pe konsilte avek bann Lazans. I ti vwar ki i annan bokou travay ki'n ganny fer par Sesel atraver bann diferan Lalwa ki'n ganny pase. E IAC ti vwar osi ki ti annan serten bann travay adisyonnal ki bezwen ganny fer parey ki avek *juvenile justice*, avek *juvenile centre*. Akoz i annan serten bann mankman ki bezwen ganny adrese.

IAC ti osi dekouver poudir i annan sa nesesite pou pli bon kordinasyon ant bann diferan Lazans Gouvernman, avek bann sosyete sivil pou asire ki drwa e proteksyon bann zanfan i ganny sofgarde.

Mr Speaker, IAC in fer rekomandasyon ki lefe ki i annan en Komite Nasyonal, me ozordi nou pa konnen si i annan reprezantasyon Lasanble Nasyonal lo sa Komite.

Alors IAC ti demande ki petet swa lo Komite Madanm, ouswa Komite IAC, en reprezantan i kapab ganny mete lo sa Komite.

E mon ti ava kontan azoute ki Komite Madanm dan Lasanble, mon konnen zot pe fer en bon travay. Mon ti ava demande ki sa Komite i osi pran en rol pli proaktiv vizavi drwa e proteksyon bann zanfan.

Mr Speaker, avek sa de pti mo mon ti ava kontan demann Lasanble pou donn sipor anver ratifikasyon sa Protokol. Sa ratifikasyon in vin a en bon moman par lefe ki pei ozordi nou pe pas atraver bann sityasyon ki konsern nou bann zanfan.

Mon ti ava kontan lans en lapel avek bann paran osi tou. Se pa les lebra tonbe, pa akoz i annan sa bann Lalwa ki protez drwa bann zanfan ki paran zot pa osi vin proaktiv dan pran zot responsabilite.

Mr Speaker, mersi bokou e mon pou donn mon sipor vizavi ratifikasyon sa Protokol. Mersi.

MR SPEAKER

Mersi Onorab William. Onorab William in pran 6 minit apepre, ki i pa en move model. Krwar mwan mon pa anvi limit zot letan, zot drwa koze. Me selman

nou annan en, sa ki mon a fer se nou a kontinyen avek mannyer nou bezwen. E si i neser avek permisyon *LGB* son dernyen Mosyon petet i a tonm pou semenn prosenn. So nou ava kapab partaz letan en pti pe pli byen.

Mon ava apel Onorab Aglae.

HON EGBERT AGLAE

Mersi Mr Speaker. Bonzour tou Manm Onorab e tou dimoun ki a lekout. Mr Speaker sa Konvansyon, sa Protokol ki la devan nou i enn ki enportan. Akoz Sesel in en pei ki'n vreman montre son mark lo lasenn enternasyonal kot i konsern Drwa Zanfan.

Mr Speaker, avan mon antre lo konteks Sesel petet mon ti a kontan osi partaz en pe bann pti resers lo kwa ki sa Protokol li menm li pe garanti e son lenportans.

I ti vin anfors an 1989 atraver en rezolisyon Nasyon Ini. E Sesel pa ti tarde osi pou li kapab *depart* dan sa prosedir. E enn son bann 4 kor prensip ki pe etabli pou sa bann drwa pou sa bann zanfan. Se premyerman en drwa kont okenn form diskriminasyon, ki swa ki ou etnisite ou larelizyon tou.

Ki fer ki ou annan en drwa pou ou kapab apartenir a okenn sa bann pratik ouswa ou fe. E osi i anmenn en drwa osi se pou dan devosyon ki en pei li menm li bann pratik ouswa bann lentere ki pou ganny met an mars ki al ver lentere zanfan.

Sa bann desizyon ki konsern devlopman li menm li. Ledikasyon, lasante, laspe sosyal e li menm li tou.

E osi son trwazyenm drwa enportan kor prensip se drwa lavi, drwa sirviv e drwa pou ou devlope. Akoz nou vwar poudir souvandfwa i annan bann aksyon ki ganny arive. I pa neserman dan konteks Sesel me selman nou pe vwar lo nivo enternasyonal ki apre mon pou sit en legzanp. Kot sa bann drwa sa bann zanfan li menm pe ganny vyole e menm ganny abize.

E katriyenm kor se respe pou sa zanfan kapab eksprim son lekor, son drwa pou li annan son *view*. E son persepsyon e son say lo bann keksoz reel ki i *entamer* dan en lavi toulezour. Ki swa osi i kapab de koule menm si nou pa pe tro met politik ladan. Me selman zot osi zot annan en drwa lo bann desizyon.

Parey nou koman lezislater. Parey Gouvernman kan i pran bann desizyon. I

kapab annan lenpak lo sa bann zanfan. Be sa bann zanfan osi i annan en drwa pou zot eksprim zot lopinyon atraver en *form of medium* pou zot kapab adres konsern ki etale.

E osi Mr Speaker mon krwar sa ki enportan avek sa bann drwa se i annan van *understanding* ki vin avek. *Ok*, en drwa annan sa bann *understanding* se sa drwa devlopman. Akoz bokou koman en pei i ganny mete e nou'n annan a en pwen bann tenm osi kot nou dir nou met dimoun o sant devlopman.

E dimoun, marmay i konpri ladan. E pou nou kapab asir ki i annan bann drwa dan devlopman sa bann zanfan, nou bezwen annan bann sistenm an mars dan en pei ki efektif, ki demokratik e ki aport soutyen pou sa zanfan.

E nou koz la parey ledikasyon, pou en zanfan devlope i pa zis lo en baz edikasyonnel ler nou pe koz i annan son baz teknikal. Me osi i annan son baz osi pou sa zanfan *acquire* bann parey sa ki nou apel bann *general knowledge* osi.

E osi i dekoule en drwa pou la proteksyon pou ki en zanfan depi ler i leve bomaten ziskan ler i al dormi, tou sa ki i fer malgre si napa lizye en paran

24 lo 24 lo en zanfan. Be lasosyete li menm li i *provide* bann proteksyon. E bann proteksyon i vin dan diferan form li.

I vin dan form Lalwa. Parey nou ozordi nou annan en sistenm legal. I ava annan en drwa pou li kapab ganny proteksyon legal. Nou annan sistenm sekirite, Lapolis, Militer, tousala i *entame* pou ede sofgard bann zanfan. Akoz bann diferan Lalwa ki nou annan dan Sesel i annan bann de koulman kot sa bann drwa i antre ladan.

E osi trwazyenmman, son drwa pou zanfan pou partisipe. Nou pa kapab pe ekskli dan en sosyete si nou anvi devlope, si ou anvi demokratize. Si nou anvi bouz de lavan, si nou anvi fer plis devlopman, ekskli laspe zanfan. Sa i dekoule tou lezot.

Bann senp legzanp;- Gouvernman atraver *Housing* i fer bann *housing estate*. Me souvandfwa konsern ki atase se wi nou bezwen lozman. Me pou sa zanfan ki pou viv dan sa lozman li, i war li kwense akoz i napa en lespas pou li kapab epanouir, devlope, pou zwe bann keksoz koumsa.

So i bann drwa, i bann keksoz ki enportan ki sa bann zanfan osi i kapab annan say pou partisip dan bann

desizyon. E sa i dekoul dan bann lezot sekter ki mon pa pou al ladan pou kontrent letan.

Alors Mr Speaker, sa Protokol i enportan akoz nou bezwen gard li vivan. Akoz i annan pei ki ratifye son Protokol parante, me apre zot pa pratike. Mon pou sit 2 legzanp Mr Speaker.

Anba sa Protokol i fer provizyon pou bann zanfan endividi, kapab vin devan pou adres zot bann konsern kot i konsern labi. Ouswa zot kapab asosye ansanm koman en groupman zanfan, ouswa atraver en *civil society* ouswa NGOs. Pou zot vin devan met zot bann konsern.

Mon donn en legzanp Mr Speaker, ki tanzantan nou tande. *Nigeria* kot bann zanfan laba *Boko Haram* laba, kot i pran bann miner bann zanfan zot ale. Par 200, 300 zot ale. E la i annan en mouvman, en mouvman ki'n deklanse dan sa pei pou ki sa bann zanfan in zwenn ansanm atraver led bann *civil societies*, pou zot anmenn bann *claim* devan malgre zot annan en Lalwa ki proteksyon zanfan zot osi.

Zot annan en *Children Act*, me parfwa politik latmosfer sa pei i fer ki keksoz pa bouze dan sa direksyon. E Gouvernman li

menm li parfwa i *shed en blind eye* lo sa ki pe pase.

Me kominote enternasyonal i reste angaze vi ki nou annan sa bann Lalwa. Vi ki nou annan sa bann Protokol pou kre bann formasyon ki kapab ede soulaz en pe.

I annan osi parey dan *DRC* kot nou annan bann *child labours, child soldiers*, tousala i annan bann groupman ozordi kot zanfan pe kapab *voice out* zot bann konsern.

E sa se sanmenm sa ki sa Protokol i anmennen e ki garanti. Ki i ava annan en laport ouver pou zot kapab adres zot drwa menm si bann ki pli o pa pe neseserman pe tande sa ki zot pe soufrans ki zot pe pase. E sa i en *channel* pou zot pas ladan.

Mr Speaker, lo konteks Sesel li menm li bokou in ganny fer depi '89 atraver bann lenstitisyon ki deza egziste ozordi. E ki'n promouvwar garanti zanfan, drwa sa bann zanfan.

Me selman souvandfwa nou konnen poudir zanfan i enportan. Zanfan i bezwen annan son drwa, me solman i bezwen annan en laliny osi nou bezwen sofgard, ou koman en zanfan ou annan en responsabilite kot i konsern sa.

Akoz parfwa nou'n vwar bann lenstans kot in vin parey en lese fer latitud kot zanfan i krwar i kapab fer sa ki li i anvi san ganny met en fren avek. E la kot keksoz, sosyete i komans de koule, komans perdi sa valer, e sa kiltir i sanze i ale, i ale. Ziskan ler nou war nou dan ban problemn problematik.

Alors mwan mon senserman siport sa bann lorganizasyon ki pe ede promouvwar drwa nou bann zanfan isi dan pei. Akoz bokou in ganny fer, e atraver Nasyon Ini osi kot diferan rapor anyelman i bezwen ganny soumet kot i konsern sa Protokol ki nou pou ratifye. E kot i sorti dan son Protokol parante.

Ki fer ki Sesel i osi i annan son mark kot menm si ou pa pe pas dan sa bann atosite parey lezot pei i pas ladan. Sirtou lo nivo Lafrik ki la o bor nou. Me selman nou pe gard konsyan nou en sistenm ki protez zanfan. Malgre nou'n annan nou bann defi.

Alors li menm li sa ki nou pe ratifye la pe fer provizyon en semen pase. Apre ki tou bann epwizman lokal, legal i ganny epwize. Si i annan okenn vyolasyon drwa en zanfan, e la sa prosesis i kapab deklanse pou al lo nivo enternasyonal.

Byensir en zanfan tousel li menm li sirtou en zanfan ki par egzant ki ankor miner ki petet a laz ant 10an, 8an, 10an. Li, li menm li tousel i pa pou kapab. E sa Protokol i pou fer provizyon ki en antite rekonnnet legal i kapab *carry* li *forward* ansanm avek li pou al devan sa komite lo nivo Nasyon Ini laba. Si i pa'n ganny okenn rekour avek okenn lenstitisyon legal isi dan pei.

Alors nou, nou pa swete sa i arive. Nou ti a swete ki okenn form vi ki nou annan bann lenstitisyon ki pe travay e ki kapab fer sa bann travay byen. Bann problemn i rezourd lokal, dan nou lokalite li menm.

Me selman parfwa i annan bann legzizans ki arive ki keksoz pa kapab, e keksoz i de koule. Mon pa pou al dan bann legzanp sirtou aköz i - Mon pran en legzanp par egzant i annan en *case* ki resaman nou'n koz lo la en pe. Kot en manman in ganny separe ek son zanfan. Tousala i en bann keksoz ki i sagrinan ler i arive. Be selman nou bezwen mazin drwa sa zanfan.

So Mr Speaker, rol Servis Sosyal dan sa demars i enportan. Me selman i pa kapab travay li tousel. Aköz souvandfwa nou larg sa fardo lo Servis Sosyal nou dir Sosyal pa

fer son travay. *Me it takes a society.*

I annan bann sosyete sivil ki bezwen zwe son rol. Nou annan bann NGOs ki fer bann travay ki bezwen osi de koule. Nou menm nou koman lezislater, paran, ki fer mon mazin en keksoz. Par egzanzp Mr Speaker, ler mon koz lo kote paran, bokou blanm i vize ver paran.

Me ozordi paran li menm li i vreman, vreman pa dir bizi me selman paran tousel li menm li i pa ase pou *raise a child* parey nou'n dir *it takes a community*. Ler nou batiz en zanfan nou vin paren, nou vin marenn, nou osi nou annan en rol nou bezwen zwe.

Ledikasyon, *teachers*, lasosyete ler nou pe koze. Alors Mr Speaker, si nou pou annan en Protokol, nou pe form parti sa Protokol. E isi Sesel nou annan en *Children Act* ki a zour. Nou bezwen met li an pratik e kit li vivan.

E se sa ki mon krwar mon pou donn sipor Protokol. Parey bann lezot Protokol ki pou vini a lavenir kot pou annan bann diferan lamannman pou met azour sosyete modern mannyer nou pe viv. Mon pou donn mon sipor dan sa bann laliny. Mersi.

MR SPEAKER

Mersi Onorab Aglae. Onorab Woodcock.

HON WAVEL WOODCOCK

Mersi Mr Speaker bonzour. Bonzour tou Manm e tou dimoun a lekout. Mr Speaker koman *Vice-Chair IAC* mon pou konmans mon lentervansyon par remersye felisit sekreter nou Komite ek son asistans pou sa bon travay ki'n fer pou prepar sa 3 rapor pou sa bann Konvansyon ek Lagreman ki nou pe debat lo la ozordi bomaten.

Mr Speaker Mosyon pe demann Lasanble pou rektifye *the Optional Protocol to the Convention on the Rights of the Child on a Communications Procedure*.

Sa *Optional Protocol* i fer provizyon pou permet *United Nation Committee on the Right of a Child (CORC) or CORC* pou ekout konplent kot i annan alegasyon ki drwa en zanfan in ganny vyole, dan e kot kan tou *channel* apropiye *avenue* kot sa bann zanfan i kapab ganny rekour kapab ganny solisyon pou vyolasyon zot drwa

Sa bann *channel* sa bann *avenue* i ganny *exhausted* kot lazistis pa'n ganny servi dan bann ka kot drwa sa bann zanfan in ganny vyole.

Sa Konvansyon i osi asire ki sa zanfan i kapab apros sa Komite sa *UN Committee Committee of a Right of a Child*, si sa pei dan nou ka Sesel nou sistenm legal pa'n fer nanryen pou sa zanfan, kot napa remedi napa rekour pou sa zanfan.

E sa Komite i osi atraver provizyon ki'n ganny fer dan sa Protokol, pou ekout konplent en zanfan ouswa en group zanfan ouswa parey *Leader* parey *LGB* in eksplike. En reprezantan osi i kapab anmenn sa kad devan sa Komite, kot sa bann zanfan sa bann *case*, pa'n parey mon'n dir pa'n neserman ganny en solisyon.

Sa Komite i annan pouvwar pou fer lenvestigasyon dan bann ka grav, ouswa parey bann ka sistematik vyolasyon drwa sa bann zanfan.

Malerezman Sesel nou en pei ki pa'n ganny eparye nou'n vwar dan lepase, zisteman *case in point* Onorab Samynadin fek tous en pe lo la ka ki zisteman fek arive, kot sa bann *video* ti pe ganny sirkile, de zanfan ki'n boulers popilasyon Sesel.

E dan lepase nou'n vwar plizyer bann ka ki'n vin piblik, e menm bann ka ki'n soka ki'n alarman ler nou pe koz bann vyolasyon sistematik labi bann zanfan, ouswa bann ka vreman

grav, nou'n trouve. Zisteman lannen pase ti annan sa ka bann ki ti abiz bann zanfan aze laz 12an ki ti annan apepre 75 fiy ki ti pe ganny abize seksyelman. E sa bann *predators* ti pe *prey* lo sa bann zanfan atraver an servan bann rezo sosyal.

E dan sa ka kot bann zanfan i pas dan bann labi koumsa, i bezwen annan rekour i bezwen annan bann landrwa kot zot kapab ale bann antite kot zot kapab met zot *case* devan.

E sa bann *perpetrator* sa bann dimoun ki fer sa bann aksyon, vyolasyon drwa sa bann zanfan e zot drwa i osi konsern drwa kont diskriminasyon, drwa kot okenn form labi.

Sa bann *perpetrators* i kapab lazistis i ganny pran i ganny fer e sa bann dimoun i ganny *taken to task* e zot ganny e bann aksyon i ganny pran kont sa bann dimoun ki pe fer bann tel aksyon.

Sa Lalwa i osi fer provizyon pou en pei kapab anmenn en lot pei devan sa Komite, en konparezon si nou santi poudir i annan nou bann zanfan dan en lot pei ki pe pas dan bann labi ki nanryen pa pe ganny fer nou, nou konman en pei Sesel kapab osi anmenn en

lot pei devan sa Komite *or* en lot pei *vice versa* i kapab anmenn Sesel si i i santi poudir i annan *blackened rather* vyolasyon drwa bann zanfan, i napa rekour vyolasyon drwa bann zanfan napa rekour pou sa bann zanfan dan nou pei.

E finalman sa Komite, i kapab ekout konplent e fer lenvestigasyon kont okenn vyolasyon drwa zanfan, ki garanti anba Konvansyon Drwa Zanfan. Nou annan en Konvansyon pou drwa zanfan e i osi annan bann lezot Konvansyon ki protez bann zanfan.

Sa bann Konvansyon i protez bann zanfan kont plizyer keksoz, plizyer labi i protez zanfan kont parey i annan en Konvansyon ki protez zanfan kont *child prostitution*;- i annan Konvansyon ki protez zanfan kont *child pornography, human trafficking*.

E ki protez bann zanfan pou anpes zot ganny antrennen ganny forse pou antre dan bann *arm conflict*. Parey nou'n vwar tanzantan nou vwar lo televizyon dan nou Nouvel kot dan bann pei partou dan lemond, bann pei i kot i annan bann konfli an ger zot servi bann zanfan konman bann *child soldiers*, pou fer bann aksyon pou ki sa i detri lavi sa

bann zanfan ki annan bann lenpak ase sever lo psikoloji lo lavi sa bann zanfan,

E fodre note ki Sesel in deza rektifye Konvansyon Drwa Zanfan e lezot Konvansyon osi i enportan. Parey mon'n mansyonnen sa bann Konvansyon ki mon'n koz lo la avan *Child Convention* ki protez zanfan kont *child prostitution, child pornography, human trafficking* partisip dan bann *arm conflict*.

Nou'n deza sinyen sa bann Konvansyon e plizyer Konvansyon ankor ki dan en fason ou en lot i ede protez drwa bann zanfan kot okenn labi.

Sesel osi Mr Speaker mon bezwen fer note poudir parey Onorab *LGB* in dir Sesel nou en sanpyon dan *L'Afrique* an term bann Konvansyon, bann Lalwa an term bann diferan antite ki nou annan ki la pou prezerv e protez nou bann zanfan.

Sesel i deza annan plizyer Lalwa an plas, pou protez drwa nou zanfan. E i menm annan en *Commission* ki ti ganny *set-up* mon *believe* an 2020. Apre sa sityasyon ki ti arive kot ti annan sa *ring* bann pedofil, sa (*sex*) sa *ring* kot bann zanfan ti pe ganny abize kot parey mon ti dir ti annan 3 zonn ki ti ganny ti al devan Lakour e zot ti ganny

an prizonnyen santans ti ganny pase lo zot.

Me ti annan serten fristrasyon poudir bann Lalwa ki deza an plas i pa ase sever pou *deal* avek bann dimoun ki fer sa bann tel aksyon, sa bann tel labi.

E i menm annan ki pe dir poudir kekfwa bann santans ki sa bann *perpetrators* pe servi i pa ase sever i pa ase long. E osi i annan bann nouvo rezo bann nouvo fason ki ozordi bann *predators* pe servi, pou sey *lure* sa bann manrmay pou abiz bann zanfan dan nou sosyete.

E ti annan en *Commission* ki ti ganny *set-up Seychelles Child Law Reform Commission*, e sa Komisyon ti ganny etabli dan 2020 ki ti pe reviz nou Kod Penal e propoz bann lamannman ek lezot Lalwa pou protez nou bann zanfan sirtou kont bann lofans seksyel.

E mon rapel si mon pa tronpe sete *Chair Justice Mathilda Twomey* ki ti *Chair* sa *Committee*. E zot ti pe tous bokou lo sirtou sa laspe rezo sosyal ki ozordi i en gro konsern pou nou.

I malere Mr Speaker ki ozordi dan sa sityasyon *COVID* ki nou ladan, menm mwan mon pa'n zanmen ankouraz mon bann zanfan pou al lo rezo sosyal, e mon pa'n le zot annan

okenn *Facebook account* ouswa lo *WhatsApp*, akoz mon ti annan serten konsern akoz e malerezman ozordi avek sityasyon *COVID* ki pe arive se ki nou bann zanfan i bezwen al *online*.

Leson pe bann *teacher* pe anvoy leson atraver *WhatsApp*, manrmay lo *Facebook* e atraver sa i annan sa bann *predator* ki la deor ki pe fer tou sord kalite fason, pou sey *lure* bann manrmay dan bann latrap ennler zot fer en bann *fake profile* zanmi sa bann zanfan.

Zot ofer sa bann zenn fiy posibilite pou zot vin bann *models* tou sord kalite keksoz zot fer pou sey loud nou bann manrmay anmenn pou anvoy bann portre, apre zot servi sa bann pou *blackmail* nou bann zanfan, e antrenn zot dan bann aktivite lanmenm la zot abiz sa bann manrmay.

E nou santi poudir e menm sa *Commission* ti fer sorti poudir i annan en nesosite pou reviz sa bann Lalwa, reget en pe lafason ki nou kapab kontrol sa bann keksoz e osi anpese ki nou zanfan i ganny *prey* lo la par sa bann *predators* ozordi.

E Mr Speaker okenn Lalwa ouswa Konvansyon pou protez nou bann zanfan, zot drwa nou pou bezwen ratifye i enportan pou nou ratifye.

E Sesel nou deza annan en *reporting mechanism* e plizyer antite ek bann *channel* lokal kot okenn vyolasyon drwa zanfan i kapab ganny raporte. Nou annan ozordi nou annan Departman *Social Affairs*, nou annan *NCC* nou annan Lapolis, *Family Tribunal* e Tribinal Lafanmir.

E se selman ler parey sa Konvansyon i fer provizyon la se selman ler sa bann *channel*, sa bann antite pa'n protez drwa sa bann zanfan ki en ka i kapab ganny raporte avek sa *UN* sa Komite *a Right of a Child* sa Komite Drwa Zanfan.

Mr Speaker dan en *meeting IAC* avek Departman Zafer Sosyal pou diskite lo sa Konvansyon de rekomandasyon ti ganny resorti. Enn nou ti koz lo nesese pou annan en *juvenile centre*.

Ki malerezman nou napa ozordi ki napa Sesel an se moman ki nou bezwen. E mwan mon en dimoun mon'n travay koumsa dan lepase as en *social worker* avek sa letan ti apel *Youth Residential Training Centre*.

Me malerezman ozordi nou napa en sant pou ankadre nou bann zanfan, sirtou bann zanfan ki annan bann konportman abnormal. E menm bann zanfan ki kekfwa

pe fer bann krim bann aksyon si en adilt ti fer ti pou definitivman ganny an prizonnyen bann aksyon ti pou ganny pran ek li.

E ou pa kapab pran zanfan met zanfan ansanm avek adilt. I bezwen annan en landrwa, en sant pou ankadre pou travay ek sa bann zanfan apre entegre zot dan lasosyete.

Sa i en keksoz ki en mank e ki'n ganny refer sorti dan bann plizyer bann rapor, menm bann rapor eksteryer, ki dir ki Sesel i annan nesese pou annan en tel sant pou ankadre nou bann zanfan pou nou anmas bann zanfan.

Dezyenm, keksoz ki'n fer resorti Mr Speaker se lenportans *synergy* ant diferan antite Gouvernman pou *ensure multi-stakeholders coordination*, kot parey mon'n dir i annan plizyer antite ozordi, nou annan Departman Sosyal, *NCC sorry sosyete sivil*, lekol, Lapolis paran Lakour.

Konmsi i annan tousala e nou tou nou bezwen travay ansanm pou nou rod en fason a lot pou prezerv drwa nou bann zanfan pou protez nou bann zanfan.

Wi paran nou sa enn ki pli responsab se nou ki bezwen vey nou zanfan. Me kekfwa pa toultan ki nou pou annan en

regar lo nou zanfan, sirtou la avek sityasyon parey mon'n dir *COVID* la ozordi bokou paran pe travay e zanfan i tousel kot lakour.

E nou tou ansanm nou bezwen ede pou nou prezerv e protez nou bann zanfan. En vwazen osi kapab get en regar fer kot i konnen paran pa la kefwaz zanfan i kot lakour.

Nou tou konmsi nou bezwen zwe en rol pou nou protez nou zanfan dan nou sosyete. Sa antite, sak Departman nou tou nou annan en rol. I pa en louvraz en travay zis endividi, en travay Nasyonal, en travay ki nou sosyete antye bezwen antreprann. Nou tou nou bezwen fer nou mye posibil pou *safeguard* e protez nou zanfan dan nou sosyete.

Nou bezwen travay ansanm, pou protez nou zanfan pou protez drwa nou zanfan.

Avek sa de mo Mr Speaker sa Konvansyon ki devan nou i enn ki bon *any* Konvansyon, okenn Protokol okenn Lagreman ki pou *ensure* sekirite proteksyon drwa nou zanfan, i enportan ki nou Lasanble nou tou zeneral Seselwa an antye nou siport en tel Konvansyon. Avek sa de mo Mr Speaker mon dir ou mersi.

MR SPEAKER

Mersi Onorab Woodcock.
Onorab Vidot.

HON AUDREY VIDOT

Mersi Mr Speaker. Bonzour Mr Speaker tou mon koleg Onorab, zabitan Roche Caiman e tou dimoun ki a lekout.

Mr Speaker Leta Sesel i rekonnet drwa nou bann zanfan, pou ganny proteksyon spesyal miner akoz zot imatirite e vilnerabilite.

Pou asir legzersis efektiv sa drwa, Leta Sesel i annan sa responsabilite pou asire ki nou bann Lalwa ki protez drwa imen espesyalman nou bann zanfan ki ganny respekte e enplimante.

E nou bann Manm Parlman nou annan sa responsabilite pou sofgard sa bann drwa, san ki i andomaz zot lasante zot moral ouswa zot ledikasyon.

Mr Speaker piblik i bezwen konpran se ki nou menm nou leta Sesel. Nou tou nou annan sa responsabilite moral pou protez nou bann zanfan.

Sa bann drwa i protez sa bann Lalwa i protez drwa zanfan. I annan kontribisyon pep Seselwa. Alors i nou devwar pou asire ki nou fer tou posibil, e respekte Lalwa pou protez nou bann zanfan.

Sa Mosyon ki devan nou Lasanble ozordi pe kree sa loportinite anba sa Konvansyon ki nou bann zanfan i ganny plis sipor e proteksyon avek Komite *UN* pou drwa nou zanfan.

Si leta Sesel pa pe fer ase pou protez zot drwa ki ganny enstri anba nou Lalwa.

Mr Speaker leta Sesel pou plizyer lannen in akonpli bokou dan proteksyon drwa nou bann zanfan, devlopman pei e loportinite ki'n ganny kree par ansyen Gouvernman avek sipor paran, sosyete sivil, politisyen e menm atraver aspirasyon nou bann zenn Seselwa.

Parkont konman en pti leta zil nou bezwen osi admet, ki nou kapab fer bokou plis ankor pou protez drwa nou bann zanfan. E fer tou posibil pou aport soutyen nou bann fanmir Seselwa, pou ki zot kapab fer fas avek bann defi lavi e protez nou bann zanfan.

Menm si sa trete ki devan nou pe aport sipor pou zanfan anba Leta Sesel nou bezwen pe montre legzanp konman en Pti Leta Zil ki nou vreman kapab protez nou bann zanfan parey nou Lalwa i preskri.

Mr Speaker, i pa sorti byen pou limaz nou pti pei Sesel letan paran i ganny separe avek son zanfan, dan en fason ki kont drwa imen. Pe enport ki

lofans en paran i kase anba Lalwa Sesel akoz i nou responsabilite konman en pei pou pratik sa ki nou prese lo proteksyon drwa imen.

Nou annan plizyer striktir ki an plas ki kapab adres bann ki fer lofans dan pei, e antretan asire ki drwa moral en zanfan i ganny proteze.

Me resaman nou'n vwar kot Sesel in *fail* enn son zanfan 11an atraver desizyon nouvo Gouvernman Sesel.

Mr Speaker ansyen Gouvernman in met an plas plizyer striktir e program pou aport sipor nou bann zanfan.

E ozordi Gouvernman nef in erit sa bann striktir ek program ki zot in dekrir konman en kales kase. Parkont bokou nou bann zanfan in epanouir atraver sa bann striktir e program ki konpliman proteksyon drwa zanfan Sesel.

Menm nou ki dan sa Lasanble ozordi, si i annan zot ki vwar Sesel konman en kales kase, se zot menm ki'n fer li vin en kales kase.

Atraver bann desizyon iresponsab, kot ozordi zanfan in ganny separe avek son zanfan kan i ti kapab ganny sa loportinite vwar son manman Sesel. Si son drwa imen pa ti ganny afekte si son manman ti

pas devan sistenm Zidisyer parey i ti merite.

(Interruption)

MR SPEAKER

Silvouple.

HON AUDREY VIDOT

... e sa manman ...

(Interruption)

MR SPEAKER

Silvouple mon kapab ganny. Mersi pou ou bann komanter *off mic* silvouple.

HON AUDREY VIDOT

... e sa manman.

MR SPEAKER

Permet sa Manm koze.

HON AUDREY VIDOT

Ki maternite ozordi, san en lanplwa akoz in ganny fer arete anba *URS* kot tou sa laport ki li in tape pou rod en louvraz personn pa'n pran li akoz i ansent.

Dan sa letan kot sekter prive e piblik pe fer arete dimoun pou travay, se sa manman ozordi ki pe depan lo son konpany pe siport li avek son zanfan.

Parey i pe pey en landrwa lwe e kot Lazans Proteksyon

Sosyal pa enterese pou asiste li dan sa moman ki li i pe pas dan difikilte. Mon bann frer ek ser Seselwa se sa fason ki Gouvernman nef i donn legzanp "Sesel pou tou son zanfan."

Letan nou Lasanble pe diskite en trete ki pe aport sipor nou bann zanfan Sesel letan sa Gouvernman nef i deza pe *fail* son pep, letan Ricky sa papa ki pe trimouse pou sipor son zanfan avek son madanm.

Alors si nou senser dan drwa nou bann zanfan, annou silvouple fer tou posib ki nou zanfan pa bezwen al tap laport kot *UN*, pou vin dir nou ki nou, nou'n *fail* pou protez nou zanfan anba nou Lalwa.

Mr Speaker mon'n dir pli boner ki nou tou nou annan sa responsabilite moral, pou protez sakenn nou bann zanfan. I devwar sakenn de nou pou montre bann bon legzanp nou bann zanfan.

Ler nou bann dirizan i servi tou sous medya, nou responsab pou nou bann komanter ki nou fer avek nou bann zenn adolesan ki pe aprann avek nou menm nou bann Dirizan.

Ler nou servi medya sosyal en platform kot nou zenn i servi bokou plis ki nou pe vwar sa bann mo vilger, bann portre e bann *video* endesan ki bann

ki ganny poste nou, nou bezwen montre ki nou bann dimoun ki responsab.

Mon sipor mon bann koleg ki'n fer resorti, ki paran i lakle dan prose e lev nou bann zanfan Sesel.

E sa i swivi par nou kominote ki konplimant sa responsabilite pou ede fer nou bann zanfan grandi, e vin sa bann adilt responsab dan sosyete ozordi.

Alors lo mon kote, mon pou fer li mon devwar e responsabilite, pou siport sa trete e lezot obligasyon konman en Manm Lasanble e en manman e konman en sitwayen Sesel pou edik nou bann zanfan lo zot drwa e responsabilite e pou protez zot drwa. Mersi Mr Speaker.

MR SPEAKER

Mersi Onorab. Onorab Labonte.

HON ANDY LABONTE

Mersi Mr Speaker. Bonzour Mr Speaker. Bonzour tou koleg Onorab e tou Manm a lekout e en bonzour spesyal tou zabitan La Rivière Anglaise.

Mr Speaker mon ti pou en pe kourt e direk aköz mon krwar poudir sa Protokol ki nou pe siporte i en Protokol ki vremen enportan. Me selman

Onorab in koz avan mon in dezapwent mon en pti gin aköz mon vwar li pe gat en pe sa Mosyon.

(APPLAUSE)

HON ANDY LABONTE

Akoz ler nou pe get sa trete li menm li en trete ki direk e pe koz lo Kominikasyon direkteman pou fasilite kominikasyon pli zou mwen pou zanfan si i pa ganny en rekour isi Sesel.

Me ler nou get Sesel li menm li an zeneral, nou vwar poudir an 1977 ler ti ariv koudeta dan Sesel si sa trete petet ti'n ganny sinyen nou a vwar poudir bann zanfan ki pa ti anvi al NYS zot lavwa ti ava'n ganny tandé, e petet osi bann paran ki ti ganny disparet ki zanfan in reste deryer pa'n ganny nanryen okenn erite. Zot ti ava'n kapab ganny rekonnet. Alor annou pa al dan sa bann demagozi.

(APPLAUSE)

HON ANDY LABONTE

Bon Mr Speaker, rezon ki mon le koz lo sa Trete li menm li i pli zou mwen aköz mon mazin sanson ki en artis popiler i sante Patrick Victor annou ekout lavwa nou bann zanfan.

Akoz la deor i annan bokou malgre mon mazin *PS Melanie* ki pe fer en bon travay avek son lekip pou vin en lavwa for pou bann zanfan ki nou bezwen rekonnet sa e felisit sa.

E bann lezot lenstitisyon ki pe travay an faver pou ekout bann zanfan. Me i annan nou parler nou menm nou paran oubyen si oule adilt ki nou servi nou zanfan, koman bann lobze oubyen annefe ler mon dir lobze akoz zis ler en manrmay i koze nou tant pou nou pa pran li kont.

Mon dir li sa akoz zis yer aparaman i annan en lensidan ki'n arive dan mon distrik, kot ankor enn fwa mon pa pe dir mon pa pou al plis ki sa akoz i dan lanmen *CID*, me selman i enportan pou bann zofisye *Lapolis* osi ki ler nou ava'n bann *Konvansyon*, koumsa ki nou sinyen nou ava en pe pli pridan ler nou pran bann desizyon.

Akoz nou pou konnen poudir si lavwa sa zanfan pa pe ganny ekoute isi *Sesel* nou pou kapab al eksteryer pou nou kapab fer ki lavwa nou bann zanfan i ganny ekoute.

Alor an zeneral Mr Speaker mon pou dir ki sa *Konvansyon* li menm li i ouver laport pou fer ki bann paran ki pa pe pran zot responsabilite

zot ava okouran poudir si oule zot ava vin en pe pli konsyan, ki i enportan pou nou tande ler ki nou zanfan i koze.

Akoz parey mon'n dir oparavan, se ki en zanfan pa en lobze, alor i enportan ki nou ekoute. Mon pa pou al plis ki sa, me solman mon pou dir mon pou siport sa akoz sa *Konvansyon* li menm li i annan plis ki 32an i vedir plis ki en adilt.

Alor lontan ti'n ler pou nou kapab anmenn bann lenstriman koumsa devan. Mersi Mr Speaker.

MR SPEAKER

Mersi Onorab. Onorab Cosgrow.

HON WALLACE COSGROW

Mersi Mr Speaker. Bonzour Mr Speaker, bonzour tou Manm Onorab, bonzour tou manm piblik ki pe ekoute.

Mr Speaker konman en Manm Komite Zafer Etranzer dan *Lasanble* mon sorti ki enportan pou mwan kontribye ver deba lo sa *Mosyon*. An vi ki nou bann Manm Komite nou'n ganny sa sans privez, pou zwenn ek tim sorti kot Minister Zafer Sosyal ki enplike direkteman toulezour avek travay ki annan pou fer avek sa *Konvansyon on the Rights of a*

Child ouswa Konvansyon lo drwa bann zanfan.

Parey nou konnen Mr Speaker, Sesel ti parmi bann premye pei pou ratifye Konvansyon lo drwa zanfan an 1990, apepre lan apre ki sa Konvansyon ti vin operasyonnel.

E depi sa en kantite in ganny fer pou promot drwa nou bann zanfan dan nou pei. Ozordi Sesel i enn parmi bann pei bann pli o nivo devlopman imen, dan nou rezyon dan *L'Afrique* e osi parmi bokou lezot pei lemonn.

Sa i enn posib aköz vizyon ek *focus* Gouvernman oparavan pou met pep o sant lo devlopman. Sa i konmans depi avek nou bann zanfan. En sistenm ledikasyon ki ankadre nou bann zanfan depi *Petite Enfance* e devlop zot ziska nivo iniversiter. En sistenm lasante ki protez zot depi nesans.

Mr Speaker i annan bokou plis legzanp mon kapab site lo bann *achievements* isi Sesel in fer dan domenn drwa e proteksyon zanfan. Nou sorti lwen Mr Speaker.

An dizan sa mon anvi rekonnèt e salye tou bann dimoun ki tou dilon bann lannen ki'n pase, in travay ek tou zot kouraz pou promot e protez drwa bann zanfan. Mrs

Matha Rene, Mrs Geva Rene, e tou bann travayer NCC depi son kreasyon, e osi bann travayer Departman Servis Sosyal prezan e lepase e dan en fason ou en lot zot in kontribye zot bout.

Vilaz Prezidan e bann lezot fwaye dan pei e tou lezot dimoun ankor, i annan bokou Mr Speaker e nou pa kapab nonm tou.

Me menm si sa Mr Speaker. I annan bokou defi dan sa louvraz nob. Ozordi devan nou Lasanble Mr Speaker, i *Optional Protocol to the Convention of the Right of a Child on a Communications Procedure*.

Parey son tit i dir i en Protokol opsyonnel ki Sesel pe ganny ankouraze pou ratifye, anba sa menm Konvansyon Sesel in deza oparavan ratifye lezot Protokol Opsyonnel ki annan pou fer avek partisipasyon zanfan dan konfli arme, e osi lavant prostitisyon pornografi ek bann zanfan.

Pou elabor en pti pe lo sa Protokol ki devan nou Mr Speaker, mon pou fer referans avek diskisyon ki Komite Zafer Etranzer ti gannyen avek tim kot Departman Zafer Sosyal.

Premyerman sa Protokol i enn ki etabli bann prosedir pou okenn konpleman, ki santi ki

drwa en zanfan in ganny afekte pou raport avek Komite Nasyon-z-Ini lo drwa zanfan, apre ki tou aveni lokal dan son ziridiksyon in ganny epwize.

Savedir i en rekour an deor nu prop sistenm legal. Pandan diskisyon a nivo Komite, ti annan konsern lo lekel ki kapab al devan sa *UN Committee*. Nou'n ganny reasire ki Konvansyon i fer provizyon ki zanfan zot menm, ouswa zot reprezantan i kapab al devan sa Komite pou lezot ka.

Dezyenman Mr Speaker e sa i tre enportan sa Komite Nasyon Ini lo drwa zanfan i kapab zot menm endepandaman lans en lenvestigasyon kont en Leta si i annan rapor labi i grav ou sistematik dan sa leta. Leta i osi kapab raport kanmarad kot i annan bann ka labi.

Mr Speaker sa ki mon'n koz bref lo la i lo sa Protokol ki si nou Lasanble i ratifye i pou vin nou fason fer dan nou pei, e i pou en lot zouti ki bann zanfan e bann ki lager pou protez drwa zanfan pou kapab servi.

Parey in ganny dir lokalman i annan diferan mekaniz an plas, pou garanti ki drwa zanfan i ganny proteze e osi garanti ki dan ka ki zot drwa i ganny vyole sipor e rekour legal i egziste.

Malgre tousala Mr Speaker, nou ankor vwar dan nou pti sosyete bann diferan lensidan kot drwa zanfan i ganny abize, e tro bokou fwa par bann ki sipoze protez zot. Bann ki sipoze donn zot konfyans.

Resaman lo medya sosyal parey lezot Manm in dir bokou pe koz lo *video* ki nou'n vwar an tre soka pe ganny sirkile, kot adilt ouswa zanfan pli aze pe ankouraz akt an desan.

Bann sityasyon koumsa i fer nou realize ki malgre nou'n fer bokou i ankor bokou pou nou fer konman en sosyete, pou asire ki a tou pri nou zanfan i ganny swa i ganny sa drwa ek proteksyon ki zot bezwen.

Ledikasyon i bezwen ganny entansifye pou zanfan e osi pou adilt.

Mr Speaker i malere, me konman en Manm nou Lasanble mon bezwen fer resorti ki ozordi serten desizyon Gouvernman pe fer ki nou vwar plis fanmir, pe viv dan en sityasyon bokou pli difisil. Bann ki'n perdi lanplwa atraver *redundancy*, bann ki pe ganny refize lasistans sosyal akoz zot ganny dir zot annan ase.

Bann ki pa ankor ganny en larepons lo zot demann pou en *part rental* akoz birokrasi.

Dan tousala Mr Speaker sa bann zanfan ki soufer. Se zot ki pe al dormi san en repa ouswa en landrwa konvenab pou zot poz zot latet. Se zot ki pa kapab konsantre dan laklas akoz problem dan lakour. Sa menm zanfan ki leta i sipoze proteze, leta i dezapwent li.

Mr Speaker letan leta i detas en zanfan ek son manman e deport son manman dan milye lannwit san *due process* leta ki sipoze protez sa zanfan i dezapwent sa zanfan.

(Interruption)

HON WALLACE COSGROW

Vwar Mr Speaker, vwar Mr Speaker adilt dan Lasanble ki sipoze pe donn en koudmen Deputy Speaker ki sipoze pe donn en koudmen pou nou travay i pe *disturb*.

(Interruption)

MR SPEAKER

Arete silvouple.

(Interruption)

MR SPEAKER

... dan tou bann lenstitisyon. Wi be mwan mon pe adres sa pwen sa arive alor permet mwan silvouple ou pa Speaker

ou *Leader* Lopozisyon silvouple respekte mon rol.

(APPLAUSE)

MR SPEAKER

Mon ava apresye si bann Manm pa enteronp lezot Manm letan zot pe koze. Sa ki'n lev lanmen pou annan son drwa koze e i pou kapab met son pwen devan. E i annan de kote parey Onorab Labonte in reponn Onorab Vidot in fer sa dan son diskour. Silvouple, annou swiv sa lareg evite kriy atraver lasal. Mersi. Onorab Cosgrow ou a kontinyen silvouple.

HON WALLACE COSGROW

Mersi Mr Speaker mersi pou entervenir dan sa sityasyon ki mon pe ganny enteronpe.

Mr Speaker nou'n fer bokou e i ankor annan bokou pou fer avek ratifikasyon sa Protokol mon espere ki tou bann ki konsernen avek drwa ek proteksyon bann zanfan, i ava *refocus* re get lafason ki zot pe *operate*, gete si zot pe fer maksimonm pou nou bann zanfan ki swa dan lekol, ki swa dan fwaye, dan bann lenstitisyon dan kominote e byensir dan nou prop lakour.

Mr Speaker avek sa detrwa mo, mon anvi konfirmen

ki mon pou aport mon sipor pou sa Mosyon.

Akoz i en zouti enportan dan lalit pou protez drwa bann zanfan i bon pou zanfan e i bon pou Sesel. Mersi Mr Speaker.

MR SPEAKER

Mersi Onorab. In ariv zis ler pou nou pran poz nou a rebran deba 11er. Mersi.

(BREAK)

MR SPEAKER

Byen nou a kontinyen. Bann entervansyon bomaten in apepre 10 minit sakenn e sa i tre byen. So mon ava envit bann ki pe al koze gard apepre sa model. Mersi. Mon apel Onorab Loze.

HON JOHAN LOZE

Mersi Mr Speaker. Bonzour Mr Speaker. Bonzour tou dimoun a lekout.

Mr Speaker travay devan nou Lasanble ozordi se Protokol opsyonnel lo Konvansyon Drwa Zanfan lo en prosedir kominikasyon, mon krwar mon'n ganny li byen Onorab Georges.

En Protokol Opsyonnel ki fer se ki i elarzir lobligasyon e responsabilite ki atann lo bann Leta Manm. I elarzir lobligasyon lo sa bann

obligasyon ki Leta manm in deza pran dan sa Konvansyon orizinal.

E sa bann Protokol zot la pou adres bann nouvo konsern, bann konsern emerzan ki posibleman ti'n deza ganny trete dan sa Konvansyon orizinal.

Bann *Optional Protocol* zot opsyonnel senpleman aköz vi ki en nouvo lobligasyon i en lobligasyon plis i pa otomatik ki bann Leta Manm i vin parti prenan sa bann Protokol opsyonnel.

Alors Leta i ganny sa swa *whether to or not*, e sa prosedir ki nou, nou pe fer ozordi.

Zis pou en legzanp i annan bokou pei sirtou bann pei kontinantal *L'Angleterre* i enn zot pa ankor fer sa ki nou, nou pe fer ozordi ratifikasyon sa Protokol kominikasyon.

Zot pa ankor fer li aköz zot enternman dan zot Gouvernman zot annan bokou deba e kestyon, lo i annan serten pei kestyon souvrennte e lezot i mekanizm entern ki pa egziste dan zot sistenm aktyel.

Ki parey in ganny dir depi bomaten Sesel nou deza annan en kantite Lalwa an plas, en kantite *existing mechanism* an plas ki tret bann size drwa zanfan.

Now Konvansyon lo drwa zanfan i definir en zanfan koman en imen. *Ce matin* mon'n tann Onorab Samynadin in dir endividi me i *more or less* korek. Me selman le term presi se i en imen par anba laz mazoriter.

Rezon ki sa bout imen i enportan, e la mon anv i fer de keksoz sa. Enn, i zwenn drwa zanfan avek drwa imen, i atas li otomatikman, sa de keksoz. En zanfan set en imen. Alors i otomatikman garanti tou drwa imen ki anba *chart of human rights*.

So otomatikman la sa in ganny fer. Be i annan en keksoz pli partikilye ki mon ti anv i koz lo la ozordi dan Lasanble, i konsern sa kous nou popilasyon ki toultan pe dir ou Gouvernman in pran zot in aras zot roten, in pran zot drwa, in aras *teacher* roten, in aras *teacher* son drwa.

Be i annan en keksoz mon anv i fer sorti kler. Ozordi *all politics* Sesel pou temwanny son kad politik tou son bann tou son bann reprezantan pou reparti prenan dan pas en Protokol opsyonnel lo Konvansyon Drwa Zanfan ki li ki'n pran sa roten.

Li ki'n aras ou, ou roten. E sa mon e tou Seselwa tande sa i bezwen kler sa. Si okenn

dimoun dan nou pei dan nou sosyete pe rod de kout roten in ale la i la.

Konvansyon lo Drwa Zanfan. *UN CRC United Nation Convention on the Right of the Child*. Laba roten in ale.

E roten in ganny pran par le senp fe sa definisyon. En zanfan set en imen par anba laz mazorite otomatikman i garanti e i aksed a tou drwa imen ki annan.

A sa pwen mon anv i zis fer en pti *sidebar*, akoz mon ti a kontan ganny leksplikasyon en pti leklersisman avek Onorab Georges letan i fer son repons, si i posib si i pou annan okenn travay ki nou, nou bezwen fer dan nou Konstitisyon Sesel an relasyon avek drwa zanfan?

Si i annan ouswa si sa definisyon, en zanfan konman en imen i ase pou garanti tou bann drwa ki zanfan i merit annan i merit ganny rekonnèt dan nou pei Sesel.

Mr Speaker i annan en kantite size ki pe ganny trete an se moman dan nou Lasanble letan nou pe diskite sa Konvansyon, i annan enn ki nou'n koze lo bann lensidan ki'n ganny diskite yer.

I annan osi bann Protokol opsyonnel ki lo pornografi ki'n ganny refer lo la. be si ou pou al menm dan son Konvansyon li

menm e dan son Konvansyon par egzanp si ou pran ou Lartik 34 Lartik 34 i kler li.

I dir ou, “*States Parties undertake to protect the child from all forms of sexual exploitation and sexual abuse. For these purposes, States Parties shall in particular take all appropriate national bilateral and multilateral measures.*”

Depi son Konvansyon orizinal li menm, in dedye en Lartik an antye lo sa size labi seksyel zanfan.

E zanfan labi seksyel sa zanfan Sesel la i enn nou bann pese ki mon kapab dir i pli dan kasyet i vin pli dan fernwanr. Konman en Nasyon nou annan bokou difikilte pou nou ouver les soley tap en pe ladan, les en pe ler bat dan sa problem. Nou kasyet sa.

Sa enn la nou kasyet sa. Labi seksyel lo zanfan konman en Nasyon nou napa sa kouraz pou nou koz lo la. *Yet* letan ou al dan sa resers ki *APDAR* ti fer avek son bann kliyan, enn bann keksoz ki’n sorti kler en kantite bann viktim eroin Sesel ozordi, zot sirtou *trauma* labi, labi seksyel e sirtou labi seksyel konman koz lo *trauma* ki *lead into depression* ki’n anmenn zot lo labi sibstans.

Sa se bann kliyan *APDAR* ki’n dir zot menm dan en resers

ki ti ganny fer par *APDAR*. So sa kestasyon labi seksyel la, i pa zis sa pti bout pornografi i pa zis en *video* ki’n sirkile lo *WhatsApp* yer ki nou’n pran nou en pozisyon moral i fini, i *go away*.

Ou annan ou tou sa bann dimoun ki ankor pe viv avek ki viv avek sa depresyon, ki ozordi zot lo eroin. So klerman i annan viktim e kot i annan viktim in annan aksyon ki vedir i en keksoz ki vivan dan nou sosyete sa.

I *am sorry* be i pou bezwen annan en moman ki nou konman en Nasyon, nou pou bezwen rekonsilye nou lekor avek sa vilen manni ki egziste, dan nou bann fanmir parmi nou Nasyon, ki *for some reason or other* nou kasyet nou pa oule koz lo la;- ki zanfan Sesel pe ganny seksyelman abize e i paret *to a certain extent* sa i *ok*.

I paret ki i *ok*, aköz nou kasyet, nou ankor pe kasyet. Nou pa koze lo la sa. Nou koz lo tou vis, tou manni, tou mers, tou nis ki dimoun i annan. Me nou koze nou Kreol. Seselwa nou en Nasyon ki nou lalang nou labous pa dan nou pos nou koze. Sa enn la rar, ou tann en fwa dan rar.

E get ki arive la? Nou’n vwar esansyelman en *training*

video kot de zenn zanfan pe ganny *train* pou fer en keksoz. Me i annan en kantite nou ki pe koz lo sa *video*. I mal annan sa *video*. I mal sirkil sa *video*.

Be ki nivo dekadans moral nou ladan? Si nou *boil it down to video*. So i byen ki nou annan sa mekanizm raporte. I byen ki nou annan sa mekanizm raportaz ki pe ganny enkli la. Parske nou annan en problem dan nou pei.

E mon'n al dan sa direksyon pou mwan dir si nou konman en sosyete *we cannot face it, we cannot deal wit hit*. Posibleman i annan viktim ki zot, zot a *take it upon themselves* zot raport pli lwen. La mekanizm i la. I kler. I annan fason ki sa i a kapab ganny fer.

Akoz fransman dir mon pa krwar ki nou konman en Nasyon nou pare pou *tackle* sa problem. Nou pare pou *tackle* sityasyon.

E nou tou la anndan nou konnen. Nou tou swa dan distrik ouswa nou travay dan distrik, nou tou nou ganny rakonte bann *horror stories*, nou konnen. I pou vilenn i pa pou neser pou antre dan bann detay, me selman vwala, posibleman petet sa i ava en *avenue* kot viktim i a nobou trouv en lot semen pase.

Akoz nou konman en sosyete nou pa ankor ase adilt, i paret mwan pou nou *deal* avek sa bann sityasyon.

I annan en lot Lartik dan *Act* orizinal ki mwan mon'n var ase enteresan. Lartik 26 i dir ou koumsa, "*States Parties shall recognize for every child the right to benefit from social security including social insurance, and shall take the necessary measures to achieve full realization of this right in accordance with the national law.*"

Ou konnen sa enn la, parkont bann drwa sosyal en imen *including* zanfan i ti *well in hand* li Sesel sa. Sa ti'n ganny pran an men tre byen mersi silvouple. Nou pa parfe nou. Nou pa ti parfe ni sa Gouvernman ki la ni sa enn avan. Napa la perfeksyon. Me selman zefor ti'n ganny fer keksoz ti annan en fason fer.

E dimoun i pa ti ganny gete konman en *burden* dimoun pa ti en fardo pou son Gouvernman. E bann mekanizm servis sosyal proteksyon sosyal pa ti pe ganny *run* parey en biznes.

I ti ganny *run* konman en sistenm proteksyon sosyal ki protez imen, fanmir, egalman zanfan ki li osi i ganny definir

konman en imen par anba laz matirite.

Be soudennman nou vwar tousala in ganny bourye, tou sa bann keksoz in ganny sanze. Dimoun napa proteksyon sosyal dan sa pei ozordi.

Zot ganny kontinyelman dir e repete wi i la dan Bidze i annan. Pa'n tire sa i ti dan Bidze i la ou pou gannye. Apre Minis i vini i dir ou koumsa nou pa pe fer nouvo proze *social housing* la *well* pa neserman *social housing*, be *housing* pou vilnerab akoz napa larzan nou pa pou fer nouvo, napa.

So suddenly soudennman i pa dan Bidze la. Sa zanfani ki li son paran pe esper en proze pou aranz en lakaz pou anpes delo koul dan son zorey ler i dormi, i pa pou benefisyé la li. Ou vwar?

Lamazorite dimoun ki annan en bezwen reel, pou lasistans sosyal i pa pe gannye li, i pe ganny dir fer *appeal*, i fer rapel lo rapel i pa pe gannye menm li.

E son zanfani i lafen. Vant pe korde. *On top of* lafen, *on top* vant pe korde, sa zanfani son paran i ganny en manman *bill PUC* parey nou'n vwar yer! Se sa bann *issues* ki nou pei pe fer fas avek ozordi.

E sa bann keksoz osi la nou bezwen koz lo la li osi. Nou

bezwen pran sak loportinite ki nou gannye pou nou koz vre sityasyon imen dan sa pei. Nou bezwen koz lo dimoun avans zot konsern met devan.

Mwan mon pa pe akoz personn met ledwa lo personn, mon pa pe fer politik mon pe zis dir, vwala. Dimoun ozordi i al kot *ASP* i pa ganny asiste i ganny dir fer rapel. I ganny en *text* sepa en *call* i dir li vin pran son let in ganny en let *appeal*. Mon pa konnen dan ki kastrol i pou mete sa let fer rapel. Ou pa'n kalifye, fer rapel.

Be sa zanfani li eski nou mazine sa zanfani? Eski nou mazin ler nou pe dir paran avek ki ou ti fer sa piti i napa en papa li, son papa pa sonny li? Be konmsi pese sa papa la sa zanfani ki pou peye i pou pey sa atraver lafen li i pou pey sa atraver son vant ki pe korde. Sa zanfani i nepli inosan li. i anmenn pese son papa.

Parey nou'n ganny dir ozordi poudir tou mal ki pe ganny komet ozordi i ganny eskize par sa ki'n arive '77. Pese ozordi i ganny efase par lemal '77.

So sa ki pe soufer ozordi li i napa en lasyet manze pou donn son zanfani *it's ok*. Akoz '77 ti ariv Koudeta. Ou, ou kapab lafen ozordi ou, ou zanfani i kapab lafen ozordi ou.

Ou zanfan i kapab ganny vyole son drwa pou *entitle social security* dan sa pei akoz '77 ti ariv Koudeta.

Mon pa kapab rekonsilye zot lozik avek realite ki mon pep pe viv ladan ozordi, mon eskize! Sanmenm sa ou vwar yer mon'n size avek Minis ki *PUC* zot *appeal* avek *ASP* lo *behalf* zot bann kliyan ki'n ganny sa bann gro bil, ki pa kapab peye. Ki zanfan i lafen i zis en senp kestyon en lasyet manze sa. Ki mwan mon pe rode.

Mon pa konnen si zot konpran ouswa si zot nepli konpran sa bann keksoz bann ki ti sanpyon 40poursan lapovrete ki ozordi letan zot in ganny *the seat of power*, zot pe asiz *from a place of power* zot nepli konpran lafen.

Zot nepli konpran douler, zot nepli konpran en zanfan i soufer. I paret mwan ki ler zot in ganny tou sa ki zot, zot ti anvi gannye ozordi konsern e soufrans imen i nepli lo zot azanda. E mwan mon pou koz lo la.

MR SPEAKER

Onorab mon pa pe obzekte avek ou laliny koze. Me selman zis vey letan silvouple. Mersi.

HON JOHAN LOZE

Mersi Mr Speaker mon pa pou sot bann konsiny letan ki ou'n donnen. E mon ava *scale back* en pe.

Sa ki mon anvi dir se ki Onorab Georges i kapab kont lo nou sipor. Nou, nou'n deza dan Gouvernman nou konpran gouvernans. Nou pa pou vin fer bann obzeksyon banal ensinifyan, parey ki'n ganny fer dan lepase letan *Leader of Government Business* i anmenn en Protokol enternasyonal pou ganny ratifye par Lasanble Nasyonal.

I pou annan nou sipor, nou pou travay kot a kot avek li lo sa bann keksoz koumsa, ki nou, nou konsider bon pou pei.

Mon konnen petet mon fason koze i pou ofans serten dimoun i pou ofans dimoun la anndan tel lekel ki deor, be lo en kote pratik nou pou travay avek zot pou fer sa ki bon e sa ki byen pou nou pei.

Sa zot kapab kont lo nou. Akoz nou pa en Lopozisyon destriktif nou. Nou koz pou nou pep be nou fer sa ki bon e nou fer sa ki byen pou nou pei.

Mr Speaker mon tann *Chief Whip* lo kote Gouvernman pe foud dezord zis parey Deputy Speaker boner ti pe foud dezord. I paret mwan napa en lord dan sa landrwa.

MR SPEAKER

Onorab Loze prosede silvouple.

HON JOHAN LOZE

Mr Speaker an terminan, i annan zis en keksoz ki mon oule dir e la mon demann en leskiz be mon bezwen eksprim mon dezapwentman.

Sa i premye Mosyon ki nou pran pou dezyenm term sa setyenm Lasanble. Mwan mon'n antre dan Lasanble ekspekte sa i Mosyon sorti kot Onorab Henrie pou met sanksyon lo mwan.

Me la mon bezwen dir kler sa i pa sa Mosyon, mon dezapwente mon konpran parkont kont i posib i annan problemn *drafting* dan Parlman *Australie* laba, sa Mosyon pa ankor pare pou anmennen.

Be selman Mr Speaker mon dezapwentman *has to go on record* ki Onorab Henrie pa ankor anmenn Mosyon pou sanksyonn mwan. Mersi Mr Speaker.

MR SPEAKER

Mersi. Onorab Loizeau.

HON NORBERT LOIZEAU

Bonzour Mr Speaker. Bonzour tou dimoun, tou Manm. Bonzour tou dimoun ki a lekout.

Mr Speaker mersi pou ganny sa pti privez pou mon kapab koz lo sa Protokol ki pe pas devan nou ozordi lo Drwa Zanfan, ki pa ti mon lentansyon ozordi pou koze, me apre mon'n ekout deba mon'n santi konman en paran, konman en zanfan Sesel ki'n ganny kree dan lanmour mon paran, mon santi ki enportan pou mon dir de mo.

Mr Speaker sa size i sitan enportan parey Onorab William in fer sorti lezot tou Manm. Mon pou konmans koumsa ler mon ti pe ekout lentervansyon Onorab Samynadin pli boner. Onorab Samynadin in eksplike ki kwa en zanfan dapre sa Protokol. E i ti dir ki en zanfan i en endividi ki pa ankor ariv laz 18an.

E mwan Mr Speaker mon anvi fer sorti en pwen ki mon panse ki osi aplik pou en zanfan ki vedir en zanfan.

Mwan mon krwar en zanfan Mr Speaker en zanfan i en imen, ki ganny kree dan lanmour en fanm avek en zonm. Parey mwan mon ti ganny kree dan lanmour e mon panse ki tou lezot Manm Onorab isi nou ganny kree dan lanmour. Me se pou sa ozordi nou'n vin bann zonm bann fanm for e pe travay dan nou pei.

Mr Speaker legliz i koz lo la, mwan mon en kretyen mon frekant mon lanmes bokou e avek *COVID* in restrikte nou en pti git. Toultan dan lapartaz i koz lo lanmour, zot eksplik dimoun ki en zanfan i bezwen ganny fer dan lanmour. E se pou sa ki bokou legliz pe ankouraz dimoun marye apre zanfan i bezwen ganny fer dan lanmour.

E menm Mr Speaker parkont i annan dimoun ki pa ankor marye ki annan lanmour pou kanmarad ki pe viv byen konman de konpany, e zot in fer zot zanfan dan lanmour. Ozordi Mr Speaker se sa de adilt ki'n fer sa zanfan ki responsab pou sa zanfan.

I annan zanfan ozordi Mr Speaker ki'n ganny kre dan lanmour pe sirmont en ta kalite difikilte dan lavi en ta kalite labi annou pa bliye ki drog i enn bann keksoz ki pe detri bokou nou bann zanfan ki ne dan sa lanmour ki mwan mon pe koz lo la ozordi Mr Speaker.

E bokou bann manman bann paran ozordi pe plere akoz zot in vwar zot zanfan tonm dan sa letap.

Alors Mr Speaker eski i byen pou en manman ki pa en Seselwa i vin Sesel e detri tou sa bann zanfan ki'n ganny kree dan lanmour e ozordi zot

manman pe plere avek drog Mr Speaker.

Eski sa bann zanfan zot napa en manman zot ? Eski sa bann dimoun ki pe fer sa bann aksyon koumsa zis zot ki en manman? Zis zot piti ki en zanfan? Mwan pou mon ki'n ganny trennen dan drog ki pe soufer e ki nou bann lakour ozordi Mr Speaker i deplorab e sa i anmenn lapovrete Onorab Loze ki'n koze atraver sa bann soufrans ki sa bann manman pe gannyen.

Mr Speaker ozordi si nou koz lo lavi nou kapab koz lo bokou keksoz, e boner Onorab Labonte in koz lo en form labi *NYS* mwan mon'n pas *NYS*, e ti annan serten labi Mr Speaker. e sa bann labi ki pe arive lo bann zanfan pa'n ariv la apre ki Prezidan Ramkalawan in vin Prezidan. Mon pa pe akiz personn i la e i la bokou letan avan.

Mr Speaker dan letan *NYS* ti annan labi ki ti arive lo bann zenn fiy. E nou tou nou konnen. Ti annan de moman bann group ki ti ganny anmennen Desnoeufs, pou al anmas dizef zwazo, Mr Speaker.

Ti annan bann form labi ti arive sa letan. Pa zis dizef zwazo ki ti ganny anmase laba, Mr Speaker, mon pa pou dir kwa, me selman tousala ti bann

form labi ki'n arive alors nou pa kapab blanm personn blanm okenn Gouvernman. Problemn i reel dan nou pei. Nou ava tap li ansanm. Annou pa montre ledwa ki sa ti fer sa, sa ti fer sa i nou pei Mr Speaker.

I nou zanfan ki pe soufer. E nou Gouvernman Mr Speaker dirize par Prezidan Ramkalawan in met en pwen for toultan, ki dan nou pei nou tou nou bezwen pran nou responsabilite konman en Gouvernman. Mr Speaker mon krwar sa i enportan ki i arive.

Nou pa kapab Mr Speaker, Mr Speaker mon konnen petet mon pa pe tro lo sa Konvansyon ki nou pe koz lo la. Me vi ki annan keksoz pou fer ek zanfan i enportan ki nou koz en pe an zeneral pou ki tou lezot dimoun, bann abizer deor zot pa konn Protokol zot.

Me selman omwen zot ava tir en keksoz ki pe ganny sorti la konsernan sa Protokol lo zanfan Mr Speaker.

Souvandfwa i annan bann dimoun ki pe abiz sa bann zanfan zot pe fer sa akoz zot, zot in deza ganny abize. Eski i byen si mwan mon'n ganny abize alors mon pou vini mon pou abiz zanfan Onorab Loze?

Mr Speaker akoz Onorab Loze pa dan menm parti ek mwan, non. Pou mwan sa i mal

e sa se bann keksoz ki mon krwar nou bezwen edik nou bann dimoun lo la. Ozordi i annan paran ki pa reve si i annan zanfan, Mr Speaker

E sa pa pe fek arive la, i annan *des annes* sa pe arive. Vilaz Prezidan i plen, i plen avek bann zanfan ki zis ganny fer san lanmour.

Mwan mon krwar nou merit kapab edik nou pep, pou ki demen nou vin en pei ki pli meyer kot i annan bann zanfan ki pe grandi ek zot paran. Mon pa parfe me pou mwan pe grandi ek mon Mr Speaker.

Ozordi Mr Speaker tou dimoun pe koz lo sa lensidan ki'n arive lo rezo sosyal. Mwan mon pa'n gete, konman in ariv lo mon telefonn mon'n *delete*, akoz mon pa gete Mr Speaker.

Me ki nou'n vwar dan Nouvel parey Onorab Loze in koz lo la mon donn li rezon mwan, eski sa i zis sa ka ki annan Sesel. Ozordi avek sityasyon lo *social media* Sosyal i lo televizyon, pe eksplike, be si ti napa sa ka nou ti pou vwar lo televizyon sa bann keksoz? Sa *video* i bon san bon.

Mon konnen i afekte lavenir de manrmay sa de zenn. Me selman pou nou bann la lorganizasyon laba deor Mr Speaker pou zot pa esper dan

en ka arive pou nou tyonbo dir la nou pe fer sa. Nou bezwen travay nou dir akoz mon asire Mr Speaker sa enn ki nou'n vwar i annan bann ki nou pa ankor vwar mon asir ou i annan ki pa'n filme me nou pa'n vwar e sa group manrmay zot, zot pe pler dan silans.

E dan bann lekol Mr Speaker, i annan lekol segonder primer en ta keksoz i arive.

Semenn pase, en mis kot Mont Fleuri Segonder i *call* mwan i dir mwan Mr Loizeau tyek telefonn ou de zanfan si napa bann *video porn*, akoz i annan bann group zanfan ki pe fer bann group e zot pe distribye sa bann *video*.

En Mis lekol mon pa pou nonm son non. Lekol Mont Fleuri. Mon pa konn li. I posib ki mon konn li. Solman mon pa konnen si li. E nou ki nou'n fer Mr Speaker? E mwan mon zanfan zot al lo *WhatsApp* zis ler pe fer leson apre telefonn i ganny anmase. Akoz nou konnen i annan tou sa sityasyon pe arive .

E la mon anvi dir ek tou sa bann paran ki deor vey zot zanfan. Pa zis akoz ledikasyon ozordi pe fer leson *online* ki zot krwar zanfan pe servi sa platform pou zot fer sa bann keksoz.

Lontan sa pe arive. Avan Ledikasyon i anvoy leson *online* i annan keksoz ki pe arive. I annan pornografi Mr Speaker, an *cartoon* Mr Speaker ki pe ganny servi an still *cartoon* epi ou al lo profon i vin vre devan ou! I annan sa pe arive.

E zanfan zot menm pe sirkil sa. Kwa ki fer zanfan sirkil sa? Akoz nou bann paran pa pe pran zot responsabilite. Paran i bezwen konnen ki son zanfan i fer.

Mr Speaker mwan letan mon pti garson i vini i overdose be pa i pou al montre mwan kot in al aste son drog? E sa boug ki'n vann li sa drog pa i pou vwar mon vilen figir taler ou?

Me lezot paran non, Mr Speaker. Lezot paran non. Dernyen fwa mon garson ti vin kot mon ti pran lisyen ti pas obor son sak. Me tousala i montre ou – I byen zot pe fer lafouy me selman parfwa i annan bann zanfan ki ganny afekte atraver bann lafouy ki fer kot bann lekol. Zot, zot pa fer nanryen dan drog me solman zot pe ganny kriye.

NDEA pe foy dan zot sak. Me zot santi zot imilye e i ti vini i ti vin akont mwan. I dir mwan "papa me mon pa konnen ki pe arive, Bannla in vin foy dan mon sak lisyen i

vini. Tousala i bann keksoz, i annan fason fer. Si nou vin foy dan sak en zanfan akoz i afekte li. En zanfan ki li son paran i dan drog i konn sa, pou li pa nanryen i dir ar mon so *NDEA* in vin foy dan mon sak. Me pou en zanfan ki pa ladan, ki pa konn nanryen, i afekte li ler sa i ariv dan laklas.

Mr Speaker, mon konnen ou pe al dir mwan mon letan in fini. Mon en paran. Mon konnen mon pa'n tous lo sa Konvansyon, mon'n plito al an deor Konvansyon. Me mon topik in plis lo zanfan e bann aktyalite ki'n arive.

Mr Speaker mon en paran mon pa ti a kontan sa ki'n arive avek sa de zanfan petet ti ariv lo mwan. Ozordi ni menm dan Lasanble mon pa ti pou vini akoz mon ti pou onte. Menm si pa mwan ki ti pe fer sa i mon zanfan. Mon ti pou onte.

Alors Mr Speaker i enportan ki la ki nou pe ratifye sa bann Konvansyon annou pa zis ratifye li apre pran li met lo en *shelf* laba, bann lazans responsab zis i dormi apre ler ka i *pop-up* enn fwa letan, i vin *news* lo televizyon pou I mwan 2 mwan apre i remor ankor.

Mr Speaker setou ki mon ti annan pou dir e mon remerci ou. Mersi.

(APPLAUSE)

MR SPEAKER

Mersi Onorab. Onorab Pillay.

HON SEBASTIEN PILLAY

Mersi Mr Speaker. Bonzour Mr Speaker. Bonzour tou koleg onorab e bonzour tou dimoun ki a lekout.

Mr Speaker nou'n annan en deba tre enteresan lo sa Konvansyon. E mon asire ki annan lopinyon divers dan nou Lasanble ozordi lo si deba ti devret al dan sa bann direksyon oubyen non.

Me sa ki mwan mon rapel i se ki ler nou, nou bezwen debat en Konvansyon oubyen en Protokol e aprouv li konman Lasanble i enportan nou regard tou laspe sa size ki vin devan nou, zisteman pou nou fer zis sa size.

Me pou osi asire ki lasosyete nou popilasyon i konpran akoz nou bezwen koz lo sa bann keksoz, pou fer ki nou rod pa zis solisyon, me nou rod bann fason pou anpes okenn dan sa konteks okenn labi arive, avan ki nou bezwen al fer komunikasyon atraver sa Protokol, parey i pe fer provizyon pou ki i annan.

Si i annan en keksoz mon krwar ki mon bezwen dir

bomaten *from* sa kote latab, se ki mon santi poudir lo lot kote latab, zot in krwar poudir lafason ki serten Manm lo lot kote latab in koze, i en latak an ver zot Gouvernman.

Sert i nou rol koman politisyen pou nou fer serten size vin devan piblik e koz lo sa bann size aköz i neserer pou nou si oule. anglob sa ki serten a ki popilasyon sa ki dimoun pe dir nou.

E mon krwar i relevan pou nou ozordi konsider sa bann laköz bann sityasyon ki anmenn nou ver labi. Entervenans ki'n koz avan in koz lo sityasyon drog, rol ki drog i zwe ver anmenn labi.

Lo sa kote latab nou'n osi koz lo sityasyon finansyel, lo sityasyon sosyoekonomik bann fanmir ki fer ki sa osi i ede pou kree bann kondisyon sosyal ki anmenn labi. ki anmenn serten konportman ki al ver labi.

E ki fer ki en paran petet kan i ti ava swete pou li la pe *monitor* son zanfan, kan i ti ava swete pou li la pou li regarde ki sob zanfan pe fer i bezwen al fer en louvraz oubyen de louvraz, pou li kapab zwenn son bann bezwen lemwan aköz i bezwen sonn sa zanfan sonny sa lot zanfan.

E mon krwar i relevan pou nou i relevan pou nou. I relevan

pou nou koz lo la koz lo la aköz tou sa bann keksoz i ed nou anvlop oubyen si oule anglob lafason ki nou pou *tackle* sa sityasyon sa size devan nou ozordi.

Nou pa kapab azir konman ipokrit konman en Lasanble e zis vini koz lo en Konvansyon ki nou tou nou agree. Napa okenn dout dan sa Lasanble ki nou tou nou agree, ki nou pou vot an faver sa Mosyon ki *Leader Zafer* Gouvernman in anmennen.

Me lefe i reste ki nou osi bezwen admet. Konman Manm Lasanble k ii annan plizyer size plizyer keksoz ki nou bezwen met devan.

Yer menm nou'n vwar kestyon sorti lo zot kote latab an relasyon avek bann *bill PUC*. I pa nou ki'n anmenn sa kestyon i zot kote latab ki'n anmenn sa kestyon. Malgre ki mwan personelman mon'n *raise* sa size avek Speaker Lasanble Nasyonal e menm avek Minister Finans ler zot ti dan Lasanble pandan letan Bidze.

I annan en rezon aköz nou *raise* sa bann size nou *raise* sa bann size aköz nou bann sitwayen nou bann *constituents* i vin kot nou, zot prezant avek nou en *bill* 4 mil menm 6mil R3mil ki zot pa kapab peye, e ki

zot bezwen *at the same time* soutenir zot fanmir eski nou pa pou koz lo la, eski nou pa pou dir nanryen lo la?

Eski i pou *ok* pou nou les sa pase? Eski i annan okenn Manm Lasanble la anndan ki kapab dir ek mwan senserman ki zot bann *constituents* pa'n *text* zot, pa'n *WhatsApp* zot, pa'n dir zot poudir mon'n *apply welfare* mon ankor pe esper larepons mon pa'n gannyen, mon'n perdi mon louvraz mon'n ganny fer *redundant*. Eski i annan mon pa krwar okenn antre zot pou dir mwan non.

Zot konn tre byen ki mon pe koz lo la. E atraver ou Mr Speaker Onorab Labonte, Onorab Vidot i pa'n gat sa Mosyon.

Onorab Vidot in ede anmenn en size devan ki petet ozordi kot ou asize ou pa santi ou konfidan oubyen ou pa santi ou lib pou anmennen aköz zisteman ou krwar petet sa i pou atak Gouvernman.

Me ou lwayote avan tou i pa *towards* ou Gouvernman. Ou lwayote i bezwen anver bann dimoun ki'n elekte ou pou met ou dan Lasanble l

Whether ou en Manm Proporsyonnel ou en Manm *directly elected*, se dimoun ki'n met nou dan en Lasanble pou nou fer nou travay.

E nou travay se fer sir ki nou anmenn sa bann konsern a laporte lotorite konsernen pou li pran aksyon lo la.

I annan en Mosyon lo *Order Paper* ki Onorab Georges in mete an relasyon avek sityasyon tapaz. I pou annan size ki pou sorti ki pou anbaras zot Gouvernman. Me Onorab Georges in bezwen anmenn sa Mosyon. aköz son bann *constituents* aköz i santi poudir i annan en nesosite pou koz lo sa size.

E zisteman se sa ki nou bezwen fer konman en Lasanble. Nou bezwen aksepte poudir i annan en keksoz ki nou pou bezwen fer an relasyon avek sityasyon sosyoekonomik ki dimoun pe pas ladan. E sa i relevan aköz nou tou nou konnen nou pei pe pas moman difisil ekonomikman, e i nesese pou nou kapab siport bann ki pli vilnerab pou ki sa bann sityasyon labi i pa ogmante. Se sa k nou bezwen rode konman en Lasanble.

Me mon krwar lo lot kote zot en pti pe tro vit pou zot mord sa labwet e mord sa lanmson e al ver politik olye regard size fas ki devan nou.

Annou pran par egzantp sityasyon ki pe arive permet mwan Mr Speaker, sityasyon ki pe arive kot serten anlwayer

serten anplwayer pe met dimoun deor akoz zot in teste pozitiv pou COVID.

God forbid ozordi en travayer ki lo probasyon i al teste pozitiv pou COVID i annan serten anplwayer ki servi sa konman en leskiz pou met sa dimoun deor.

E i annan ka ki'n ganny raporte avek mwan, e mon asire lezot Manm in ganny serten ka kot serten anplwayer i fer bradfor avek serten dimoun.

Mon konpran petet i ava annan en largiman deryer sa. Me nou bezwen osi realize poudir sityasyon ki nou ladan i fer ki nou bezwen koz lo ki nou bezwen fer pou nou anpese. Dan en moman kot nou lize in troun ver sa sityasyon atraver bann revelasyon resan, annou profite pou nou kapab fer tou sa ki nou kapab fer pou nou *deal* avek. E se sa ki nou bezwen rode.

Mon krwar sa ki nou bezwen mazine Mr Speaker se ki annou pran sa sityasyon kot nou bezwen raport en labi. Me annou pran par egzanp en manman ki'n ganny fer *redundant* dan son travay, mon konn en madanm La Gogue ki'n ganny *redundant* son travay i annan 3 zanfan son 3 zanfan i al dan en lekol Gouvernman, akoz nou en sistenm ledikasyon

ki *provide* ledikasyon pou gratwit pou Seselwa, pou nou sitwayen.

E sa manman i ganny li en *bill* R2500 o moman ki'n ganny fer *redundant*. Son msye i travay li me zot pe pey en *loan* avek *Housing*. I pa en fanmir kase. I pa en fanmir ki dan drog i en fanmir ki pe *struggle* ki anvi fer de bout zwenn me ki dan en sityasyon difisil.

So ki arive manman i bezwen pan louvraz ankor an plis e sa bann zanfan i reste *unsupervised*. Akoz pa tou fanmir ki sanse pou annan en *extended family unit* kot ou ava annan tonton, tantin, granmanman, granpapa ki a kapab vey ou zanfan.

I annan i bezwen kit son zanfan kot en vwazen akoz i bezwen al travay. So i annan en realite ki nou, nou bezwen fer fas avek e sa ki nou, nou ti pe sey sa ki nou pe sey anmennen se ki nou pe dir ek Gouvernman ki serten desizyon nou pa pe atak personn.

A okenn moman nou'n nonm okenn zofisye Gouvernman menm Prezidan Larepublik dan okenn lentervansyon. Sa ki nou pe dir se ki serten desizyon ki pe ganny pran i annan en lenpak sosyal e ki Gouvernman i bezwen regard sa bann

desizyon en pe pli pre. I bezwen revwar serten sa bann desizyon si i kapab revwar.

Me osi i enportan parey Onorab Cosgrow in dir retir serten birokrasi pou permet lasistans atraver bann ki pli bezwen, bann ki pli vilnerab zisteman pou ki zot pa nou pa tonm dan bann sityasyon, kot nou kapab kree plis difikilte sosyal pou dimoun.

Se sa ki nou pe rode. E mon krwar sa ki nou bezwen admet nou osi, nou tou nou pou admet sa se ki karakter imen i fer ki nou tou nou konport nou dan diferan fason.

Souvandfwa ou pou vwar en dimoun pe fer en keksoz e ou pou demann ou lekora kwa ki pas dan lespri sa dimoun pou fer sa.

Kestyon ki mon pe demann mon lekora depi sa bann dernyen zour depi ler monn vwar sa *video* se kwa ki'n pas dan lespri sa enn ki pe filme sa *video*?

Kwa ki fer li annan en lanvi pou pran sa *video* pou filmen? Kwa ki fer l annan en lanvi pou met sa de ki pli zenn ki pli vilnerab ki li dan sa pozisyon pou li fer sa? Eski lafason ki'n ganny elve, mon asire son paran pa'n kapab ganny elve koumsa.

Mon refize pou krwar son paran in ganny elve koumsa. Mon refize pou krwar li menm li in ganny elve koumsa. Me parfwa mon refi i kapab aköz petet mon pa konn tou keksoz ki pe pase la deor.

E se sa ki fer ki'n ou pa kapab pran serten size kasyet deryer en vwal e pa koz lo la. Se sa ki egzize ki nou, nou bezwen koz lo tou size zisteman pou nou kapab raport en solisyon pou nou, nou kapab raport nou sipor konman enn bann lebra enportan gouvènan nou pei.

E sa i nou rol konman Manm Lasanble Nasyonal i nou rol konman Manm Parlman pou nou koz lo sa bann size e ede pou nou kapab rod pa zis solisyon, me fer sir ki nou protez bann ki bezwen ganny proteze

I annan sa size sa manman ki'n ganny deporte ki'n souleve, mwan mon pa konnen si sa dimoun i dan drog oubyen non. Sa ki mwan mon bezwen dir se ki de mal pa pou fer en byen. Zanmen de mal pou fer en byen. Si en keksoz i mal pa aköz nou fer keksoz mal ou al ek sa dimoun ki pou fer larestan keksoz vin byen.

Sa ki nou, nou bezwen realize konman en pei se ki sak desizyon ki nou fer, sak aksyon ki nou fer i annan en lenpak

sosyal lo dimoun. I annan en lenpak sosyal lo sak endividi. Konman en paran mon viv avek gran lenkyetid toulezour. Akoz toulezour mon le konnen ki mon bann zanfan pe fer.

Mon pa dir mon parfe e mon p krwar i annan en paran ki parfe ki konn tou keksoz ki pe pase ek son zanfan.

E fodre pa krwar ki ozordi akoz ou zanfan i al lekol Endependan, akoz ou zanfan i al lekol *International*, akoz ou zanfan i al lekol *Française* sa bann keksoz pa pe arive dan sa bann landrwa.

Fodre nou pa krwar ki ozordi sa bann keksoz i ariv zis dan lekol Gouvernman, akoz sa ki bann dimoun ki zot zanfan i dan lekol Gouvernman lafason ki zot in *ganny brought up*. Mwan mon zanfan i al dan lekol Gouvernman e mon asire plizyer Manm dan sa Lasanble zot zanfan i al lekol Gouvernman. Napa naryen mal ek lekol Gouvernman.

Sa ki relevan e enportan pou nou se eski avek tou sa ki nou annan pou nou fer konman n sosyete parfwa avek tou sa ki nou annan pou fer endividi sakenn antre nou pe regard ver karyer sakenn antre nou pe regard ver nou travay. Eski nou pe reelman donn letan nou bann zanfan?

Eski nou pe reelman fer sa letan pou nou dir ki nou konnen ki nou zanfan pe fer? Sa i en kestyon fondamantal ki nou bezwen reponn.

Akoz si nou, nou pa kapab donn sa letan e koman en sosyete nou pa pare e mon krwar ti annan en Manm dan sa Lasanble ki ti dir kot ou, ou bezwen regard zanfan ou vwazen ou bezwen regard en zanfan dan ou sosyete dan ou kominote.

Avantyer menm mon vwar 3 zanfan i desann anba kot en vwazen zot vwar lisyen sa vwazen zot sikannen zot taye. 3 gran garson. E yer menm mon'n zwenn avek enn mon demann li mon dir be akfer ou fer sa kalite keksoz, pou ki rezon ou bezwen fer sa? Konmsi sa i nou pe rode se ki nou pe rode, ki kalite *talk process* ki kalite lespri ki fer ou sa zenn parfwa ki annan 16an - e la mon pou koz pou sa group zenn 16an, 17an 18an pou deside pou en tel aksyon.

Ou demann ou paran pou ou al lo lans me dan plas al lo lans kot ou sipoze ale ou i *end up* dan en lot landrwa avek 3 lezot dalon. O normal nou tou nou'n zenn. Nou tou nou'n *disregard the rules at one point in time*. Me sa ki ti annan en lavantaz dan lepase, se ki par egzantp dan kominote mwan

mon rapel kot mon ti pe grandi Glacis si mon sorti lekòl, mon pe zoure mon rapel byen ti annan en tantin en madanm ki ti reste obor lanmer, nou dir li tann Nanni si tann nou pe zoure, tann Nanni pou bat nou. i pou koriz ou.

Si in vwar nou al bor lanmer i pou demann nou zot in demann zot manman pou al bor lanmer, zot in demann zot papa pou al bor lanmer.

Konmsi (Onorab Gervais Henrie silvouple?)

MR SPEAKER

Kontinyen silvouple. Onorab Pillay silvouple kontinyen.

HON SEBASTIEN PILLAY

Mersi Mr Speaker, *sorry* pou sa lenteripsyon. Sa ki mon krwar nou bezwen aksepté se ki *obviously* nou bezwen tous serten size akòz konman en *MNA* nou konnen poudir, nou dimoun in vin kot nou, nou dimoun pe santi, serten lefe sosyoekonomik, serten desizyon.

Mon konnen i difisil pou nou admet menm si ou lo kote Gouvènman, ou pou ou dir sa bann keksoz i ou bezwen revwar serten desizyon, e ou pou vwar plizyer zot anmenn plizyer kestyon ki al dan sa laliny.

Annou aksepté poudir nou bezwen revwar serten keksoz ki pe ganny pran, kot nou pa kapab *afford* pou annan dimoun ki pe ganny fer *redundant* ki pa kapab sonny son fanmir.

Kot ou pa kapab *afford* konman en sosyete pou nou pa pe regard pa pe met en vre lizye lo sa ki pe pase avek nou zanfan avek nou bann zenn.

Akòz karakter imen i ganny en kantite par son lanvironnman osi konmela i baze lo son abilite materyel pou li *provide* pou son fanmir.

Me en keksoz osi ki reste enportan mon ti lir en *posting* lo rezo sosyal anvoye par en group *Community Crime Watch*, en pos ki zot in koz seryezman lo lapros legal ki ganny pran. Atraver konsekans bann aksyon.

E sa ki nou pa'n fer konman Lasanble depi bomaten, se ki nou tou nou'n koz lo lakoz nou'n koz lo aksyon li menm me nou pa'n koz lo konsekans. Mon pa le pran plis letan ki sa Mr Speaker. mon realize poudir ou pe regard ler.

Me sa ki enportan Mr Speaker pou nou dir konman en Lasanble mon krwar mon pou angaze konman Speaker Lasanble osi *as well* dan sa demars se pou nou koz ek

Gouvernman, pou nou regard bann stati legal ki egziste *framework* legal, ki egziste pou nou kapab anmenn konsekans pou sa bann aksyon.

E souvandfwa bann *perpetrators* ki anba laz i bezwen ganny trete zisteman koman sa e mon konnen in annan *Court*, me eski in annan sa lenpak ki i devret annan pou nou kapab aport en solisyon? Akoz en kantite form labi i ariv atraver swa *bullying* ouswa atraver *peer pressure*. Ki enn ki pli gran i met lo sa ki pli zenn pou li kapab fe serten aksyon.

E nou, nou bezwen kapab a en moman donner pran aksyon, anmenn konsekans. Sa aksyon ek sa enn ki pli gran in pran pou ki i *deter* lezot apre pou zot santi poudir e si mon fer sa vwala konsekans mon aksyon.

E mon krwar sa i en keksoz ki nou bezwen fer. Onorab Loizeau in koz lo en *search* ki ganny fer dan en lekòl, zisteman en zanfan dan en lekòl kot *NDEA* i bezwen fer *search* ladan.

En lekòl i bezwen en landrwa ki *safe* pou en zanfan. Me si lekòl in nobou tyonbo sa enn, enn fwa i pa kapab sa enn pe retourn lekòl apre. I bezwen en *deterrent* i ganny anvoye ver

sa enn ki'n fer sa aksyon poudir li ou pa pou fer l ankor.

Akoz nou tou ki la anndan ler nou zanfan pe al lekòl nou espekte poudir ler nou, nou pe travay pou larestan Seselwa nou zanfan i *safe*. Personn pa pe pran li dan son lespri pou al nwir pou al nwir sekirite oubyen *safety* okenn zanfan okenn lezot dimoun.

La mon lans en lapel avek tou Seselwa, tou Seselwa depi ozordi annou pran li konman en langazman. Mon konnen nou tou nou pe pas atraver bann moman difisil. Nou'n fer le pwen avek Gouvernman e nou swete Gouvernman i ekout le pwen vizavi sityasyon ekonomik - sosyoekonomik.

Me i osi annan en keksoz pou fer avek nou menm nou Seselwa nou karakter personnel. Nou abilite pou nou kapab pran en desizyon e regard sa ki pe pase otour nou.

Annou fer li en *must* ki nou regard sa zenerasyon ki pe grandi, e fer sir nou sey gid zot dan bon semen.

Annou fer sir ki poudir si nou vwar bann zenn dan bann moman kot zot pa sipoze ete, annou rod fason swa pou konsey zot e ki ozordi mon konnen parfwa ler en dimoun ou pe al sey konsey zot pou le lager zot pou le bat ou. Me nou

bezwen rod fason pou *deal* ek sa.

Nou pa kapab annan en sityasyon kot i *ok* pou enn asize filmen aksyon endesan aksyon ki pa devret filmen. Mon pa pe koz lo zis sa enn, me i annan lezot.

Mon krwar Mr Speaker, mwan senserman mon pou donn mon sipor sa Mosyon. Mon pou donn mon sipor okenn Mosyon pe enport ki kote latab ki anmenn li;- pe enport ki endividi ki anmenn li dan sa Lasanble ki koz lo ver asire ki nou zanfan ki pe grandi i an sekirite.

Akoz mo bi dan sa Lasanble malgre tou mon defo, se fer sir mon kit ozordi pli byen ki mon ti zwenn li yer e mon kit demen pli byen ki ozordi pou mon zanfan. Mersi Mr Speaker.

MR SPEAKER

Mersi Onorab Pillay.

(APPLAUSE)

MR SPEAKER

Onorab Arissol.

HON SANDY ARISSOL

Mersi Mr Speaker. Mon ti a kontan ou debi menm letan nou konmanse, nou ganny keksoz kler dan Lasanble Nasyonal. i enportan pou Onorab Pillay

letan i koze Mr Speaker, i koz pou son bann *SPPF* an relasyon ek zot kestyon, an relasyon ek zot Mosyon ki kalite diskisyon zot pou anmennen, me pa get nou lo nou kote. Nou, nou, *LDS*. Nou, nou *deal* nou prop *deal* zot *deal* zot *deal* laba lo zot kote!

(APPLAUSE)

HON SANDY ARISSOL

Si Andy Labonte in kontan pou anmenn tel kestyon koz lo tel size, sa i Andy Labonte. E pa bliye Mr Speaker lo kote *PUC* Onorab Regina Esparon ti fer li son devwar, apre nou tou nou ti tann en leokri pou anmenn en kestyon dan Lasanble pou nou ganny serten leklersisman. Sa i premye pwen.

Dezyenm pwen mon kontan letan zot kontinyen bat sa tanbour ‘zanfan pe tonbe’, ‘zanfan pa pe ganny manze’, ‘zanfan pe mor lafen’. I enportan Mr Speaker pou nou *remind* bann *US* zot in promet goute 10er bann zanfan zot. Zot premye goute zot ti donn 750 *juice* avek mil dipen. Zot deza dwa *juice*, e zot deza dwa ankor de goute.

Pran zot responsabilite donn zot goute epi zot a vin montre nou ledwa lo nou kote

latab. *Ok?* Sa i mon dezyenm pwen.

Mon trwazyenm pwen ki mon ti a kontan klersi Mr Speaker, i an relasyon letan Onorab Loze i dir poudir ozordi zot annan en Lopozisyon serye, zot drwa. Mon riye mwan. Mon riye.

Ou konnen akoz mon riye Mr Speaker, parske ozordi dan mon lanmen mon annan en liv la, ki apel "Rapor Oditer Zeneral" lo en bann bout later ki zot konman Parti *US* zot ti vole, letan zot ti dan Gouvernman.

Savedir Mr Speaker nou kapab apel zot ozordi Parti *US* en bann voler akoz rapor i la. Mon met la.

Dezyenm legzanp mon ti a kontan donn zot akoz mon riye M Speaker se, Onorab William ki asiz la devan nou kapab apel zot ozordi bann atoufer. Ou konnen akoz nou kapab apel zot bann atoufer Mr Speaker, parske zot ti pe fors Onorab William atraver en lafnet, letan i pa ti dakor ek zot Polisi zot ti pou zet li par deor, parske i ti'n vwar poudir zot in *fail!*

Trwazyenmman ou konnen ki mannyer nou kapab apel zot Mr Speaker lot kote bann *US* bann kriminel! Ou konnen akoz nou kapab apel zot bann kriminel, ozordi nou

annan en Komite ki la letan nou pe koze zot, zot lo televizyon lo *SBC 3, SBC 3*. Ou konnen akoz pe repas lo bann keksoz ki zot konman *US* zot ti fer ler zot ti o pouvwar.

Dimoun i ankor pe gele, dimoun ankor pe kriy lasasen, e se nou lo kote *LDS* ki ti anmennen pou ki sa boubou i geri. E ozordi zot, zot napa okenn dignite pou vini montre nou ledwa lo ki fason pou fer ki pou dir. Zisteman get obor zot get kwa ki fodre anmase anmase, kasyet li ferm li en landrwa. Epi nou, nou ava dir zot kan pou tire. Mon fini avek sa la.

Prezan Mr Speaker mon pran Protokol. Ou konnen trete Protokol Konvansyon pe koz lo zanfana. E nou tou la konman paran konman papa konman manman nou pa pou kapab dir de mo lo la.

Ou konnen kwa ki fer mon mazine ler mon koz lo Protokol konman en zanfana? Ler mwan mon ti ptipti Mr Speaker. Ou konnen kot mon ti reste, mon ti reste Belonie, lo later Clement Confait ki'n Nancy ek Jean-Baptiste ti aste.

Lo later Clement Confait ti annan en zoli larivyer, ki ti desann de kote semen. Enn ti desann kot *Spectra Design* ozordi lot larivyer ti desann kot

laboutik Fred ki Stephen Banane in fer ozordi in fer vin en pti *snack shop* pou nou aste en goute.

Ou konnen ki nou ti fer konman bann pti garson nou, nou ti al larivyer. Larivyer ou konnen ki nou ti al rode, bann *tadpoles*, apre nou ti atrap bann grenwir.

Ou konnen ki nou ti fer ek bann grenwir, ler nou ti atrap li dan nou lanmen la i ti sape i ti ale '*voup*' e zot konnen letan i sorti ki manner i kriye. Ki manner i kriye? Vwala.

Mon konmans mon lentervansyon koumsa Mr Speaker, parske tou zanfan Sesel ler i vin en adilt, i bezwen annan en bout dan son lavi ki koz lo la ki ti gou pou li. I annan nou ki ti kontan al larivyer, i annan ki ti kontan al kas gouyav, i annan ki kontan bennyen bor lanmer, i annan ki ti kontan al zwe ek sepa lekel, manman, papa.

I annan ki ti kontan reste kot son manman. I annan ki ti kontan aprann koud. Nou, nou pe koz lo bann zanfan e plizyer nou sakenn in fer dan son fason.

Sa ki Onorab Georges pe demande ozordi mon krwar i enportan pou Onorab Georges letan ou pe koze pou eksplik dimoun letan ou fini koze kwa

ki nou pe koze. Parske plizyer paran laba deor ler ou koz drwa zanfan i sot anler, la ki Lasanble pe al anmennen ankor la pou al fou lo nou ledo sa drwa zanfan la. Akoz i dir sa?

Parske letan drwa zanfan ti ganny entrodwir, i ti ganny entrodwir en pe vitman e tou dimoun ti tay avek dan diferan fason.

Alor paran ti vwar poudir dan en kote i en dezavantaz pou li ozordi get bann zanfan, zot in ganny zot drwa, zot ki fer malelve, zot ki bat nou, zot ki antre tar, zot ki perdi tou le semenn ou tann pe kriye lo radyo, raporte kot Kordgard pli pre, oubyen si ou'n vwar li pas silvouple pran kontak avek son paran.

Selman mwan mon toultan dir zot e mon dir ankor i annan en bout mesaz ki toultan dir dapre sa lanons. I en lofans pou *harbour* okenn zanfan anba laz silvouple. Me kestyon ki mon pe demande ankor lo la, lekel ki pran aksyon letan Sandy Arissol in tournen apre 14 zour? Lekel ki al rode kote in ale, kot i ti ete li? Lekel ki ti pe *harbour* li?

Me parey Onorab Loizeau i dir nou annan en kantite lazans ki monte ki fer sa bann komanter. Nou annan en

kantite lazans ki vin devan lo medya donn gran *interview*.

Be ler Sandy i tournen apre 14 zour li lekel ki rode kote Sandy ti ete, lekel ki ti pe *harbour* li pou 14 zour, i en zanfan anba laz li. Personn pa al dan sa bout.

Mont lo televizyon Sandy in tournen. I sen e sof i ankor dan son semiz en pe ble avek son kravats zonn i la i *ok*. I pa'n ganny nanryen.

E lanons i fini la. Savedir nou bezwen eksplik Onorab Georges ek bann paran poudir sa ki nou pe fer ozordi i pa neserman nou pe donn zot zanfan en lot *AK407* pou *shoot* zot. Non!

Sa ki nou pe fer se, ozordi dan sa *monde* kot nou pe viv, nou bezwen servi tou mwayen pou protez nou bann zanfan;- konpare avek letan nou, nou ti viv kot nou ti kapab al dan pye gouyav, al dan larivyèr akòz dimoun sa letan, pa ti pe get nou ave menm lizye ki zot get nou zanfan ozordi.

Alor mon krwar i pou enportan Onorab Georges fer sa pwen kler, pou ki bann paran konnen poudir, nou pa pe met en lot fardo lo zot atraver donn plis drwa bann zanfan. Sa i mon premye pwen Mr Speaker.

Mon dezyenm pwen lo sa Protokòl se pou nou dir ek bann

zenn fiy ek bann zenn garson, ler zot konmans lekol zot konmans gran, zot konmans devlope, pa zis mazin fer zanfan. I annan en sanson ki dir Jani i sante la i drwat devan. "Pran letan pou grandi. "

Bann zanfan nou bezwen pran letan pou nou grandi, pou nou kapab vin paran. Ou pa kapab espekte fer en zanfan, fer de zanfan fer trwa zanfan epi espekte tap laport *MNA*, tap laport Sosyal, tap laport tou lazans.

Non! Nou pa kapab kontinyen en kiltir koumsa Mr Speaker. Nou konman bann Lezislater nou bezwen edik nou zenn;- edik nou bann dimoun poudir nou bezwen pran nou responsabilite. Aprann grandi, en bon ledikasyon *then* ou konmans konstri pou ou kapab fer 3, ou kapab fer ou mil zanfan si oule, selman ou annan en pti labri pou li, ou travay, ou kapab okip ou lekor.

Ou pa kapab annan en zanfan ek Sandy, en zanfan ek Onorab Loizeau, en zanfan ek Onorab Henrie, apre tap tou laport! Sa i en kiltir ki nou, nou bezwen arete mon bann zanmi. Nou pa kapab kontinyen promot sa kiltir.

Apre nou vin dan Lasanble nou dir sa paran pe plennyen. Sa paran pe al dan tou

direksyon, sa paran i al kot Sosyal. Wi zanfan pe mor lafen p ganny manze parey zot kontinyen dir nou.

Nou konman bann Lezislater nou bezwen sanz nou *mindset*. Gouvernman in sanze i annan en nouvo fason fer, nou osi nou bezwen diriz nou dimoun ver sa nouvo fason fer! Sa bann zafer zis tap laport ganny tou sa ki nou anvi in fini son letan!

Nou pou bezwen leve debourye e sanz nou zanfan. Me parkont parey nou'n vote dan Bidze, i pou annan enn oubyen de dimoun dan nou distrik wi i pou bezwen lasistans. Nou pou kontinyen asiste, akoz nou tou ki la lo sa kote latab nou'n vot en Bidze pou asiste nou dimoun. Zot pa ti vote zot. Selman zot pe rod lasyet manze, *ok?*

Alor Mr Speaker mwan mon pe dir i enportan pou nou edik nou zenn, responsabilite, leve, travay debourye. Pa mazin zis fer zanfan apre tay partou.

Mon trwazyenm e mon dernyen pwen Mr Speaker, se annou konman bann paran aret ekspoz nou zanfan. Nou vwar lo rezo sosyal, nou zanfan pe ganny tir portre pe ganny anvoy partou.

E ler ou *friend* avek Onorab Aglae ki reste '*kles-klas-*

pus-fish' laba ou portre osi i ariv laba dan sa pei.

Letan nou ekspoz nou zanfan lo lans dan son pti bikini nou tir portre nou anvoy partou. Letan nou pe tir portre dan nou lakaz kote nou salon i été ki grander nou laport i pase, nou met sa lo rezo sosyal nou, dimoun i gete.

Tou kalite dimoun lo rezo sosyal ozordi. Ler nou poste nou dan avyon nou pasaz i tel ler i konnen poudir ou lakaz i vid, si ou'n kit ou zanfan ek granmanman, si ou zanfan i ek gran ser i konnen, keler gran ser i travay, tousala dimoun i konnen ozordi. Nou, nou bezwen aret ekspoz nou zanfan nou konman adilt.

Veye mannyer i sanze, mannyer nou sanz nou zanfan? Ozordi napa diferans ant nou zanfan mannyer i sanze avek adilt i sanze. Lontan nou ti kapab idantifye nou bann madanm sirtou. Ler i pe al en maryaz, ler i pe al lanmes, ler i pe al en pti *outing*, ler i pe al bor lanmer.

Ozordi ou a krwar mazorite bann madanm toulezour zot al bor lanmer menm zot! Zot napa lenz lanmes zot. Zot napa en lenz dormi zot. Akoz zot lenz i parey! Prezan nou bezwen nou, fer sir nou edik nou zanfan.

Me parkont Mr Speaker, i enportan letan nou lo sa pwen pou ki Gouvernman osi i zwe son rol. Parske dan lepase Gouvernman pa'n ede li. Gouvernman pa'n ede, parski Gouvernman li in fer sir dan tou diferan laport pou kapab tape.

Gouvernman li dan lepase li ki in fer li, letan i ti annan en Lalwa ki ti afekte son dalon, akoz i ti kapab antre dan lakaz son dalon pou li al pran son madanm i sanz Lalwa li. *Ok?*

Gouvernman dan lepase ki'n fer li, in pran nou larzan Mr Speaker, in fer bann proze dan distrik kot bann Minis, bann Manm Lasanble, bann O Zofisye dan Gouvernman in ganny semen ziska devan zot laport, zis pou zot tousel!

Be ki mannyer ou espekte ozordi nou pou ganny larzan dan kof, pou soutenir tou dimoun? Be *guys* kof i vid! Zot in dir anmar bato, ferm *Airport, closedown!*

Ozordi *Airport* in ouver, larzan pe rantre en pti gin pou nou lekonomi kapab bouze, pou nou zisteman kapab asiste bann dimoun kot Onorab Audrey pe kriy lasasen dan son distrik Mr Speaker! Kot Onorab Loze avek Onorab Cosgrow nou pe anmas en pe larzan, pou asire ki tou dimoun ki merit

ganny ede i ava kapab ganny ede!

Sa i bann keksoz ki nou, nou bezwen promote konman bann Lasanble serye. Sa ki mon apel serye Mr Speaker, pa sa ki Onorab Loze in dir. Me sa serye i annan aksyon, i annan koze. Epi nou ava ganny rikord pou pli tar.

Me parkont Mr Speaker, i enportan pou nou konman bann paran annou pa promot drog dan nou pei. Annou pa asosye nou pei avek bann eskobar, bann dimoun ki anmenn drog dan nou pei e zot, zot siporte akoz i fer parti zanfan pou zot, i donn zot en pti sak lafen dimwan, i donn zot en pti kado Desanm e i fer zot al fer zot seve.

Pa akseptab Mr Speaker!

(APPLAUSE)

HON SANDY ARISSOL

Fodre nou arete sa bann mantalite! Nou bezwen diriz nou pei ver laviktwar. Lekonomi i bouze pei i avanse, larzan dan kof sa ki merit ganny asiste i ava ganny asiste. Mr Speaker mon remersye ou.

(APPLAUSE)

MR SPEAKER

Mersi Onorab. Mon pa konnen si zot pe al reazir lo sa ki Onorab Arissol in dir, me selman in fer son *speech* parey zot osi zot in fer pou zot, *ok?* So mon pa vwar nesesite ki ou pou al konmans en largiman prezan avek sa ki in dir.

Ki mannyer mon pou fer sa? *Ok* mon pou les Onorab Pillay dir mon vitman silvouple pran 30 segonn dir mwan ki sa ou le adres nou lo la.

HON SEBASTIEN PILLAY

Mersi Mr Speaker, ler mon fer li byen get ou reaksyon. Onorab Arissol in apel nou isi voler e kriminel. Ou dan Lasanble ou, ou ti'n dir kategorikman Manm pa sipoze servi sa term pou dekrir son kanmarad. Ou menm dir ek mwan koumsa e la mon pou fer kler ek ou.

Ou'n dir ek mwan koumsa ou pa *interject*. Ou ki Speaker. In koze mon pa'n *interject*. Mon lev mon lanmen ler pou lev mon lanmen pou koze ou pou *dictate* ek mwan ki kantite letan mon pou dir me menm si mon pou kapab koze.

MR SPEAKER

Wi, aköz deba pe pase Onorab Pillay.

HON SEBASTIEN PILLAY

So ki mon ava demann ou pou fer Mr Speaker ...

MR SPEAKER

... *Ok?*

HON SEBASTIEN PILLAY

Petet avek tou respe ki mon annan pou ou, klersi avek mwan, eski nou annan drwa dan Lasanble apel nou kanmarad voler kriminel? E si nou annan drwa i *ok*, nou tou nou a konmans fer li.

MR SPEAKER

Ale les mwan reponn silvouple.

HON SEBASTIEN PILLAY

Akoz sa ti ou *Ruling*, so ou *Ruling* i aplik pou mon kote latab i bezwen aplik pou lot kote latab!

MR SPEAKER

Absoliman. Les mon a reponn silvouple. Mwan mon ler mon ekout Onorab Arissol mon konnen i servi sa term voler an term parti. Mon pa santi sa ...

(Interruption)

MR SPEAKER

... non mon pa'n tann sa. Onorab Arissol mon anvi ou dir ki ou pa pe akiz okenn dimoun la dan sa lasal konman voler. Silvouple si ou'n dir zis koriz sa.

HON SANDY ARISSOL

Mersi Mr Speaker, zisteman sa ki ou ou'n tande se zisteman sa ki mon'n dir. Se pou sa rezon mon ti annan ...

(Interruption)

HON SANDY ARISSOL

Wi mon kapab kontinyen Mr Speaker. Se pou zisteman mon ti annan sa liv avek mwan, parske sa liv i annan pou fer avek en parti politik. E se pou sa mon dir sa parti politik ki la, ki ozordi i apel *US* zot en bann voler parske nou annan laprev la i la avek mwan. Mersi bokou.

(Interruption)

MR SPEAKER

Wi la i la.

HON SEBASTIEN PILLAY

I pa sa ki'n ganny dir! Sa ki'n ganny dir i se ki nou, nou lo sa kote latab nou bann voler e nou bann kriminel! Mon *challenge* Onorab Arissol kot *LDS* pou anmenn laprev ki okenn Manm lo sa kote latab i en kriminel, ouswa nou touy dimoun!

Ou a bezwen konman Speaker fer en desizyon ozordi lo ki mannyer nou koz ek kanmarad dan Lasanble!

MR SPEAKER

Mon'n fini mon'n fini fer en desizyon. Eskiz mwan nou pa pou al toultan lo la. Nou bezwen termin lo sa Mosyon. Onorab Loze ti'n lev son lanmen depi avan, mon a donn li en parol pou li gete ki pou gete ki i annan pou dir. Wi Onorab Loze.

HON JOHAN LOZE

Mersi Mr Speaker. Mr Speaker mwan mon'n lev mon lanmen, senpleman akoz mon non in *precede* sa bann komanter voler ek kriminel.

Lo sa baz. Mwan ler mon'n koze mon pa'n nonm non sa bann dimoun, mon pa'n *point* dan zot direksyon, mon pa'n target zot *leadership*. Si nou pou konmans al dan sa bann direksyon, avek ou *blessing* Mr Speaker, nou pou bezwen konmans kestyon bann kriminel ki'n touy 35 Seselwa frer ek ser avek *COVID!* Mersi Mr Speaker.

MR SPEAKER

Onorab eskiz mwan nou pou aret la silvouple Onorab Aglae. Onorab Loze la kot ou mal. Ou pe dir

(Interruption)

MR SPEAKER

Esper mwan.

(Interruption)

MR SPEAKER

Ekout mwan. Ekout mwan. La ankòr mon le dir dan son bann remark ki Onorab Arissol in fer, mon konnen in mansyonn ou non. Selman i letan in servi mo kriminel, i pa'n asosye sa avek ou non.

Mwan mon'n tann li koumsa. E se pou sa mon pa'n obzekte, *ok?* Letan ou pe dir e sa e la mon pe dir ou, letan ou konmans akiz Gouvernman Egzekitiv ki'n touy dimoun avek COVID, mon pe dir ou, ou pe mal fer.

(Interruption)

MR SPEAKER

Mon pe dir ou, ou pe mal fer *ok!*

(Interruption)

MR SPEAKER

Silvouple, nou arete nou pou - Bon mon anvi ki nou kapab termin lo sa Mosyon bomaten.

Mon pa konnen si zot *well* in ariv apre midi, dan sa peryod. Avek zot endilzans kantmenm nou bokou an deor letan, mon annan de Manm pou koze lo lalis e sa se Onorab Lemiel e Onorab Bistoquet, e

apre sa LGB i bezwen fer *summary* son Mosyon.

Mon pe ekspekte nou kapab terminen avan ler, selman avek zot lendilzans nou a fini avek sa Mosyon la silvouple. Onorab Lemiel ou annan laparol.

HON SYLVANNE LEMIEL

Mersi Mr Speaker. Bonn apre midi tou dimoun ki a lekout. Premyerman ler mon pran laparol, mon ti pou kontan felisit Parti US pou ki in pran sa linisyativ, *at least* li in kapab donn en pe goute bann lekol, kot bann zanfan ti pe ganny difikilte pou ganny serten lasistans pou zot ganny en pe goute 10er.

(APPLAUSE)

HON SYLVANNE LEMIEL

E an menm tan Mr Speaker. Wi mon dan Parti US, me mon parkont mon pa afileye mon nanryen avek ni kriminel ni voler, parske mwan mon pa ni en kriminel, ni en voler!

Mon pe travay tou sa ki mon pe ozordi se lasyer mon travay! Mon pa'n zanmen touy personn, mon fanmir pa'n touy personn!

So mon lentervansyon vizavi sa Mosyon li menm Mr Speaker, i vremen bref. Mon

vwar ki sa ratifikasyon sa Protokol li menm i vreman enportan. I annan en gran lenportans e sa i montre en lot pa enportan e pozitiv dan lalit pou protez zanfan kont tou form labi.

Nou sanse isi Sesel ki ziska konmela nou pa ankore tann lavant zanfan. E mon pou vreman rekonforte si napa nou zanfan ki pe ganny servi pou prostitisyon.

Akoz ozordi Mr Speaker, i annan sitan kantite keksoz ki pe deroule dan nou pei kot i konsern zanfan. Lo sa kote sanmenm sa ki mon pou dir mon pou vreman rekonforte, si napa sa bann keksoz ki pe deroule avek nou bann zanfan,

I malere selman ki isi Sesel serten adilt pe angaz zot dan bann aktivite parey, e zot pe pran plezir dan bann tel aksyon imoral.

Ozordi bokou zanfan pe pas atraver bokou difikilte e problem sosyal. Bokou zanfan menm si i annan nou, nou pa kontan tande nou konnen sa nou, i annan bokou zanfan ozordi Mr Speaker, zot pe dormi vant vid wi. Paran ki foupanmal marse ou a konnen kote i annan.

Paran ki foupanmal e zanfan pe parwaze partou. Zanfan ki pe ganny kote dan

lakaz zot tousel san en bon sipervizyon en adilt. E sa bann zanfan i bezwen ganny gidans pou konnen kote zot kapab tap laport pou zot kapab ganny led.

Nou bezwen annan bann dimoun dan bann lenstitisyon e lorganizasyon ki zot kapab konfye zot problem e ki pou ekout zot, e rezourd zot problem. Ki aksyon nesese i ganny pran avek bann ki'n abiz zot drwa dan nenport ki fason.

Nou bezwen protez zanfan Mr Speaker. Ler nou pe protez zanfan, e garanti zot drwa zot a kapab devlope e grandi byen. Vin an sa ki zot anvi vini dan en sosyete lib e zis, san ki zot bezwen viv dan laper e dan lafreyer.

Ler nou dan sa Lasanble Mr Speaker, nou pe ratifye sa Protokol, nou pe demontre osi ki nou pe get *the best interest of the child*.

Parey mon bann koleg in koze avan mwan, zot in fer resorti ki bokou in ganny fer, kot i konsern drwa zanfan, dan diferan lapse. Me parkont mon santi ki nou devret annan en armonizasyon bann Lalwa pou zanfan, e ki fer ki tou i vin konplet. Si i annan nesese pou reviz santans pou bann abizer annou fer li.

Nou konman bann Parlmanter, nou devret touzour a lekout e aport nou soutyen a bann zanfan ki apros nou e ki vin rod nou led, si zot pe pas dan bann sityasyon difisil.

Ozordi i annan diferan laform soufrans ki nou zanfan pe pas ladan. Serten i ganny raporte e dan bokou ka i annan ki pa pe ganny raporte.

Mr Speaker, i enportan fer resorti ki isi Sesel letan ka i ganny raporte kot bann Lotorite konsernen, la nou pa pe dir tou sa Lotorite konsernen, serten Lotorite, fodre pa ki sa bann lazans oubyen sa Lotorite i a okenn moman touf sa bann keksoz lanmenm ! Fodre ki nou anmenn nou bann lenvestigasyon ziska lafen, e pa touf keksoz.

Akoz ler keksoz i toufe la, sa bann abizer i ganny pye e pli zanfan inosan i kontinyen ganny abize. Sa zanfan li i viv dan soufrans, e li sa abizer i kontinyen fer son agogo lo semen li. On dire pa si i pe fer tou sa bann keksoz ki pe pase. E nou bann zanfan i kontinyen soufer.

Mon annan en lapel pou tou zanfan isi Sesel, pou zot vin pli vizilan. Raport okenn keksoz ki zot santi oubyen zot pas atraver. Oubyen bann

keksoz ki zot pe trouve ki zot pa konfortab avek.

Kot dimoun i vin demann zot pou zot portre. Fer sir lo bann rezo sosyal kot zot ale lo sa bann sit lo rezo sosyal, fer sir ki zot tann son sours; gard bann kominikasyon avek zot paran. E paran osi annou gard en laport ouver.

E reste touzour a lekout nou zanfan a tou moman. Donn zot sa latansyon neserer e a toultan. Sanmenm nou vwar ki i annan de letan ki ler nou konman paran nou pa donn zanfan latansyon, zanfan i sorti kot nou lakaz i al rod latansyon kot lezot dimoun. E dan bann ka koumsa kot nou vwar laplipar ditan kot nou bann zanfan i ganny abize.

Mwan Mr Speaker mon pou toultan siport sa ki bon pou nou zanfan e nou pei. E mon pou donn mon sipor sa Mosyon, ki pe demann nou pou ratifye sa Protokol Opsyonnel lo drwa zanfan prosedir kominikasyon. Mersi Mr Speaker.

MR SPEAKER

Mersi Mr Speaker. Mersi Onorab. Onorab Bistoquet.

HON ROSIE BISTOQUET

Mersi Mr Speaker. Bonn apre midi Mr Speaker. Bonn apre midi tou bann Manm e bonn

apre midi tou bann dimoun ki pe ekoute. Mon remarke ki Sesel ti ratifye sa Konvansyon lo drwa imen an 1990 e sa lannen 11an pli tar ki nou pe anmenn sa Protokol pou ratifye.

Kote sa Konvansyon Protokol ti ete tou sa letan? Eski ti dan ti war *somewhere*? Ouswa petet i ti dan vant enn sa bann gro grenwir dan Larivyèr *Moosa*?

(laughter)

HON ROSIE BISTOQUET

Mr Speaker, mwan koman en manman e en granmanman avek pti zanfan anba 12an e osi en zabitan ki pe viv ek travay dan kominote Sesel. Ki mon konnen i annan bokou defi, i mon devwar pou siport sa Mosyon, pou protez e osi amelyor lavi pou tou nou bann zanfan Seselwa.

E osi tou bann zanfan ki pe viv Sesel menm ki zot pa Seselwa. Akoz zot tou i nou zanfan e osi bann zanfan Sesel. Pou Sesel kapab fer sir ki drwa tou zanfan i ganny respekte, i demann en lekip miltisektoryal avek en gidans byen striktire pou fer sir ki sa zouti ki apel Konvansyon lo sa Drwa Imen anmenn Protokol, i ganny byen enplimante, avek en bon standar kordinasyon gide par

standar Nasyon Ini spesifikman *UNICEF*.

Sa Konvansyon sirtou *UNICEF* li anmenn bann diferan gidans pou bann diferan pei kapab swiv. E sa i pou fer sir ki nou etabli bann Lalwa sorti en Nasyonal sorti kot bann gidans Nasyon Ini, e pou anmenn sa dan diskriminasyon dan okenn form, pou sirtou pou bann zanfan, parey zot ganny benefis avek proteksyon bann mezir sosyal e asistans.

Akse avek servis parey ledikasyon, lasante pou devlop zot personnalite zot abilite, e talan nou bann zanfan avek pli o potansyel.

Grandi dan en lanvironnman kot i annan lanmour parey enn mon koleg in dir e konprenezon.

Ganny enformen partisip e realiz zot drwa dan en fason aktiv.

Sa Konvansyon ti ganny adopte pou par *CEDAW* dan 1979 e *CEDAW* li i en form of *Elimination of All Forms Discrimination against Women* dan Lasanble zeneral ki ti ganny pase sa ti ganny pase sa Mosyon.

Sesel ti ratifye Konvansyon Drwa Zanfan an 1990 parey mon ti dir e son bann gran prensip ti ganny

garanti dan nou Konstitisyon an 1993.

An plis ki sa *Children's Act* ti vin an fors avan sa an 1982. I ti ganny amande an 1991 pou osi revwar bi santral pou proteksyon bann zanfan.

Sa Lalwa lo drwa zanfan, i rekonnet pli bon lentere pou en zanfan konman son gidans primordyal, kot lafanmir e sosyete i kree en lanvironnman, kot bann drwa e lentere bann zanfan i ganny zere.

Malgre tou sa bann zouti ki in met an plas ouswa ki la nou pe al ratifye, nou santi osi ki i annan ankor bann defi; i annan sirtou defi osi ki nou dan nou sosyete Sesel nou pe pas atraver sirtou kot i konsern nou bann zanfan.

Parey zanfan pe ganny abize fizikman i annan *rape* zot ganny abize psikolojikman zot ganny abize seksyelman sirtou par bann manm fanmir. Akt seksyel i annan parmi bann zanfan. I annan *bullying* dan lekol.

Sirtou bann *single parent family* kot zanfan i reste dan lakour zot tousel pandan vakans ki letan ki napa lekol, parey la nou dan *COVID*.

Zanfan pe servi lakol dan bann aktivite sosyal anba menm lize zot paran dan

batenm premyer, konminyon, lakonfirmasyon maryaz.

Zanfan - bann zanfan fiy zot ansent anba laz e menm ganny pouse lekol. E nou'n trouve osi ki en kantite bann manman, menm sa bann zenn fiy, zot pe konsonm drog. E aktyalite i montre nou dan statistik Minister Lasante nou annan en kantite bann *heroin babies* ki'n ne e pe ne preski toulezour.

I annan labi drog kot zanfan pe servi e vann drog kot lekol dan kominote. Kan i annan konplikasyon i annan vol osi dan vwazinaz i annan lager parfwa i vin fatal.

Zanfan Sesel - lezot zanfan ankor kantmenm pa Sesel zot ganny osi eksplwate. Sa bann defi i fer ki nou zanfan i soufer an silans. Zot noye dan zot pti larm kot zot konportman i sanze gradyelman.

Malgre tou sa defi i annan sipor ek lenstitisyon nasyonal ki'n ganny etabli pou siport nou zanfan dan lentere nou bann zanfan.

E bann mekanizm nasyonal, pou kordin sirtou sirvey sa Protokol isi tou bann Lezislasyon bann Polisi, bann pratik, pou promot lentere bann zanfan baze lo Lartik Konvansyon.

Fasilit mezir standar pou donn swen e proteksyon zanfan depi zot nesans, ziska ki zot vin laz mazer. Sa i deza egziste, drwa annan tou zanfan i annan drwa en nasyonalite en idantite, Lalwa pou defann drwa en zanfan.

Prosedir adopsyon i an plas, *Daycare Centres* pou sirvey bann zanfan ki pa ankor al lekòl, benefis konze maternite paternite, ler bann manman i ansent pou ganny baba, lakour rezidansyel, vilaz, lenstitisyon, ki i annan deza an plas pou protez bann zanfan konman en lenstitisyon.

Lasistans sosyal lo merit. Sipor pou fanmir avek zanfan otremman kapab i annan Tribinal Lafanmir, plasman bann zanfan ki zot paran i dan prizon.

Aprè i annan swen lasante pou tou bann zanfan depi zero a 7an e menm bann ki pe al lekòl osi.

E menm lekòl bann zanfan i kapab al lekòl e kontinyen zot letid parey ki Protokòl i demande ouswa Polisi pe demande.

Parey sa Protokòl i demande, responsabilite konsernan zanfan i pa reste zis avek Leta ou bann lezot lenstitisyon. Lazans nasyonal dan en sosyete osi tel par

egzanp ki Minister Lafanmir ki mon krwar i pe pran *leadership* pou fer sir ki sa bann Protokòl i ganny asire ganny enplimante dan en fason armonize partou bann Lazans konsernen.

E lezot akter i annan par egzanp Minister Lasante, Minister Ledikasyon, Kiltir Minister Lanplwa, Lapolis NCC e lezot. Sa bann Lazans i la pou asiste Gouvernman dan en zefor pou promot proteksyon bann zanfan ki pe viv dan Sesel.

Paran i sipoze zwe lamazorite rol akòz se zot zenan e zot paran zot bann pivo, pou asire ki zot zanfan i grandi avek en bon moral e avek en bon valer.

Paran osi i devret pran plis zot responsabilite, pou asire ki lentere sa bann zanfan i ganny latansyon maksimòm.

Pou asire ki sa Protokòl i ganny enplimante byen, dan n zefor kolektiv sa Komite par enstisyonalize par Nasyon Ini mon krwar i en Komite ki petet i anmenn plis laklerte, plis gidans plis lasistans ki pou anmennen, standar osi ki pou anmennen bann lezot Protokòl ki nou pa ankor devlope tir tou bann *standard operating procedures* ki nou pei i devret ganny an mars.

E mon osi asire ki sa lazans ki sa *Committee* ki pou

ganny etabli ki Sesel pou form parti ladan, pou sirvey osi bann standar pou asire ki okenn zanfan pa ganny kit deryer sirtou ler zot drwa i ganny vyole.

Alors mwan mon pou siport sa Mosyon, akoz okenn nou zanfan pa devret ganny ekspoze avek okenn form labi sirtou Sesel. E osi nou sa Protokol i fer sir ki lavwa bann zanfan i ganny tande. Mersi Mr Speaker.

MR SPEAKER

Mersi. Onorab Georges mon a donn ou laparol prezan pou ou rezimen.

HON BERNARD GEORGES

Mersi Mr Speaker. Mersi. Mon pa pou, mon pa pou tro tarde. Mr Speaker mon ti a kontan remersye tou bann Manm ki'n entervenir lo sa Mosyon bomaten.

Zot in fer sorti en seri, konsern. E i annan bokou konsern dan nou pei lo sor bann zanfan. Mon remersye sirtou Onorab Bistoquet ki'n fek koze.

Ki'n donn nou non selman en lalis bann mezir ki nou pei in pran pou *contre* sa bann keksoz, me osi en lalis ase enkyetan. Lo bann problem ki egziste touzour ozordi, bann

social ills, bann fleo sosyal, bann defi sosyal ki annan bokou tro.

E mon krwar nou devret koman en Lasanble, zanmen perdi *sight* sa bann problem ki nou fer fas avek toulezour. Kekfwa koman Manm Lasanble annan de fwa nou, nou'n telman *immune*, nou'n telman vwar sa bann keksoz e nou tant pou regard en pti pe annan de fwa lo *achievements*.

Me mon krwar i nou responsabilite premyerman pou nou *focus* lo bann problem ki egziste, e ki'n sorti ozordi dan en fason regretab, dan en fason politik.

Me kantmenm *at least* sa bann keksoz in vin devan. E mon krwar avan ki mon fer mon konklizyon Mr Speaker, mon krwar i mon devwar ozordi, rapel nou koman en Lasanble ki i annan diferan fason fer.

E fodre nou rekonnet ki pa tou fason fer ki parey. Mon'n pran mon letan taler poudir ki bann ladministrasyon presedan in fer bokou pou promouvwar lentere bann zanfan dan sa pei.

E mon pa'n, mon pa'n dir sa akoz mon anvi zve bon boug. Mon'n dir sa akoz i vre, e nou bezwen rekonnet e nou bezwen rekonnet sa.

Sa ki *attrister* mwan se ki olye, olye sot lo la e selebre

bann bon keksoz ki'n arive. Nou e sirtou zot lo zot kote latab, zot in prefere zwe en boul politik avek sa keksoz. E sa i regretab. E mon krwar in devalye en pe lotorite sa Mosyon ozordi.

Mon ti a kontan dir de mo lo sa size Mr Speaker. Ladministrasyon presedan in diriz pei anba en filozofi ki zot, zot ti annan. E sa sete zot filozofi, sete zot Manifesto, e elektora ti vot pou zot pou delivre sa Manifesto.

E sa Manifesto sete *welfare*. Met dimoun parey zot menm zot, zot dir o sant devlopman e fer sir ki sak dimoun i ganny proteze par Leta *from cradle to grave*. Sa sete zot filozofi. E zot in anmenn sa pei anba sa filozofi, anba sa politik pandan 43an.

Nou, nou annan en lot filozofi e nou sel keksoz nou pe demann zot, se aksepte ki pei in sanze e se en lot striktir, avek en lot politik ki an plas ozordi.

E toultan mon pran mon letan pou mwan eksplik zot sa. Nou nou'n sanz sa sistenm, akoz i pa soutenab. Premyerman i pa soutenab ekonomikman, akoz en pei pa kapab lannen ale, lannen vini servi lamazorite son Bidze zis pou *welfare* son sitwayen.

(APPLAUSE)

HON BERNARD GEORGES

E i pa soutenab lo en laspe moral. Akoz en kiltir depandans pou anmenn nou pei ver plis lapovrete olye plis larises. E nou nou'n deside, e Lepep Seselwa in donn nou en manda, pou met plis responsabilite parey Onorab Sandy Arissol in fer nou konpran bomaten, dan sak sitwayen pou fer sir ki pa *tax payers* ki pou sibvansyonn irresponsabilite serten dimoun.

Me ki *tax payers* pou sibvansyonn *growth*, larises dan nou pei.

I en lot filozofi, i en lot fason fer e sel keksoz nou pe demann zot se, aksepte larealite e annou viv avek. Mon'n dir sa Mr Speaker akoz i antre egzaktaman la kot nou ete ozordi.

Dan sa Protokol kot nou pe al ki nou, ki mon espere ki nou, nou pou aksepte pou ratifye, e nou pou *endorse* la bomaten, nou aksepte, nou rekonnet ki zot, zot in fer en bon bout semen e zot in met an plas en kantite striktir.

Me ozordi se nou ki *rule border* e se sa ladministrasyon ozordi ki pou bezwen anmenn sa bout pli devan!

(APPLAUSE)

HON BERNARD GEORGES

Se sa ladministrasyon ki pou bezwen devlop sa Protokol ki nou pe al aksepte la ozordi. Sa se larealite dan 5an, dan 10an, dan 15an i pou sanz ankor. Me annou aksepte ki sa se en revolisyon, e set en progresyon ki nou bezwen annan dan nou pei, kontan pa kontan, akoz se lafason ki keksoz i marse.

Mr Speaker an terminan mon ava tous trwa pwen ki'n ganny fer sorti.

Premyerman Onorab Chair IAC Onorab Waven William, in demande ki Lasanble i ganny reprezante lo bann lenstans lokal ki pou zer sa Protokol. E la mon krwar ki sa set en tro bon linisyativ, en tre bon propozisyon. E kekfwa dan *Memo* Lasanble ki pou al kot *Cabinet*, sa set en pwen ki nou kapab fer sorti.

Dezyenmman set en pwen ki mwan, mon ti a kontan fer sorti e sa se, sa ki sa Lasanble menm in fer pou promouvwar dan sizyenm Lasanble lenter e bann zanfan.

Enn bann keksoz ki nou ti fer dan *Civil Code*, si zot ava rapel tre byen se tir maryaz zanfan. Ozordi ou'n nepli kapab marye anba 18an. Ou'n nepli kapab marye, menm avek permisyon ou paran oubyen

permisyon Lakour. E sa set enn gran lepa ki nou'n fer, ki nou ti pe ganny demande pou fer par nou bann zanmi Afriken, akoz laba i en problem, isi i pa telman en problem. Me se en keksoz ki nou'n bezwen fer akoz solidarite i fer lafors.

E trwazyenm keksoz Onorab Loze in demande, eski Konstitisyon pou bezwen ganny amande pour pran sa Protokol an konsiderasyon? E larepons mon krwar se, non. Akoz anba Lartik 31(c), - 31(c) anefe an Kreol ki mannyer nou pou dir sa, akoz let "c" pa egziste an Kreol. I vin "k", me solman i "c" an Angle. 31(c) mon pa konnen ki ete dan son teks Kreol.

I dir ki, sa se "*The Right of minors*" ok? Tou bann drwa ki bann miner, bann zanfan i annan e enn sa bann drwa se ki Leta - Leta Seselwa i garanti ki i pou anmenn proteksyon spesyal pou bann miner kont leksplwatasyon sosyal e ekonomik, e kont danze fizik ek moral *auquelle* sa bann zanfan i kapab ganny ekspoze.

Mon krwar sa Protokol Onorab, i antre tre byen dan sa Drwa ki ganny proteze par Leta dan nou Konstitisyon.

Mr Speaker mon'n promet pou mwan pa al tro lwen, tro long. Mon remersye ou e mon remersye tou bann Manm parey

mon ti dir pou zot latansyon e pour zot kontribisyon.

E mon demann zot ankor enn fwa pour aksepte sa ratifikasyon, sa Protokol ki devan nou ozordi. Mersi Mr Speaker.

MR SPEAKER

Mersi Onorab Georges. Avek sa mon a lir Mosyon pour envit bann Manm pou vote. Mosyon i lir koumsa: -

“In accordance with Article 64(4) of the Constitution, this Assembly resolves to ratify the Optional Protocol to the Convention on the Rights of the Child on a Communications Procedure.”

Bann Manm ki vot pour lev lanmen silvouple? Ok, Madanm Clerk. Okenn Manm ki vot kont? Mersi. Kestyon ki'n ganny mete pour lasal, Lasanble, *“To ratify the Optional Protocol to the Convention on the Rights of the Child on a Communications Procedure.”* 30 Manm in vot pour, 0 kont e 0 in *abstain*. Alor sa Mosyon in ganny aprouve. Mersi.

Avek sa nou a pran poz nou a rezwenn 2er edmi. E les mwan *remind* bann Manm ABC ki nou annan *meeting*, nou an retar nou a fer li 1er edmi.

Mersi. Ou annan en lanons pou Komite *Bills* Onorab Andre? Wi.

HON CLIFFORD ANDRE

Mersi Mr Speaker. Mr Speaker zis pou enform *Bills Committee* ki koman nou sorti la, nou annan bann viziter ki deza pe esper nou pou nou pas lo sa bann *Bills*. So nou ava al direkteman dan *Members Lounge* pou nou fer sa *meeting*. Mersi.

MR SPEAKER

Mersi Onorab Andre. Nou ava pran poz e nou a rezwenn 2er edmi.

(BREAK)

MR DEPUTY SPEAKER

Mon ava dir bonn apre midi tou Manm Onorab. E bonn apre midi tou manm piblik ki pe swiv Lasanble Nasyonal pou sa Merkrede.

Donk nou pou kontinyen avek nou *Order Paper*. E trwazyenm *item* lo bann Mosyon, plito dezyenm Mosyon lo *Order Paper*, donk mon ava envit loter Mosyon *Leader* bann Zafer Gouvernman pou prezant son Mosyon silvouple.

HON BERNARD GEORGES

Mersi Mr Speaker. Bonn apre midi Mr Speaker. Bonn apre

midi tou bann Manm Onorab e tou dimoun ki pe swiv. Mr Speaker dezyenm Mosyon ozordi i lir koumsa: -

In accordance with Article 64(4) of the Constitution, this Assembly resolves to ratify the Agreement Between the Government of the Republic of Seychelles and the Government of the United States of America Concerning Counter Illicit Transnational Maritime Activity Operations.

Mr Speaker sa lenstriman enternasyonal, safwasi se en *Agreement* e se en *Agreement Bilateral*, aköz i zis ant de parti, Sesel avek *United State of America*, Leta Ini. E i en *Agreement* parmi sa de dimoun e i ganny kouver li osi par Lartik 64(4) parey nou'n eksplike bomaten.

I en dokiman ki'n gannyen sinyen, ki'n ganny antre ladan par Gouvernman Sesel, atraver enn son bann Minis e avek Gouvernman Leta Ini.

E sa *Agreement* ti ganny fer mon mazine se Anbasader Leta Ini ki'n sinyen aköz i in ganny fer *Port Louis Maurice* e pi isi Sesel dan de *originals*.

E nou, nou pe ganny demande ozordi pou ratifye sa desizyon Gouvernman pou antre dan sa *Agreement*.

Mr Speaker sa *Agreement* ki devan nou i annan lo son baz aktivite ilegal dan Losean Endyen. E parey tou dimoun i konnen Sesel i kouver en *vast* parti sid was Losean Endyen.

E kot en kantite trafik maritim i pase, me osi kot in annan parey nou'n vwar dan sa dernyen letan, aktivite lapes ilegal, aktivite drog ki antre dan delo teritoryal oubyen lo *EEZ* Sesel e en pe letan pase aktive piratri osi.

Alor aköz nou teritwar i telman gran, nou teritwar maren i telman gran e aköz nou napa sifizaman kapasite avek resours pou nou kapab *police* tou sa bann, tou sa teritwar. E aköz Sesel i size latak pirat. In fini, me napa nanryen ki dir ki pa pou rekonmanse en zour, *illegal fishing* parey zot apel li dan sa *Agreement*, "*illegal, unreported and unregulated fishing.*" E osi parey nou fek vwar i annan aktivite drog ase konsiderab dan nou teritwar.

E donk pour *enhance* nou kapasite avek posibilite pour met sa bann keksoz anba kontrol, Gouvernman Sesel avek Gouvernman Leta Ini in antre dan sa *Agreement*. E bokou dimoun pour, pou demann zot lekor, be ki annan pou fer avek Lanmerik, Lanmerik i lot kote lemonn.

I annan en Kontinan Lafrik avek en Losean Atlantic ant nou avek zot dan en kote. E en kontinan Lazi avek en Losean Pasifik ant nou ek zot lo lot kote. Ki zot lentere vin, *improve* kapasite Sesel? Akoz Lanmerik pa pe fer sa, akoz zot kontan nou. Zot pe fer sa akoz zot annan en lentere ladan.

E se lentere Mr Speaker i senp. Lanmerik i annan de obzektif prensipal akoz i pe anvi ed Sesel. Enn, se piratri li menm, e piratri i pa en problem la. Ant sa de ki reste enn se trafik drog ilegal. E Leta Ini parey zot konnen en pe parey Sesel i annan en gro fleo drog kot zot.

Me i pa selman sa, zot osi konnen ki trafik drog i en fason pou bann teroris fer larzan;- ek sa ki dir ou teroris i dir ou lentere Lanmerik in ganny afekte. Zot enterese pou anpes drog, akoz drog i finans teroris, akoz teroris son premye target toultan se Lanmerik.

Alor zot annan sa lentere direk dan redwir trafik drog, pour redwir larzan ki trafikier drog i fer, e dan en fason pour redwir aktivite teroris dan zot teritwar oubyen dan zot baz militer, en pe partou dan lemonn.

Parey nou konnen, par lepase Lanbasad Lanmerik dan

menm dan nou rezyon *Kenya, Nairobi*, avek *Dar Es Salaam*, in ganny targete. E annou pa bliye ki pa lwen avek nou i annan *Diego Garcia* ki enn bann baz prensipal militer Ameriken.

Dezyenm rezon akoz Lanmerik i enterese se, atraver redwir trafik zarm, sirtou zarm nikleer ek bann zarm destriksyon masiv. E la zot annan en lentere direk. Akoz otour nou i annan plizyer *nuclear territories*. I annan Pakistan, i annan *L'Inde* lanmenm la o bor nou. *Israel* pa lwen, *Gulf* i en landrwa kot i annan bokou problem militarizasyon e i annan osi parey mon dir *Diego Garcia*.

Donk zot annan en lentere direk dan sa morso losean, pou fer sir ki bann aktivite ilegal pa kapab repann. E lo nou kote nou, nou benefisye akoz si Lanmerik i anvi partisip dan *policing* nou morso losean, *well* nou, nou annan retonbe direk.

Setadir lo kote trafik drog en retonbe direk, lo kote *illegal fishing* en retonbe direk. E in ganny estimen ki Sesel i perdi \$7.5milyon par an zis lo aktivite lapes ilegal. E osi *obviously* si nou kapab an rey okenn proliferasyon zarm nikleer, oubyen latak piratri si arive dan lefitir sa se en, en bon keksoz.

Donk pou sa rezon, etandonnen ki Sesel i mank kapasite pou fer tou sa bann keksoz li tousel, *on behalf* Lanmerik oubyen en lot, sa de pei in trouv li bon pou zot *join forces* dan sa lantrepriz.

Sesel in fer en bon pe travay. E fodre dir dan sa domenn lo li tousel parey nou konnen, i annan Lalwa ki'n pase. Nou'n pa en Lalwa kont piratri, kot sa Lasanble li menm li in pas en Lalwa poudir anfen pa sa Lasanble setyenm Lasanble, me sa Nasyonal Sesel, in pas en Lalwa ki permet Sesel ziz okenn akt piratri ki'n arive *anywhere* dan lemond.

I pa bezwen ariv Sesel oubyen dan teritwar Sesel i kapab, nou kapab nou annan ziridiksyon e nou'n montre sa ziridiksyon, dan lepase pour anmenn pirat Ankour e pou santans zot prizon akoz en akt piratri ki zot in fer an deor delo teritoryal Sesel.

E *of course* nou *Misuse of Drugs Act* i en Lalwa ki dan sa bann dernyen lannen fas a proliferasyon aktivite drog ilegal dan nou teritwar, maren, *Misuse of Drugs Act* in ganny bokou lamannman pou anmenn li azour avek bann realite ki nou fer fas avek.

Alor pour akoz nou annan en mank kapasite e nou annan

en mank resours e Lanmerik i annan en sirplis kapasite e en sirplis resours e zot annan en lentere dan nou rezyon. Sa *Agreement* in ganny antre ant sa de, ant sa de pei.

Son *main aim* se pour ranforsi bann korperasyon *enforcement* Lalwa ant sa de pei ki annan en lentere mityel pour sa de pei.

E bi sa *Agreement* se pou *set out* bann prosedir lo ki mannyer sa korperasyon pour pou kapab ganny fer. E an de mo *basically* sa ki pou arive se ki Sesel pou *provide*, sa ki annan e Lanmerik pou *provide* materyel *assets*.

E ler mon dir *assets* mon le dir bato avek avyon, ek lekipman ek personnel pour kapab annan en latak en pe pli ranforsi kont sa bann fleo ki pe menas nou morso losean.

Alor anba sa *Agreement* lo kote Lanmerik se *United States Coast Guards* avek *Department of Homeland Security* ki pou zer sa kote sa *Agreement* lo kote Lanmerik. E lo nou kote se Minister Zafer Entern e *SPDF* ki pou zer li kote isi. E mon mazine *SPDF*, lo kote *Coast Guard*.

E sa ki pou arive an detrwa mo, se ki bann zofisye Lalwa, bann zofisye *enforcement* Lalwa dan tou lede

pei, i a kapab mont abor bann bato oubyen bann avyon koman *ship riders*.

Setadir ki si en bato *Coast Guard* pe sorti nou kapab met bann personnel Ameriken abor pour zot pran par dan bann loperasyon e vis versa. Si Lanmerik pe met enn son bato en *Coast guard* oubyen en avyon a zot dispozisyon nou nou annan drwa met en *shiprider* abor pou fer sir, pou ede dan lenplimantasyon sa, lobzektif sa *Agreement*.

Lanmerik i kapab pou ganny drwa anba sa *Agreement* pou anmenn zot *vessels* isi Sesel parey mon'n dir ek zot bann avyon sirveyans, osi. E sa bann teritwar ki zot pou kouver, se pa selman teritwar Sesel ki *extend* ziska 1200, me osi dan *contiguous zone* ki zis apre sa 1200 e lo nou *EEZ* ki parey nou konnen i en siperfisi 1.3milyon kilomet kare.

Tre briyevman, tre briyevman sa i annan 3,4 Lartik ki enportan dan sa *Agreement*. Lartik 8 i permet sakenn sa de parti annan ziridiksyon lo okenn bato e mon sipoze avyon ki ganny entersepte.

Donk tou dimoun i dakor ki si i en bato Ameriken ki'n ganny deplwaye avek en *shiprider* oubyen de *shiprider* Seselwa abor. E ki se sa bato

Ameriken ki entersepte dizon en dav ki annan drog lo la dan delo teritoryal oubyen dan *EEZ* Sesel. Sa bato Ameriken i ava annan ziridiksyon lo sa bato ki'n ganny arete.

Akoz ordinerman i pa ti pou annan, akoz se selman bann bato Sesel avek *Coast Guard* Seselwa ki ti pou annan sa ziridiksyon. Donk sa se en pa devan.

Dezyenmman, Lartik 9 i permet larantre, vizit, tranzit ek rezidans tanporer bann *Law Enforcement Officials* Ameriken lo teritwar Sesel. Akoz sansan i pa ti pou kapab deplway sa bann, sa bann loperasyon.

Lartik 10 i permet zofisy *Law Enforcement*, sak kote pou donn lasistans spesyalize avek lot kote. Donk i pou annan en lesanz lenformasyon ek lasistans.

E Lartik 12 i permet Lanmerik pa selman servi son bann *assets* nasyonal, me osi bann *private contractor*, bann lakonpanyen, oubyen en bato en trwazyenm Leta.

Akoz i posib ki Lanmerik pou antre dann en negosyasyon avek en lot pei. E servi son bann *assets* pour met isi olye anmenn bann bato sorti lanmerik. Donk sa se apepre bann Lartik ki pli enportan dan sa *Agreement*.

Ki benefis? Byen mon'n fini mansyonn detrwa deza, benefis pou Sesel. Premyerman se en benefis direk dan lekonomi. Nou sa ki dir ou Lanmerik, i dir ou ki, *obviously* pou annan larzan ki pou ganny depanse dan lekonomi Sesel par sa bann dimoun.

Me osi nou pou annan en retonbe ekonomi endirek: setadir ki si nou kapab anpes drog antre, sa se en retonbe ekonomik endirek. Si nou kapab anpes nou pwason ganny lapas ilegalman, sa se en retonbe ekonomik endirek.

Nou pou annan, dezyenman nou pou annan plis *assets* pe sirvey nou teritwar. Avyon sirveyans, koman bato sirveyans e deza nou pa pe tro mal fer, nou pa pe tro mal debourye.

Dan sa detrwa semenn nou'n vwar ki mannyer nou *assets* Seselwa zot, zot menm zot in kapab proaktif dan plizyer larestasyon.

Nou kapab imazinen ki mannyer avek plis *assets* en pei parey Lanmerik nou pou kapab fer sa pli byen. Alor nou pou annan sa korperasyon.

E trwazyenman, e sa i tre enportan pou bann pei parey Sesel. Lasistans teknik, *transfer of technology*, nou pou ganny sipor bann dimoun ki pe

fer sa depi en bann lannen e ki annan bann resours pou *build-up* nou kapasite dan nou prop dimoun isi.

E fer sir ki nou kapab annan en meyer kad dimoun ki en zour avek *assets* ki nou pou annan nou menm. Nou ou kapab zer nou teritwar nou menm, tel parey in swe plizyer Gouvernman, pandan plizyer lannen.

Finalman dernyen mo Mr Speaker, mon ti mansyonnen bomaten ki sa dezyenm, sa *Agreement*, sa dezyenm ratifikasyon ki pe vin devan nou ozordi, i en *Agreement* Bilateral e i *self-executing*. Sa *Agreement* ozordi parey zot pou vwar ler zot lir li.

I dir ki i pou vin an aplikasyon lemoman ki i ganny sinyen. Annefe i lemoman ki i pou ganny ratifye. Donk lemoman ki nou'n ratifye sa, sa *Agreement* apre midi. E mon pou demann tou dimoun donn zot sipor akoz mon pa vwar okenn retonbe negativ mon vwar zis retonbe pozitiv.

Mon mazine ki kekfwa enn bann keksoz ki bann Manm i ava anvi koz lo la, me mwan mon pa pou *venture* ladan.

Me mon ava zis sizer sa koman, en lide pou en deba. Sa se, eski zeopolitikman nou pe antre dan risk? E mon vwar ki

IAC in lev sa pwen dan zot rapor e zot in fer sorti sa pwen.

Deza zeopolitikman nou en teritwar en pti pe anba presyon akoz nou annan Sinwan ki enterese dan Lafrik, nou annan *L'Inde* ki enterese dan Losean Endyen, nou'n koz lo *Assumption*, nou'n koz lo *Agaléga*.

E la prezan nou annan *La France* ki enterese dan nou rezyon e ki'n toultan krwar ki se, ki se, ki sa *area* se son domenn e la nou pou annan Lanmerik ankore.

Donk kekfw sa i ava en retonbe negativ, ki bann Manm i ava kapab koz lo la. Me mwan mon pa vwar, mon pa vwar ki nou annan en gran swa. Mon krwar ki bann benefis i *outweigh* bann problem potansyel avek en tel *Agreement*.

Donk osito ki nou ratifye li apre midi e mon envit zot tou vot an faver sa Mosyon e ratifye sa *Agreement* ki'n ganny sinyen, i pou vin otomatikman an aplikasyon. Donk pa pou annan en lot Lalwa ki pou vin devan nou, pou anmenn li an aplikasyon. I pou *directly applicable* parey mon'n dir. I pou egzekit son lekor li menm, lemoman ki nou ratifye li.

En dernyen parol Mr Speaker, ankore enn fwa se pour

rikord mon lapresyasyon pour travay ki *IAC* in fer avek en rapor byen detaye e byen met o fe devan nou Lasanble.

Mr Speaker avek sa detrwa mo, mon envit tou bann Manm pou vot an faver sa Mosyon, dan en fason ki sa *Agreement* i ava ganny ratifye e i ava vin an aplikasyon. Mersi Mr Speaker.

MR DEPUTY SPEAKER

Mersi Onorab Georges e aprezan mon ava envit en Manm pou segonn sa Mosyon. Mon not Manm Elekte pour distrik Cascade Onorab Monthy.

HON PHILIP MONTHY

Mersi Mr Speaker. Mon ti a kontan segonn Mosyon anmennen par *LGB*. Ki pe demann sa Lasanble pou ratifye sa Lagreman Bilateral ant Gouvernman Sesel e Gouvernman Leta Ini pou lalit kont bann aktivite ilegal, aktivite maritim ilegal dan Losean Endyen. E avek ou permisyon mon ti a voudre dir detrwa mo lo sa Mosyon.

MR DEPUTY SPEAKER

Proceed Onorab.

HON PHILIP MONTHY

Mersi. Sesel parey nou konnen i ganny konsidere koman enn bann pli pti pei o monn. Si nou pran tou sa 115 zil ki form nou larsipel e nou met ansanm, *still* en pei parey *Maurice* pou annan en siperfisi en pe plis ki trwa fwa, pli gran ki nou teritwar.

E la mon pe koz lo nou teritwar teres. Me avek en lespas maritim ki etal lo en pe plis ki 1.3milyon kilomet kare, ouswa plis ki 6 fwa grander Rwayonm Ini, nou kapab konsider Sesel koman enn bann pli gran pei o monn, si nou regard li dan sa loptik.

Avek en lespas maritim sitan *vast*, nou absoliman bezwen led lezot nou bann pei zanmi pou asiste nou avek sirveyans nou teritwar maritim e aeryen.

Sa Lagreman Bilateral ant Sesel ek Leta ini ki devan nou Lasanble ozordi, si i ganny aprouve, i pou permet ki en gran pwisans parey Leta Ini i asiste nou dan sa gran defi pou protez nou *zone* maritim kont bann pratik ilegal.

E la i enportan pou note kiv Leta Ini, i deza pe asiste Sesel dan domenn sekirite maritim, an term formasyon lo bann zofisyè gard lakot. Pou ede ranforsi zot kapasite teknik e profesyonnel.

Sa Lagreman i pou tou senpleman konplimant sa korperasyon e permet ki bann Ameriken i kapab diriz bann loperasyon dan nou lespas maritim e aeryen, pou entersepte okenn bato, oubyen okenn avyon ki ganny sispekte pe angaze dan bann aktivite ilegal.

Sa i a fer ki i pou ranforsi nou abilite pou idantifye lokasyon presi, kote sa bann tel aktivite pe deroule. E donk fer li pli fasil pou entersepte sa ki responsab e anmenn zot devan lazistis. E osi ede redwir kou bann loperasyon konsiderableman.

Akoz ler ou konnen egzaktaman kote tel bato, tel aktivite pe deroule ou al direktaman laba e i anpes ou depans *fuel* e lezot lozistik pou nanryen.

Sa bann aktivite tel ki lapès, bann aktivite ilegal tel ki lapès, trafik lapès ilegal, trafik drog, piratri e trafik zarm i pa nouvo.

E mon asire ki'n annan plizyer ki'n deroule san ki nou'n kapab idantifye. E donk atrap sa bann ki responsab dan lespas. Lenpak ki bann tel aktivite klandestin i kapab annan lo devlopman ekonomik e sosyal nou pei e danze ki sa i kapab poze an term

konservasyon nou bann resours maritim, i imans.

Bomaten nou fek pe koz lo drwa nou bann zanfan e nou'n, plizyer pwen in ganny sorti lo sa fleo drog ki pe afekte nou bann zenn. E nou konnen poudir lamazorite drog ki antre dan pei i fer li atraver lavwa maritim. *Ok* so sa i pou ed en kantite pou redwir sa fleo drog ki pe ronz nou sosyete an se moman.

Sa Lagreman i alors enn ki tre enportan, e ki ariv a en moman kot tou resaman nou'n vwar lakantite bann tel aktivite ki pe pran plas dan nou lespas maritim, kot nou lafors gard lakot in entersepte plizyer bato, ki ti pe lapes ilegalman dan nou lanmer e kot drog danzere ti pe ganny trafike.

Me kestyon ki petet nou pe poz nou lekor, *LGB* abord en pe se akoz ki en gran pwisans parey Lanmerik i sitan enterese dan proteksyon nou *zone* maritim? Oubyen, eski sa pa pou enterfer avek nou souvrennte koman en pei?

I enportan pou note ki transportasyon zarm nikleer dan nou lanmer i reste en posibilite ki reel. Bann tel zarm ki kapab okazyonn destriksyon lamas, i en menas pou sekirite lemonn e sa la lentere Leta Ini.

Se pou anpese ki sa i arive e nou an retour nou

benefisye an term. Plis sirveyans nou *zone* maritim san okenn kou finansyel. Konservasyon nou stok pwason e lezot nou bann resours maren kont lapes ilegal e osi, lekipman e formasyon teknik dan domenn sirveyans.

Bann paramet legal egzistan anba *Maritime Zone Act* i permet lenplimantasyon sa Lagreman o moman ki nou ratifye li. I donk napa nesesite pou pas okenn nouvo Lalwa pou ki sa Lagreman i antre an operasyon.

I kler ki ratifikasyon sa Lagreman i prezant en sityasyon ganyan pou tou lede parti enplike. E mon pou donk demann tou Manm onorab pou aport zot sipor pou sa Mosyon. Mersi Mr Speaker.

MR DEPUTY SPEAKER

Mersi Onorab Monthly. Mon ava pas laparol avek Onorab Loze.

HON JOHAN LOZE

Mersi Mr Speaker. Mr Speaker enn bann kestyon ki pe ganny demande se. Ki lentere Leta Ini dan lanmer Sesel ouswa pou ed Sesel avek proteksyon son teritwar?

Sa, enn la an partikilye mon pa pe kapab reponn. Selman en keksoz petet ki ava ede eklersi nou en pe. Se ki

Sesel i annan li en bon listwar kot i konsern bann Lagreman Bilateral sirtou dan kad militer avek Leta Ini.

E sa bann keksoz normalman zot *stackable*, enn i *build* lo lot. E parey sa enn la ki senpleman dir zot apel li en *Shiprider Agreement*, kot *party a* i kapab *ride* lo *assets of party b*. Li i ti pou difisil met an fors, si Sesel ti napa deza en Lagreman *SOFA* avek Lanmerik *SOFA, State of Forces Agreement*.

Ki en Lagreman ki nou Sesel nou deza annan depi en pe letan avek Leta Ini, ki li i permet annan stasyonman bann lafors etranze, e i osi get lo kestyon prosekisyon, ki ziridiksyon prosekisyon pour bann lafors etranze i tonm *squarely* lo sa Nasyon ki ou pe *host* kot ou e i pa vin ou ki pou prosekite li.

E sa i bann keksoz ki zot Ameriken zot gete avan zot antre dan bann lezot Lagreman avek ou, ki si i annan bann agreman ki presed sa ki'n deza la an plas e son relasyon Bilateral avek ou.

E i annan en gran listwar, deza ant *Coast Guard* avek lafors bann diferan Lafors Ameriken, aköz ler mon dir diferan *US Marines* ki, i vin isi i diferan avek *US Navy* ki vin isi.

So bann diferan lafors Ameriken.

Se lo sa relasyon ki ganny etablir pandan plizyer lannen ki nou vwar sa enn Lagreman i vin devan nou ozordi.

Mr Speaker mon oule osi dir ki mon personnelman, depi le 25 Oktob lannen pase, mon'n esper sa zour ek pasyans kot *LGB* ti pou vin dan Lasanble pou anmenn bann tel Lagreman, pou anmenn bann tel Mosyon devan nou Lasanble.

E mwan mon pou repet en keksoz ki mon ti dir zot boner, nou pou travay ansanm avek zot, nou pou ed zot, nou pou pas bann keksoz ki bon pou Sesel.

Nou pa pou fer parey zot, zot ti fer. Nou pa pou fer parey zot ti fer, ler *State of Forces* ti vin devan Lasanble. Nou pou travay avek zot. Nou pa pou fer parey zot ti fer ler Lagreman *Tomlin* ti vin devan Lasanble.

Nou pou travay avek zot pou nou avans lentere nou pei Sesel de lavan. E rezon ki nou fer sa se aköz nou koman en parti nou realiz lenportans la souvrennte Sesel e pou protez la souvrennte Sesel.

So okenn zouti ki nou kapab gannyen ki pou ed nou ladefans nou teritwar, proteksyon nou souvrennte, nou *welcome* e nou dir mersi.

Mr Speaker mon pa pou long. Me selman an terminan, mon zis oule note an pasan pou dir sa i fer dezyenm Mosyon ki vini ozordi. E *still* i pa sa Mosyon ki ou ti'n promet pou anmennen pou sanksyonn mwan Mr Speaker. Mersi Mr Speaker.

MR DEPUTY SPEAKER

Mersi Onorab Loze. E mon krwar lefe ki ou'n adres mwan i pa pou konsonmasyon. Preski dezyenm fwa ou demann mwan sa kekyon e pou konsonmasyon piblik. Wi, sa Mosyon i pou vini. Mon pas laparol avek Onorab Cosgrow.

HON WALLACE COSGROW

Mersi Mr Speaker. Bonn apre Mr Speaker. Bonn apre midi tou Manm Onorab. E tou bann dimoun ki a lekout.

Mr Speaker Sesel malgre i en Pti Leta Zil, i ganny konsidere koman en gran Leta losean. Nou toultan ganny regarde koman en Leta tre stratezik dan sa parti sid was Losean Endyen, an vi nou pozisyonman zeografik.

Sesel koman en Leta i retir bokou benefis dan sa losean ki otour nou. Ki swa lo lanmer, ki swa lo lanmer e osi par anba bann laroul. Benefis i varye, depi lanvironmantal,

ekonomik e osi sosyal. Nou devlopman koman en Nasyon in an gran parti rezilta zesyon nou lespas losean.

Mr Speaker sa i sa zoli portre ki vre, e ki nou tou nou konnen, me malerezman parey nou konnen sa zoli portre i anba bokou *threats* e bokou defi. Ki swa lapes ilegal ki pa ganny regle e pa ganny raporte, piratri e menm vol nou resours natirel.

Koman en Pti Leta Zil, nou'n fer en kantite pou protez nou kont tousala. Me malgre tou nou zefor, aksyon ilegal dan nou lespas losean, i reste en defi pou nou pei, nou pa kapab fer li nou tousel.

Mr Speaker mon'n fer sa lentrodiksyon akoz i enportan sitye nou vizavi sa Lagreman ki devan nou Lasanble ozordi. Koman en Manm Komite Zafer Etranzer dan Lasanble, mon'n privilezye pou rankontre bann diferan Lotorite ki'n travay lo sa Lagreman.

Dabor sa Lagreman i vin lo en *backbone*, bon korperasyon e ekselan diplomasi ki Sesel in annan avek bokou lezot Leta. En diplomasi ki'n aktiv, ganny kiltive pandan bokou lannen avek Leta dan nou rezyon, me osi bann lezot Leta ki annan lentere dan nou rezyon; ki swa

lentere ekonomik, ouswa lentere sekirite, pou nonm de.

Mr Speaker sa Lagreman ki devan nou ozordi, i premyerman pe demann nou pou reaffirm nou korperasyon avek en pei, en *super power* dan domenn sekirite maritim. Leta Ini in enn nou bann *partner* for dan sa domenn e Sesel pti ki i pti, in benefisyè bokou pou proteksyon nou bann *borders*, atraver led maritim ek *training*.

Nou konnen ki Leta Ini i annan gran lentere dan sa parti lemond, pour rezon sekirite parey in ganny mansyonnen. Akoz bokou lorganizasyon teroriz i servi sa parti lemond sirtou la kot Les Lafrik pour bann aktivite ilegal.

Bokou in *involve* dan sa ki nou apel krim organize. Sa Lagreman i osi enn ki kouver bokou lezot keksoz ki pou anmenn benefis pou Sesel e in annan en prosis tre enklisiv dan bann diskisyon parmi bann diferan parti prenon.

Sesel i osi *leader* e tre avanse dan domenn sekirite maritim, gras a travay dir Gouvernman oparavan. E se sa ki fer bann pei parey Leta-z-Ini apros nou pou korperasyon.

Mr Speaker mon bezwen dir ki sa Lagreman i pou en lot zouti pou nou Sesel protez nou teritwar e nou souvrennte avek

led *partner* bokou pli eksperyanse, e ki posed bokou plis resours ki nou.

Tou led dan nou demars pou protez nou souvrennte, nou pei e nou pep i ganny byen apresye. Mr Speaker pandan nou bann enteraksyon ek bann profesyonnel ki'n travay lo sa Lagreman.

In osi annan lezot pwen ki'n ganny fer resorti. Bann pwen ki enportan pou nou koman en Lasanble osi mazin lo la tout an mazinan sekirite nou pei ek nou pep. Enn mon pwen ki, enn mon pwen ki mon ti souleve lo, se lo risk ki nou lasosyasyon avek bann *super power* dan bann diferan aktivite sekirite dan nou teritwar.

Eski i pa pou kree en sityasyon, kot nou ganny targete par bann groupman teroris akoz koudmen ki nou pe donner pou aret zot bann aktivite? Sa i en pwen tre valab ki mon krwar nou bezwen koz lo la, e dabor Onorab Georges dan son lentrodiksyon mon krwar in antre en pti pe ladan.

Mr Speaker lezot keksoz enportan ki bon note, i se ki nou pou servi nou bann fasilite ki nou annan pou ede enplimant sa Lagreman.

E finansyelman i kapab met en presyon lo nou. Parkont Mr Speaker, ler nou regard tou

sa ki'n ganny dir, mon krwar ki sa Lagreman i enn ki bon e ki pou permet nou met plis resours ansanm pou kapab protez nou parti losean e nou souvrennte.

Se dan sa laliny Mr Speaker ki mon pou aport mon soutyen pou sa Lagreman e donn mon sipor. Mon konvenki ki Sesel ki pou benefisye e pep Seselwa an zeneral.

Mr Speaker avek sa detrwa pti mo, mon a remerisi ou, pou donn mwan loportinite pou koz lo sa Mosyon e mwan parey mon'n dir mon pou donn mon sipor. Mersi.

MR DEPUTY SPEAKER

Mersi Onorab Cosgrow mon pas laparol avek Manm Elekte distrik Anse Etoile Onorab Romain.

HON GEORGE ROMAIN

Bonn apre midi Mr Speaker. Bonn apre midi tou bann koleg Onorab e tou dimoun ki a lekout. Mr Speaker mon osi mon pou donn mon sipor pour plizyer rezon pou sa Mosyon.

Premyerman Sesel i en pti pei e nou resours i limite. Parkont nou lanmer i *vast* e alor i enportan pou nou kapab sirvey li byen. Nou deza, pe fer fas avek bokou defi dan nou lanmer. Par egzanp bann bato

ki pe lapes ilegalman dan nou delo. Piratri e drog ki pe ganny trafike dan nou lanmer.

E alor mon *welcome* en tel Lagreman kot nou pe vwar Sesel pe ganny asiste pou ogmant proteksyon son bann resours maritim avek Leta Ini.

Mr Speaker nou konnen ki san proteksyon nou lanmer nou pou vwar plis drog, plis drog pe trafike dan nou delo ek lapes ilegal. Aktivite piratri i kapab ogmante. Sa i pou met an danze lavi nou bann maren e bann maren lo bann lezot bato ki pe pas dan nou *EEZ*.

Sa proteksyon nou rezyon pou vin en landrwa danzere. Sa i kapab fer nou perdi trafik maritim ki pe vin dan Por Victoria. Sa i pou definitivman fer nou Por mwen atiran e redwir reveni ki nou pei i kapab gannyen, anver bann aktivite Lekonomi Ble.

Par egzanp *SEYPEC* i vann son *fuel* ek bann bato ki vin dan nou lanmer. *Port Authority*, ki kolekte reveni ek bann ek menm bann lezot servis dan Por ki asiste bann bato.

Mr Speaker Sesel in deza benefisye atraver *UNAFOR*, kot bann bato lager enternasyonal ki ti, bann bato lager enternasyonal, ti pe protez nou lanmer dan bann moman kot

bann aktivite piratri ti o. E sa i ti aport bokou benefis pou nou pei.

Mr Speaker, konmela nou pe vwar kot nou *Coast Guard* pe deza fer en bon travay, pou entersepte lapas ilegal e osi fer la restasyon dan bann ka drog. E la mon ti a voudre, mon ti a profite pou remersi zot bokou dan sa bon travay ki zot pe fer.

En tel Lagreman alors, pou kapab agrandi konesans nou bann zofisye e ed zot dan laspe lantrenman ek teknik. E alors mon pou donn mon sipor total anver sa Mosyon. Mersi Mr Speaker.

MR DEPUTY SPEAKER

Mersi Onorab Romain. Ti ava fer en gran plezir pou mwan si tou nou deba ti deroul parey pe deroule la. An mwayen dimoun pe koz 2,3-5 minit, tre byen.

Mon pas laparol aprezan avek Manm Elekte distrik Baie Ste Anne Onorab Churchill Gill.

HON CHURCHILL GILL

Mersi Mr Speaker. Bonn apre midi tou Manm. Mon osi pou mwan i pou tre bref aköz bokou in ganny dir lo, lo sa Lagreman.

Ou konnen i pa toultan fasil ler en pei i annan en kalite zeopolitik, kot bokou *super power* i annan lentere ladan. I tre difisil. Menm si nou koman

en pti pei nou'n kapab annan relasyon travay avek pei parey *L'Inde*, parey Sinwan e la Lanmerik.

I pa neserman fasil pou *manage* 3 gro *super power* dan en sel landrwa. E alors mwan mon ti a demann ek loter Mosyon ki nou bezwen fer sir a tou moman nou pa kit nou gard ater, pou asire ki nou relasyon travay avek tou le trwa i etrwat, nou tou, i kler pou Sesel kwa ki anvi. E ki mannyer i pou *manage* sa trwa pouvwar.

Akoz i tre serye nou. Nou konnen tou le trwa sa pei zot annan kapasite nikleer e sa bann teroris, oubyen sa bann *drug dealers*, zot osi zot vin sofistike zour an zour.

So i tre probab ki a serten pwen a lavenir nou kapab vwar nou pe fer fas avek petet serten, kalite zarm i kapab servi ki kapab annan en lefe lo nou koman en pti losean, en pti pei. Alors mon ti a swete ki nou kit sa in *mind* ler nou pe *manage* sa trwa gro pouvwar i pou tre enportan pou en pti pei parey Sesel.

En lot klarifikasyon ki mon ti a kontan avek loter Mosyon. Anba *Financial Implication for Seychelles* pwen 2.2 lo Rapor IAC. Lo la in dir ki tou bann kou finansyel i pou ganny *bear* par sa bann diferan

pei. Me selman an menm tan in mete ekspekte dan bann letan kot i annan *joint operations*.

E dan sa bout *joint operation* i pa'n kler, ki mannyer sa kou ler i annan sa *joint operations* pou ganny partaze. Konbyen ki, lekel ki pou peye? E nou, nou konnen nou pli ptipti e nou pos i bokou pli ptipti e sa bann kalite kapasite ki Lanmerik i annan ler zot deplway zot bann *machinery*, son kou i bokou plis ki pou nou.

Alors petet ti a bon nou ganny klersi dan sa *joint operation* akoz i dir nou *except on joint operations* ti a bon nou ganny kler ki mannyer depans pou ete ler i pou annan sa *joint operation*? Mersi Mr Speaker.

MR DEPUTY SPEAKER

Mersi Onorab Gill. Mon a pas laparol aprezan avek Onorab Woodcock. Lo kote *LDS*.

HON WAVEL WOODCOCK

Mersi Mr Speaker. Deputy Speaker. Mosyon ozordi pe demann Lasanble pou ratifye Lagreman ant Gouvernman Lanmerik e Gouvernman Sesel konsernan *Counter Illicit Transnational Maritime Activity Operations*.

Parey plizyer Manm in dir Sesel i en pti pei avek en gran

EEZ, Economic Exclusive Zone ki mezir 1.3milyon *kilometer square* e i ase vast, i tre vast annefe.

E malerezman i annan bokou bann aktivite maritim ilegal dan nou lanmer. Parey in ganny mansyonnen nou annan bann aktivite piratri. E Sesel dan leparse nou'n ganny bokou afekte avek sa.

Annefe i annan bann bato ki'n deza ganny *hijack* dan nou lanmer e menm Seselwa in ganny met otaz. E in deza arive, i pa vedir ki resaman sa bann aktivite pa pe ariv lo lanpler parey ti pe arive avan, ki pa pou ariv ankor.

Alor i enportan ki nou *EEZ*, nou lanmer pe ganny *monitor* dan en fason adekwat pou fer sir, ki nou bann sitwayen osi i ganny proteze dan nou lanmer. E osi bann lezot, bann lezot bato ki antre dan lanmer Sesel.

E bann lezot aktivite ilegal ki'n vwar dan nou lanmer, i nou'n rakoursi en konsern ase serye se lapes ilegal, trafik drog e sa en keksoz ki i annan en lenpak vreman negativ, advers lo nou pei.

E i menm i annan bann lefe advers lo menm nou zanfan, nou'n tande lo Mosyon oparavan kot ozordi malerezman nou pe vwar ki dan

lepase nou'n vwar kot drog in antre dan lekòl, kot menm ozordi i annan lekòl ki ANB i bezwen vini anmenn lisyen pour santi sak nou bann zanfan, konmsi ki pa zoli.

I vreman sagrinan. E nou konnen ozordi bann statistik lo kote *drug addiction* i ase o.

Ozordi nou annan anviron 6mil ekek dimoun, Seselwa ki *addict* avek drog e sa bann keksoz in arive anba *watch* Gouvernman presedan. E malerezman ozordi se nou Gouvernman ki'n *inherit* sa, e nou pe sey fer tou nou posib pou seye *deal* en pe ek sa sityasyon.

Me malgre Mr Speaker ki annan en bann ki sorti dan ansyen Gouvernman ki dan Lopoziyon, ozordi zot ankor pe lager lebra kase pou defann bann *dealer* drog.

Bann ki'n anmenn sa pwazon dan nou pei ki pe afekte nou zanfan, dan nou sosyete ozordi Mr Speaker. I annan menm bann ki dan sa Lasanble ki pe defann sa bann *dealers*.

Mr Speaker parey mon'n dir drog i kout nou sistenm lasante bokou, pou tret bann adikt. Ozordi en kantite larzan pe ganny depanse pou anmenn *methadone* dan nou pei, e menm bann tretman medikal

akoz bokou i ganny afekte avek sa bann *hard drugs* parey eroin.

E plizyer nou bann zenn in perdi zot lavi, e i annan manman ki malerezman zot zanfan zot in vwar zot zanfan perdi zot lavi.

E mwan mon osi Mr Speaker, sa i tous mwan profon akoz mon'n perdi en Manm mon fanmir avek, avek drog.

E mon konnen en keksoz serye e nou Gouvernman nou'n dir, nou'n donn en langazman ki nou pou fer plis posib tou sa ki nou kapab pou nou seye *curb* en pe e aret sa fleo ki pe devaste e detri nou zenn Sesel, Seselwa ozordi.

Mr Speaker parey mon dir sa sityasyon i pe met bokou presyon menm lo nou sistenm lasante. E parey enn de entervenman avan mwan in koze i difisil e, i menm preski enposib pou nou tousel koman en pti pei, avek sa resours limite ki nou annan pou nou *monitor* e patrol nou lanmer, nou *EEZ* ki vreman, gran ki vreman vas.

E sa se rezon akoz nou bezwen bann partener enternasyonal bann lezot pei, pou ed nou entersepte sirtou sa bann bato ki pe fer *drug trafficking* dan nou lanmer Sesel ozordi.

Alor Mr Speaker sa Lagreman Bilateral i en *win-win*

pour Sesel ek *US*. Wi i annan sa konsern *geopolitics* nou en pti pei, ozordi i annan plizyer sa bann gro pei ki i annan lentere dan nou lanmer. Nou annan *L'Inde*, nou annan *La Chine* nou annan lezot pei ankor, *La France* e osi Lanmerik.

Me selman nou Sesel an *tout en gardant* nou *sovereignty* i enportan koman en pti pei ki nou *friends to all, but enemy of none*. E i enportan pou nou sa bann Lagreman Bilateral e Miltilateral avek bann pei, bann lorganizasyon pou osi ed nou pou *safeguard* nou lanmer, nou pei e osi nou lentere.

Alor Mr Speaker, ankor enn fwa parey mon ti pe dir oparavan, en lot *issue* ankor ki en Manm in fer sorti se ki, sa konsern *terrorism* ozordi dan nou pei, ki pa dan nou pei, me aneife *worldwide* dan bann pei.

Sirtou en pei parey Lanmerik ki'n ganny bokou afekte, *Drugs trafficking* i *the main*, i sa keksoz ki ganny servi plis pou *finance terrorism* dan lemond. E Lanmerik li i konn sa tre byen, E se petet sa aköz i annan en lentere spesyal, en lentere dan nou lanmer aköz bokou bann bato, sa bann transportasyon, sa bann drog, sa bann drog ilegal i pas atraver nou lanmer.

Bann bato ki sorti Iran e lezot pei ankor i pas atraver nou lanmer, e se atraver lavant sa bann drog ki zot ganny larzan pou *finance* bann akt teroris dan plizyer bann pei dan lemond.

E en lot konsern ankor ki nou konnen Lanmerik i annan se sa *issue WMD, Weapons of Mass Destruction*. Bann materyo parey *graphites* ki osi kapab pas dan nou lanmer pou al dan bann lezot pei.

Alor Gouvernman li i pe fer -. Alor li Lanmerik i annan lentere pou li osi entersepte sa bann bato lo lanmer. E se avek sa Lagreman i pou osi permet zot pou zot kapab entersepte sa bann bato ki pe transport sa bann, sa bann lekipman, bann teknolozi, bann materyo ki ganny servi pou fer sa bann, sa bann zarm nikleer.

E menm si nouvo Gouvernman pe met plis lanfaz pou entersepte bann bato ki pe trafik drog, e menm osi pe lapes ilegalman dan nou lanmer, nou *still* bezwen parey mon'n dir sa bann pei zanmi.

Me mon pou bezwen note Mr Speaker poudir nou Gouvernman nou'n vwar bann ki pe swiv nouvel, ki pe swiv medya ki pe arive dan nou pei, nou'n vwar depi ler nouvo Gouvernman in vin o pouvwar i

annan en lentansite, i annan en logmantasyon lo lakantite sa bann dav, kantite bato ki pe ganny entersepte dan nou lanmer.

Swa ki pe lapes ilegalman, ouswa bann bato ki pe transport drog annefe *weekend* pase la, in fek annan en bato ki'n ganny sezi. En gran lasezi drog ki kout anviron si mon pa tronpe \$20milyon son *street value*.

Alor i montre poudir Gouvernman *du jour* i pe met en lanfaz ekstra e spesyal pou seye rezourd e rektifye en pe sa *issue* drog dan nou pei.

E in osi ganny fer sorti ki Sesel pe perdi anviron \$7.5milyon par lannen atraver lapes ilegal. E nou pa pe zis perdi ekonomikman, me osi nou pe, nou resours ozordi pe ganny afekte, i annan presyon lo nou resours. Nou resours, nou pwason, bann lespes maritim pe ganny *overexploited*, nou pwason e lezot lespes.

E Sesel i en pei ki nou met bokou lanfaz lo konservasyon nou resours, nou pwason, nou bann lezot lespes maritim pour fitir nou zanfan, fitir nou zenerasyon.

E Leta Ini i en *partner* enportan pou Sesel e nou bezwen ranforsi korperasyon

sirtou kot i konsern sekirite maritim nou pei avek Lanmerik.

Avek sa de mo Mr Speaker mon, mon pa vwar nanryen mal avek sa Lagreman. Sa Lagreman Bilateral e mon pou siport sa Lagreman avek sa de mo mon dir ou mersi Mr Speaker.

Mersi Onorab mon ti pe al dir ou *wrap-up* akoz ou ti pe al lo 10minit. Mon a pas laparol avek Onorab Rocky Uranie.

HON ROCKY URANIE

Mersi Mr Speaker. Bonn apre midi tou dimoun. Mr Speaker Sesel i en Pti Leta Zil avek en gran siperfisi lanmer. Nou bann zil granitik e koralyenn i eparpiye dan sa gran Losean Endyen, ki i fer ki annan zil ki tre lwen avek zil prensipal Mahé.

Nou lanmer ek nou later i tre ris dan bann fason inik e sa i fer ki bokou pei, bokou group dimoun, oubyen dimoun endividyel i annan bann lenterere pou vin sey retir ilegalman maksimonm benefis atraver nou resours, san ki nou apersevwar.

Sa kalite pratik si pa ganny arete a longer ditan i pou met bokou presyon lo nou stok pwason e lezot resours maren ki kapab anmenn bann lefe advers lo nou lekonomi.

Mr Speaker i malere poudir nou osi annan nou prop Seselwa ki zot osi zot kontribye bokou pou bann aktivite ilegal dan nou lanmer.

Nou *Zone Eksklizif Ekonomik* i tre *vast*, e nou napa sa kapasite resours imen, resours materyel e osi teknik pou nou kapab protez, siperviz e entersepte tou bann kalite aktivite ilegal ki deroule dan nou lanmer parey fodre.

Pozisyon Sesel zeografikman i fer li tre stratezik, pou bann aktivite maritim ilegal ganny byen maske e egzekite. Lannwit koman lizour plizyer bato i travers Losean Endyen e nou lanmer san eksepsyon.

Nou annan plizyer laprev ki zot travers nou lanmer ilegalman pour zot fer bann trafik ilegal parey transport drog, zarm, trafik imen, lapes ilegal piratri e lezot aktivite nou menm nou, nou pa ni mazin apre.

Mr Speaker si mon pou *être* pli spesifik, La Digue mon zil i annan bokou aktivite maritim ki arive toulezour. Bokou touris i al ekskirsyon lo bann Zil Pros. Bato *cargo* ki savoy marsandiz, bato lapes, bato pasaze e bann *yacht* ki sirkil bokou ant nou bann zil.

Sa bann dimoun e operater i bezwen sekirite. Nou'n deza vwar kot bann kriminel enternasyonal parey pirat ti *hijack* nou bato e *kidnap* Seselwa e sa ti afekte nou dimoun e nou pei bokou. Sesel i enportan pou annan sekirite maritim ki donn konfyans tou dimoun, tou pei, tou bann operater bato ki travers nou lanmer legalman pou al ver zot destinasyon. Kot nou pei i sitye i enportan pou gard sa bon repitasyon maritim ki anmenn benefis ekonomik.

Mr Speaker bokou sa bann aktivite i deroule dan nou lanmer, aköz petet sa bann kriminel i annan lenformasyon lo nou defayans. Zot konnen ki nou napa ase resours ek teknolozi ki kapab sirvey zot malgre Sesel nou'n toultan sey fer nou mye posibil pour sirvey nou lespas maritim.

Nou'n vwar plizyer bato ganny arete an relasyon avek bann aktivite ilegal e anmenn dan Por Victoria. Sesel i bezwen sipor pou ede siperviz son gran lespas maritim.

Me Sesel li tousel pa tou aktivite maritim ilegal ki nou pou kapab detekte. Mr Speaker plizyer pei in siny oubyen ratifye bann gran, bann Lagreman Bilateral e Miltilateral pou ed e siport

kanmarad dan meyer fason posibil, pou anpese ki bann aktivite maritim ilegal i kontinyen arive dan zot lanmer.

Sesel i pa en leksepsyon alòrs nou osi nou bezwen ratifye sa Lagreman Bilateral ant Sesel e Leta Ini pou lit kont sa bann move pratik byensir ilegal ki deroule dan nou lanmer.

Sa Lagreman pou fer ki ziridiksyon maritim pa pou vin en baryer pou anpes bann kriminel ganny *deal* avek. Leta Ini li menm in deza siny Lagreman ek lizyer pei pou ede lit kont bann aktivite maritim ilegal atraver lemonn.

Leta Ini i en pei tre pwisans o monn avek en repitasyon ekstraordiner sirtou dan domenn sekirite sirveyans e osi byen renonmen pou ofer lasistans pei ki dan bezwen.

Ratifikasyon sa Lagreman pou re-afirm komitman ant le de pei e anmenn bokou benefis pou nou pti pei Sesel dan plizyer fason.

Sesel pou santi e konnen ki i pa tousel dan sa lalit kont bann aktivite maritim ilegal. Nou pou benefisye avek resours lo lanmer e dan lezer. Nou pou benefisye ek leksperyans e ekspertiz ki pou ganny partaze sipor teknik, sipor teknolozi sistenm lenformasyon byen

kordinen, e byensir plis resours imen lo sirveyans.

Mr Speaker an dizan tousala mon osi annan rezervasyon dan lesans ki si en bato Ameriken i entersepte en lot bato ki annan zarm tre danzere ki kapab fer destriksyon lamas oubyen bann kemikal tre danzere. Eski nou anmenn dan nou Por? Sa pa pou met nou a risk? akòz nou tre vilnerab nou napa sa kapasite pou *deal* avek sa bann keksoz. Ki pou arive dan sa sityasyon?

Nou bezwen osi asire ki lenformasyon lo, loperasyon maritim pa ganny devwale avan ler ki loperasyon in terminen. Avek sa de pwen refleksyon Mr Speaker mon termin mon lentervansyon an dizan ki mon pou siport sa Mosyon. Mersi.

MR DEPUTY SPEAKER

Mersi Onorab Uranie. I reste nou, i reste nou trwa Manm pou entervenir. Mon ti ava kontan si nou ti kapab *wrap-up* lo sa enn Protokol *by 4er*.

So kalkile ki zot pa sot, *try not to go beyond 10 minutes*. So mon ava pas laparol avek Onorab William ki osi *Chair IAC*. E mon krwar ki son prezantasyon pou, annan en bout Rapòr Komite lo sa. Non? *Ok, go ahead*.

HON WAVEN WILLIAM

Mersi Mr Speaker. Bonn apre midi tou dimoun ki a lekout. Mr Speaker lefe ki sa rapor in ganny sirkile e parey ou vwar i annan bokou Manm ki'n koze e bokou bann pwen in ganny kouver.

Me ki mon ti a kontan koz lo la mwan. Premyerman se remersi Sekretarya atraver Depite Clerk pou fasilite nou miting avek bann lazans konsernen, pou nou kapab anmenn sa Mosyon devan Lasanble atraver *Leader Zafer* Gouvernman.

Dezyenman mon ti a kontan azoute ki, en nenport Gouvernman ki ti pou ganny elekte. Swa *One Seychelles*, swa *US* anba "Koste Sesel," me pep Seselwa in swazir *LDS* avek son tenm "Sesel pou tou son zanfan," i ti pou napa swa, pa anmenn sa Mosyon pou ratifikasyon.

Mr Speaker sirtou lefe ki pandemik *COVID* in met nou ater lo zenou, avek nou laspe ekonomik. Me sa ki *LDS*, Gouvernman *LDS* in promet Seselwa par ratifikasyon sa Trete, i pou permet li akonplir bokou sa bann keksoz parmi lezot.

Par egzamp Mr Speaker bann gran laliny ki dan

manifesto i tous lo la se:- anmenn Sesel odela *COVID*. Fer Sesel ou Gouvernman, ouver loportinite pou tou Seselwa, ogmant reveni e standar lavi, konstrir en meyer pei, batir en sosyete ki rezilyan, envestir dan nou lazenes.

Mr Speaker sa bann gran laliny, i pa pou ganny realize dan 6mwan, ouswa dan lan. Me atraver ratifikasyon sa Lagreman ki form parti en bann lenstriman ki pou anmenn bann retonbe ekonomik pou Sesel.

Mr Speaker in annan bann konsern taler ki, wi i bann konsern ki koman bann Manm Parlman nou bezwen met devan vizavi kalite aktivite e bann entersepsyon ki kapab ganny fer dan rezyon nou Losean Endyen, nou losean.

Be Mr Speaker en nenport pei parey nou koman en pti pei, nou pa kapab pa pran sa risk, par lefe ki ler ou napa kapasite, me ou anvi vwar en devlopman sosyoekonomik soutenab, ou napa swa.

E ler ou konnen poudir ou depan, ou an gran parti lo tourizm, aktivite tourizm. Lapes ki pilye ou lekonomi. E mon santi poudir par ratifye sa Lagreman a donn serten garanti pou nou kapab vreman permet Gouvernman realiz bann

lobzektif ekonomik, an menm tan pa oubliye poudir nou pe koz lo lapovrete, 40poursan lapovrete.

Me si nou pa fer keksoz, lekel ki pou fer pou nou? Nou bezwen nou menm nou, i komans avek nou. E mon kontan ki Parlman ozordi pou al ratifye sa Lakor.

Mr Speaker letan ki Sesel pe avans son Polisi Zafer Etranzer nou tenir kont ki nou zanmi tou pei, me nou pa lennmi avek sa bann pei.

Mr Speaker be i pa vedir ki letan nou annan sa filozofi ki nou pa pran bann mezir pou nou sofgard nou lentere. E letan *IAC* in zwenn avek bann Lazans konsernen. Nou'n demann bokou kestyon e nou'n met bann konsern devan. E ozordi mon ti a kontan reasir sa Lasanble ki atraver bann entervansyon ki nou'n gannyen e larepons nou santi poudir nou ase konfortab.

E pa oubliye poudir ozordi dan lemonn diplomasi bann pei i evalye, i evalye kapasite enn a lot e Sesel i toultan ganny favorize parmi bann serk enternasyonal.

Mr Speaker mon ti a kontan osi avan mon fini remersi tou bann Manm *IAC*, ki'n partisip dan sa diskisyon,

pou kapab arive konklir sa rapor.

Me mon ti ava demande an terminan ki Komite Ladefans i zwe en rol enportan vizavi sa ratifikasyon, sa Lagreman ki nou pe al fer ozordi.

Mon konnen poudir sa Komite pe fer en bon travay, nou felisit zot e nou ti a kontan ki zot larg en lizye ouver, e pre vizavi lenplimantasyon sa Lagreman.

E an menm tan mon ti a kontan demann tou bann Manm Onorab, pour met lespri partizan de kote, pou donn en vot inanim pou nou ratifye sa Lakor ki pou anmenn bokou pou Sesel. Mersi Mr Speaker.

MR DEPUTY SPEAKER

Mersi Onorab William. Mon a pas laparol avek dernyen entervenans. Onorab Sebastien Pillay 10minit i a *ok*?

HON SEBASTIEN PILLAY

Mersi Mr Speaker. Mr Speaker premye fwa ki mon ti ganny sans *acquaint* mon lekor avek sa Protokol sete an 2020 kot ti annan lentansyon pou li vin devan, devan Lasanble apre ki *Cabinet* ti'n *approve* li an Me.

Me ti'n toultan annan difikilte sa letan pou ganny li pou vin lo *Order Paper* akoz

bann lezot size ki ti pe vin devan, devan Lasanble.

E sa Protokol i enn ki tre enportan akoz i *set* serten paramet, paramet lesanz Bilateral ant le de pei, ant le de lafors si oule. E i en Protokol ki vize, si ou regard li dan en konteks eksplisit ver korperasyon militer, ant de pei.

E mon krwar loter Mosyon in fer, in fer en prezantasyon ase konpreansiv kot in eksplik bann diferan eleman sa Protokol. Me kot in osi soulev bann pwen si oule kontansye, ki trouve dan sa Protokol akoz sa bann pwen i kontansye, akoz. I annan en eleman enportan ki nou, nou bezwen konpran koman en pti pei.

E sa se sa eleman kou ki asosye avek nenport aktivite ki'n *involve* nou lekor avek lafors pli pwisan, pli gran ki li son resours i limite. E ki li i annan abilite pou li kapab fer bokou plis ki nou, nou kapab fer.

Napa nanryen mal ek sa Protokol e byensir mwan lo mon konte latav, lo sa kote latav e nou'n toultan koman en parti dan Gouvernman nou'n toultan annan tre bon relasyon avek Gouvernman Ameriken. I en keksoz ki nou pou siporte. Me i enportan pou nou met serten

keksoz devan pou nou, fer konpran dimoun ki mannyer nou reakte otour sa bann size.

Mon'n tann en entervenans oparavan ki'n fer - mon, pa sa ki'n koz avan pa, pa avan Onorab William. Me avan mon krwar sete Onorab Woodcock - Mon pa konnen si Onorab Woodcock ki'n fer en rabasman en pe drol. Ki pou mwan i ..

MR DEPUTY SPEAKER

Non - mon krwar mo 'rabase' i pa apropiye.

HON SEBASTIEN PILLAY

I pa apropiye. *Ok*. Ki'n fer en, menm 'ladyare verbal 'pa bon?

MR DEPUTY SPEAKER

Non sennla pa devret en repons.

HON SEBASTIEN PILLAY

Ok. Mon rod enn pli bon. Ki'n, koze me mon pa konnen ki'n dir vreman. Ki pou mwan i montre ki mannyer i annan en *failure* lo lapar serten politisyen pou nou konpran ki serten keksoz nou bezwen fer li ansanm.

Serten lager nou bezwen anmenn li ansanm akoz nou pa pou ariv pli devan si nou, nou redi de kote. Bomaten malgre nou'n annan diverzans lo lafason ki nou'n apros deba lo sa Protokol ki annan pou fer

avek kominikasyon. An sa ki konsern Drwa Zanfan.

Me mon krwar ler nou'n ekout tou bann Manm, ler mon'n ekout Onorab Loizeau mon'n ekout Onorab Cosgrow lo tou lede kote latab. Malgre in annan sa diferans lapros. In annan en konverzans ki travay i bezwen ganny fer ansanm.

I pa pou kapab ganny fer dan en fason separe. E mon krwar se sa ki nou tou pe rode, se sa ki nou tou nou le vwar.

Me selman i annan serten keksoz ki konsern mwan petet ki nou bezwen met an perspektiv. Par egzanp, resaman nou'n vwar sa size sa de dav ki Prezidan Larepublik dan enn son diskour ek Lepep Seselwa ti pe koz lo la.

E ki la aprezan nou'n tande poudir bann *crew* sa de dav in ganny large. Mon krwar nou'n tande non? Kot nou koz lo sa bann Pakistan ki ti ganny tyonbo aparaman ganny tyonbo e nou pe tande poudir zot in ganny large.

In annan en kou asosye avek pran sa bann dav anmenn isi. Mon krwar menm Prezidan ti lo Por pe esper zot. E i ti dekrir sa koman en loperasyon, me ki'n arive ek sa loperasyon, lekel ki'n *bear the cost of* sa?

E mon krwar sete sa kestyon Onorab Churchill Gill,

ler nou pou anmenn sa bann bato, letan nou pou anmenn zot isi. *The cost of* anmenn zot isi, *the cost of hebergement* sa bann *crew*, *the cost of feeding* zot. La parey sa bann Pakistani ki nou pe aprann dan Nouvel in ganny large, ki pou arive?

Ti sipoze en loperasyon serye ki Prezidan ti anonse, me i paret i pa, i pa'n abouti. Me parkont mon felisit *Coast Guard* ki toultan vizilan, ki toultan pare pour zot komit zot lekor.

E mon annan gran respe pou nou lafors militer, akoz mon konnen poudir nou bann zonn dan liniform zot bann dimoun ki met zot lavi devan pou nou, pou asire ki nou, nou dormi *safe* aswar. Kan zot, zot lo lanmer pe patrole pou protez nou, pou protez nou pei, pou protez nou lavi.

E mon krwar sa i en keksoz enportan e fondamantal ki nou bezwen met an perspektiv. E en lot eleman enportan ki'n sorti dan sa deba, se sa eleman zeopolitik. E mon krwar i enportan ki mannyer nou koman Sesel nou kontinyen sitye nou dan sa, dan sa. Mon pa pou dir en zwe, me dan lafason ki nou apros zeopolitik nou rezyon.

Mon krwar Prezidan Rene li ti annan en prensip, *friend to all, enemy to none*. E mon krwar

sa i en keksoz, ki nou bezwen koz lo la.

Mon konnen Onorab Georges i mazin letan nou al *Non-Aligned Movement* i pour dir mwan poudir sa ti diferan avek prensip ki a en moman Mr Rene ti pe koz lo la. Me mon krwar sete sa ki *encapsulate* sa ki nou, nou koman en parti nou krwar ladan. Se ki napa okenn lafors ki annan swe dan nou rezyon, ki fer ki vin opresiv dan lafason ki sa lafors i kapab fer son louvraz.

Akoz be *mindful* bann ki'n frekant lanmer, dek koman ou komans kit Mahé, Mahé i koule parey bokou dimoun i dir sa etandi lanmer ki nou pei i annan, san kont son labote i *enkwa-yab!* Enkwayab.

E ler ou pe get anler ou pe vwar sa ki ou pe vwar anler, me ler ou pe get sa ki annan anba se delo sale. Sa ki annan dan sa delo sale, sa ki kapab ganny tire ladan. Sa ki annan dimoun, mon krwar sete ansyen Prezidan Michel ti dekrir sa konman Lor Ble;- i annan plizyer dimoun i dekrir sa koman Lor Ble. I, mon pa konnen napa mo pou dekrir.

E mon krwar Onorab Cosgrow in dir sa ki kantite lannen i annan dimoun pe vini ki pe antre sorti pe pran sa e pou bann ki'n lo Komite Zil dan

Lasanble presedan Onorab Georges in lo Komite. Ki'n ganny sans vwar lo bann zil parey *Cosmoledo*, bann pti *shack* ki bann, bann *Malgache* in konstrir pou zot vin lo zil kot zot in pran banbara lo resif, zot in pran bann lezot, lezot, lezot sa.

I annan sitan aktivite ki pase dan nou etandi, dan nou siperfisi lanmer, ki lo nou tousel zanmen nou pou kapab abouti pou nou kapab protez tousala. E se pou sa rezon ki nou, nou bezwen kapab anmenn bann partener.

Me dan en fason ki sa bann partener pa vin opres, oubyen pa vin en presyon lo nou kot nou, nou santi poudir nou souvrennte, nou abilite pou mannevre i ganny afekte par aköz nou annan relasyon privezye avek en partener ou en lot.

Me mon krwar sa bann Protokol ki permet nou annan sa bann relasyon e bann retonbe pozitiv parey loter Mosyon in koz lo la *training*, retonbe ekonomik, mon krwar tou Seselwa i rapel bann korvet ki vin dan Por. Ganny sans al vizit bann korvet.

Lontan nou i ganny sa bann sapo ki annan non sa bann korvet lo la, ki ti tre popiler parmi Seselwa. Depans

ki sa bann maren pou anmennen dan kominote si *COVID* i kit nou e permet nou fer sa.

Mon krwar sa i bann keksoz ki nou, nou pe rode. E sa ki mon krwar mon pou demann loter Mosyon pou vokalis lo la, se sa kou ki pou anmennen pou nou e ki mannyer nou pou asire ki sa kou pa vin en fardo si oule pa vin en lenpak lo nou?

Mon pa santi i pou vini, me lefe ki i kapab annan lefe ki *COVID* pe afekte bann pei larezyon, par egzantp nou konnen Somali osi pe ganny afekte. Sa ki dir ki demen sa bann pirat pa deside rebran lanmer akoz zot osi ekonomikman zot dan problemn?

E si zot deside rebran lanmer definitivman i pou annan en kou asosye avek travay ki nou bezwen fer pou nou, pou nou *deal* ek sa sityasyon.

So i pou annan, i pou annan en kantite *thinking* ki ale otour sa e ki nou, nou bezwen fer pou nou asire ki, *we get the best of* sa bann Protokol e aktivite ki ganny fer konzwentman i anmenn en benefis tanzib pou nou pei.

Mr Speaker mon pou konklir par dir ki, si i annan en

keksoz ki definir nou karakter koman en Seselwa, se nou abilite pou nou kapab *welcome* tou dimoun, e travay ek tou dimoun.

E mon krwar sa i en keksoz ki klerman sa bann Protokol kot i, kot nou, kot nou'n sinyen, kot nou annan bann Lagreman, bann Konvansyon ki permet nou annan bann lesanz ant bann pei.

Nou'n annan sipor *L'Inde* dan nou domenn militer pandan plizyer lannen, nou'n annan sipor lezot pei. Mon krwar sa i bann keksoz ki nou bezwen kontinyen garde e kontinyen mentenir e met lanfaz lo la.

E sa diplomasi pou kontinyen aport fri pou nou, i en keksoz ki nou bezwen, ki nou bezwen fokaliz lo la.

Mon terminen Mr Speaker. Me an terminan osi Mr Speaker si ou a permet mwan en pti minit, pour mwan dir en si oule en parol en dernyen *adieu*, en kondoleans pour en zanmi ki mon'n tande *in passed away*. Mr Lorenzo Laurence ki ti en dimoun tre aktiv dan domenn *volleyball*, mon krwar nou tou nou a rapel sa portre ki i ti tire, mon krwar avek lekip Beau Vallon ler zot ti pran *SVF Shield*.

E mon konnen ki lafanmir pe resanti en moman tristes, i ti en dimoun ase zenn e ki'n kit nou soudennman aköz bann sityasyon aktyel ki nou pe pas ladan.

E mon krwar ki nou tou i refleksyon pou nou ki nou lavi i presye e ki nou, nou gard lapriyer tou bann dimoun ki perdi en pros dan bann moman difisil parey nou pe pas ladan.

E mon demann tou bann ki ti konn lafanmir Lorenzo bann ki'n dan *sport* ki'n konn li pou annan en panse pou li ek son fanmir ozordi ki nou'n aprann sa nouvel tris. Mersi Mr Speaker.

MR DEPUTY SPEAKER

Mersi Onorab Pillay. Sa i ti konklir lalis bann entervenans lo sa Mosyon ozordi avan mon pou pas laparol avek loter Mosyon.

Mon'n swiv en pti pe, bann deba ki'n ganny fer. Mon mwan ti annan zis de pwen ki mon ti ava kontan i klarifye. Si annan lenformasyon avek li poudir nou, e konbyen pei Sesel i annan en Lagreman parey, ou si sa enn la i premye?

Sa i premye pwen. E dezyenm pwen, sa *phrase* "Friend to all. enemy to none." Mon ti ava kontan i klarifye avek nou lekel Prezidan Sesel ki ti dir sa byen? Aköz plizyer

Manm in koz lo la, so zis pou nou kapab *set the record straight*. Mersi.

HON BERNARD GEORGES

Mersi Mr Speaker pour donn mwan laparol pou konklir sa deba ape midi. Mon ti a kontan o komansman rezwenn Onorab *Leader* Lopoziyon pour pas kondoleans nou kote latab osi, pour lafanmir Lorenzo ki son papa Rocky.

Mwan mon ti plito konn son papa Rocky ki ti en dimoun ki ti souvan kot nou e ki li osi in perdi son lavi pa tro lontan pase. E sa i en doub trazed i alor zot lafanmir i dan nou lespri, e dan nou lapriyer a sa moman. E mon krwar nou tou nou *attrister* ler en dimoun dan son karantenn lannen i perdi son lavi. E sa i en moman tris apre midi.

Mr Speaker mon ava reponn ou kestyon, ou dezyenm kestyon. "*Friend to all, enemy to none*" ti ganny *coined* par Prezidan Mancham. Mon pa rapel si i ti ler i ti vin Prezidan, dan Gouvernman koalisyon. Oubyen ler i ti vin Premye Minis an 1974. Sa mon pa sir.

Me definitivman mon krwar *the record will show* ki se li ki ti *coined*, ki ti *coined* sa fraz e ki'n ganny servi apre par tou bann Prezidan siksesif ki'n vini.

Pa tou avek, avek menm lentansyon, me zot tou zot in servi li.

Annefe i en fraz ki mon konnen ki serten politisyen pa ti dakor avek. E mon pa pe koz zis politisyen lo kote, *SPUP*, *SPPF* sa lepok. Me menm lo kote *SDP*, *DP* eksetera pa tou dimoun ki ti dakor avek sa, avek sa loptik.

E serten dimoun ti krwar ki, i ti en pe vid koman koman en Polisi. Akoz i pa ti realis. Dan, e sa moman, ti moman *La Guerre Froide* parey nou ava konnen ti annan trwa blok dan lemonn. Ti annan blok Sovyetik, ti annan blok Lanmerik, apre ti annan blok Non-Alinyen, ki nou, nou ti form parti ladan. E ki ti pa ti al tro lwen akoz i ti mor ase boner.

Donk, me i en konsepsyon ki, i en konsepsyon ki anmezir ki mon pe ekout deba apre midi. I pa en move konsepsyon pou nou, pou nou adopte a sa moman. Akoz ane nou'n met li an aplikasyon. Nou napa bokou lennmi apard pirat ek droger, ek trafikasyon drog, ek bann dimoun ki pe vin lapas ilegal.

Me lo nivo bann pei otour nou, nou napa lennmi. Nou annan plito zanmi. E si i annan en keksoz ki Sesel in fer byen, depi son lendepandans e la mon pa pe, mon pa pe mazin okenn

politisyen spesifik, ou plito mon pe mazin tou bann politisyen, zot in kapab *manage* sa danse san ki zot in mont lo lipye kanmarad.

Nou'n danse avek *La Chine*, nou'n dans avek *L'Inde*, nou'n dans avek *La France*, nou'n dans avek Lanmerik, nou'n dans avek Linyon Sovyetik, nou'n dans avek *La Russie*. Nou'n dans avek *Coreé du Nord*, nou'n dans avek *Coreé du Sud* e nou'n, nou'n plito, nou'n plito *manage* byen nou loptik.

Gard en serten distans avek tou dimoun, pa donn personn en baz militer ki en tre bon nide. Me an menm tan, pran otan keksoz ki zot ofer nou, san ki nou dir avek enn, ki nou pa kontan sa ki li i pe donner e ki nou prefer sa ki en lot pe donner.

Mon krwar nou devret aksepte ki bann Gouvernman o fil sa letan depi Lendepandans i pa'n mal zwe sa zwe diplomatik avek bann Nasyon ki pli gran ki nou. Malgre zot tandans politik mon krwar zot tou zot in zwe en zwe politik, en zwe diplomatik ase bon.

Donk nou vin - nou retourn lo nou, lo nou *Agreement*. Ou'n demann mwan dezyenm kestyon. Si mon annan okenn lide konbyen

lezot *Agreement* parey ki nou'n antre, antre ladan? Mon pa konnen Mr Speaker mon ava fer li mon devwar pou mwan demann avek bann lotorite ki konnen. Me mon pa konnen avek konbyen, mon konnen ki nou annan *Agreement* avek plizyer pei pou lesanz militer.

Sa i kler. Nou vwar sa nou konnen ki nou annan avek *La France*, i annan loperasyon tanzantan Kato Nwanr ki ganny fer. Nou konnen ki nou annan avek *L'Inde*. Akoz nou'n vwar bann lantrener Endyen vin isi. E mon sir ki i annan avek lezot pei, me mon pa konn, mon pa konn bann detay e *autre* apre midi la.

Mr Speaker i annan de keksoz mon ti a kontan aborde, anmezir ki mon pe pran laparol pou *wrap-up* sa Mosyon apre midi. Enn se kou, Onorab Churchill Gill in lev sa pwen e Onorab Sebastien Pillay in anplifye. Kou i toultan en problem.

E mon rapel *Leader of Government Business* avan mwan, ki ti asiz dan sa sez, sak fwa ki i ti prezant en Mosyon pou ratifikasyon, i ti toultan pas en paragraf pou eksplike, ki benefis nou pou gannyen e ki kou nou pou bezwen, nou pou bezwen abzorbe.

Sa ti son *template*. E toultan ler mon ti zwenn li an koulis mon ti dir li, "Akoz ki, akoz ki toultan ou pe rod benefis? Akoz pa toultan ki annan en benefis dan en serten keksoz ki ou fer." Me i ti dir mwan sa se son lafason fer.

Kou i en keksoz enportan. Me i en keksoz entanzib. Parey la demokrasi si ou opte pou ou annan en sistenm demokratik, i pou vin avek en kou. E en kou ki ou bezwen abzorbe, akoz ou anvi sa serten ke keksoz.

Si ou pou annan militer, ou pou bezwen aksepte ki annan en kou ki vin avek. Si nou ti poudir demen annou frenm *SPDF* avek tou bann keksoz ki annan pou fer avek militer, e nou a pran sa larzan ki dan Bidze e nou ava fer lakaz, bokou dimoun ti pou kontan, me i pa realis.

Nou pa kapab annan en teritwar parey nou fek koz lo la apre midi e ki telman *vast*, e ki telman ris e ki annan telman resours, san ki nou annan kapasite pou defann sa teritwar.

Alor mon ti a kontan reponn Onorab Gill avek Onorab Pillay dan sa fason;- tel parey demokrasi i en keksoz ki koute, annan en prezans militer osi, e annan partenarya militer i pou koute. E mon

sipoze ki dan son lespri gouvènanans, *SPDF* pa pou al angaz son lekòr dan bann kou ki pa'n ganny bidzete oubyen ki i pa kapab *afford*.

E parey mon mazinèn ki en Gouvènanman ki pou antre dan en loperasyon san ki i konnen konbyen sa pou al koute e eski i pou kapab *afford*. Mon plito krwar e la mon pe reponn Onorab Gill spesifikman.

Mon plito krwar Onorab, atraver ou Mr Speaker, ki sa *shared cost*, ler zot dir *shared cost*, ou plito *joint operation* sa *cost* i a bezwen ganny *shared*.

Me mon mazinèn mon pa kapab dir, spesifikman. Me mon mazinèn ki ler ou antre dan en, en tel *Agreement* i plito Lanmerik ki pou *shoulder the burden* akòz zot ki kapab.

E nou pa ti pou antre dan en *Agreement*, ou plito Gouvènanman ki'n siny sa *Agreement* ki i ti Gouvènanman presedan pa ti pou antre dan en *Agreement*. E sa Gouvènanman pa ti pou'n demann nou ratifye li, si zot ti krwar i ti pe vin avek en kou ki nou pa pou kapab soutenir. Donk mon krwar *that's the best I can do* vizavi kestyon kou.

Me ou vwar Mr Speaker i annan, i annan kou parfwa ki enprevizib e bokou fwa se bann

gran pwisans ki met sa kou lo nou. Mwan mon rapel dan *case Malo* par egzansp. Akòz *Malo* li i ti la dan Losean Endyen e i ti pe ganny *track* par Lanmerik. Nou pa ti konnen i la nou. Akòz nou napa, nou ti napa sa fasilite ek sa kapasite. Ameriken ki ti *track* li depi ler i ti sorti Liban, Liban, avek tou son kargo zarm.

E Ameriken ti'n kapab touy, ti'n kapab *shoot Malo*, fer li disparet. Zot ti'n kapab *sink* li, zot ti'n kapab abòrd li, me zot pa'n anvi. Akòz bann konsekans Lalwa Enternasyonal.

Alor sa ki zot in fer. Zot in dir nou, i annan en bato la an deor, akòz zot pa al rode? E nou, san demann okenn kestyon nou'n anvoy *Topaz* e nou'n al rod *Malo* nou'n fer li antre isi avek bann konsekans ki nou, ki ozordi nou konnen.

Erezman ki nou'n aprann par nou fot lepase e nou pa pou, nou pa pou fer sa bann kalite loperasyon *cowboy* ankor ozordi, akòz i annan plis regar lo bann keksoz ki nou fer.

E mon krwar *SPDF* ozordi avek *SPDF then*, i annan de diferan, de diferan konzonktir. Ozordi se en lafors responsab e se en lafors ki pa pou zis fer keksoz an brit an brann.

Eski, eski nou bezwen en tel *Agreement*? Eski nou

bezwen antre dan en tel keksoz? Mon krwar larepons in ganny reponn par tou bann entervenans, apre midi. Me mon kontan vwar bann *Agreements* koumsa Mr Speaker, koman bann lisyen mesan. Ou lisyen pa bezwen mord person. Lefe ki i la, lefe ki ou konnen ki i la, i sifizan pou *deter* bann dimoun vin dan ou lari. Akoz zot pou konnen ki i annan en posibilite ki zot pou ganny tyonbo.

E la mon kontan reponn atraver ou Onorab Pillay. Wil si Prezidan Ramkalawan i proaktif, lo anvoy, oubyen demann *Coast Guard* al entersepte bann dav, oubyen bann bato lapas Sinwan oubyen bann keksoz ki dan nou teritwar ki pa sipoze la.

E ki pa pe dir, pa pe eksplike akoz zot la. Sa i pa en move keksoz. *Whether or not* i annan en keksoz abor, *whether or not* zot inosan, *at least* mesaz laba deor se. "Gara ou ler ou antre dan teritwar Sesel, akoz zansla pe vey ou!"

E mon krwar se sa ki enportan, e se koumsa ki lamazorite sikse ou gannyen. Pa ler ou aret en dimoun, me ler ou anpes li fer sa keksoz ilegal ki i ti, ki i ti pou al fer.

Alor mwan personelman mon siport en proaktivite dan sa, dan sa domenn. E se dan sa

lality ki mon krwar ki sa *Agreement* i antre dan en fason byen kordinen.

E avek sa detrwa parol permet mwan zis dir de lezot keksoz avan mon fini. Ou plito en lezot keksoz avan mon fini. Sa *Agreement* i napa en dire dan letan. I endefini, me nenport ant sa de parti i kapab fer donn notis ki zot anvi sorti dan sa *Agreement*. E sa *Agreement* ava arete lan apre ki sa notis i ganny donner.

Mersi Mr Speaker. Avek donk sa detrwa mo, mon ava envit tou bann Manm pou donn zot sipor a sa Mosyon ratifikasyon. Mersi bokou.

MR DEPUTY SPEAKER

Mersi Onorab Georges e donk sa in anmenn nou lafen nou deba lo sa dezyenm Mosyon. Avan ki nou pran en vot lo la mon a zis relir Mosyon ki i dir: -

In accordance with Article 64(4) of the Constitution, this Assembly resolves to ratify the Agreement Between the Government of the Republic of Seychelles and the Government of the United States of America Concerning Counter Illicit Transnational Maritime Activity Operations.

Donk tou Manm ki an faver nou ti ava demann zot pou endike? Mersi. Okenn Manm ki

kont? Mersi Madanm Clerk. Donk pou Mosyon ki nou fek pase, pou ratifye sa Lagreman ant Repiblik Sesel avek Gouvernman Leta Ini. I annan 29 vot an faver. Napa personn ki vot kont, e napa personn ki'n *abstain*. Donk sa Lagreman i ganny ratifye par Lasanble Nasyonal Sesel.

Nou aprezan pou pran en *break*, nou pou retournen 4er edmi. E avan ki nou ale mon'n zis aprann ki anfet Lorenzo Laurence ki le 2 *Leader* dan Lasanble in mansyonnen, i neve Onorab Esparon. E se pou sa rezon ki i pa la, dan Lasanble ozordi apre midi.

Donk lo lapar Lasanble Nasyonal mon ti ava kontan lo non lapar tou Manm ek *staff* prezant nou profon senpati avek Onorab Alcindor avek son fanmir. Donk Esparon. Mersi.

Ok, mon fek ganny lenformasyon. Lo lotorite Mr Speaker, in demann Lasanble pou nou *adjourn* e nou ava rebran nou travay Mardi prosen 9er bomaten. Mersi.

(ADJOURNMENT)